

FAIGĀ-UO O ASO NEI - UO MA LE ATUA.
Friendship in the digital age - Friends with God.
(Saunia: Joshua ‘Spanky’ Moore.)

Aso Sa, Oketopa 01, 2017. ‘Fa’aolaola faigā-uo’

Tusi Faitau: Fa’ataoto 17: 9-17.

Matua (f. 9): “O lē ua ufiufi le soliga o le tulafono, na te sailia le alofa; a o lē na toe ta’u le mea, na te fa’ate’a’eseina uo.”

O se tasi o mea uiga ese ae matuā loloto le tupuga a’e ai i lo ma va ma la’u uo, o lona fa’apea mai lea, e te iloa alii Spanky, ‘ou te matuā mana’omia lava oe,’ e ui lava ina mamafa le fa’asalaina o oe i le fasioti tagata numera muamua, e lē taofia ai lo’u mafaufau pea ou te sau e asiasi mai iā te oe i le falepuipui. Ina ua ou fa’alogo i ia upu e pei e foliga ta’ufa’ase’e, na ou toe manatua ai ma le mautinoa, i totonu o la’u uo lea, ua ou maua ai se uo sa’o, fa’amaoni ma alofa moni, o ia lava o se uo ua sili atu i lo le uso. O le loloto lenā o le fai uo a la’u uo lea i totonu iā te ia, i lo ma va fa’ale-uo.

I tausaga e tolu na soso’o ai, i le ma talanoaga lē tutusa ma la’u uo lea sa faia, na tatala ai la’u fesili faifai pea e fa’apea, o ā ni fa’ailoga e fa’atinoaina e fai ma fa’avae mautū o se faigā-uo e finagalo i ai le Atua. Na i’u ina ou taunu’u i le taunu’uga lea e pei ona fa’ailoa mai e le fuaitau o le fa’ataoto o lo’o autu i ai lenei aso. O le fa’atuatua ma le fa’atumuina i le loto fa’amagalo, e atagia mai o mea aupito matagofie ia e tataua ona maua ma muamua i se lisi a se faigā-uo, mai le tele o isi mea tāua e finagalo i ai le Atua.

Peita’i, ua aliali mai o mea ia o lo’o finau ma faigā-uo o aso nei. Nai lo’o le taumafai e pipi’i vāvālalata ma le uo i taimi taugālemū ma taimi faigatā, ua faigofie lava iā i tatou ona fua le uo i lona aogā iā i tatou, ia po’o le fa’atigā mai fo’i iā i tatou i feso’ota’iga lautele. Peita’i, o le ā la se auala lelei fa’a-Kerisiano o tatou molimau ai i le talalelei i le lalolagi, mai auala o lo’o tatou fa’atinoaina ai ā tatou faigā-uo. O le ā se fa’ailoga matilatila o le ā e fa’ailoaina i le lisi o lau faigā-uo ma le Atua?.

Tatalo: Tamā e, fa’afetai mo le meaalofo o faigā-uo, ma uo mamae ua e tu’uina mai mo a’u. Ae fa’asilisili lo’u ‘oli’oli i le avea o Iesu ma a’u uo i lo’u olaga. **Amene.**

Aso Gafua, Oketopa 02, 2017, “Uo ma le Atua”

Tusi Faitau: Esoto 33:7-11.

Matua (f:11a): *“Ua fetalai mai fo’i le Atua iā Mose, o lo’o fesāga’i lava, fa’apei o le tagata ona tautalatala ma lana uo.....”*

I le tele o tausaga, sa ou galue ai e fa’atautaia le fa’atinoina o le polokalame o le malū taeao, i totonu lava o le ofisa o le leitio fa’asalalau a le iunivesite sa ou i ai. O se tasi o va’aiga mata’ina, o le fa’atalatalanoaina lea o tagata lauiloa, i le isi fo’i itu, e lē mafai ona o’o atu i se sefulu minute ma te talanoa ai ma se tagata, pe afai e lē o sa’u uo mamae. I se tasi taeao a’o o’u savali atu i totonu o le ofisa fa’asalalau, sa fa’ailoa ane e la’u fa’atonu, e i ai le fa’atalanoaga ua tuai ona fa’atulaga ma se tagata e fa’atinoina ata tifaga. Ae ou te lē mautinoa po’o ai tonu o ia, ona ua tau le lagona atu lona leo. Na ou ulufale i totonu ma lo’u ‘atigū, ai fo’i o se tasi lenei fa’atalanoaga ‘iva, o le ā lē fiafia i ai le ‘au fa’asalalau.

Na lelei lava taualumaga o le fa’atalanoaga. E iā te ia se leo lelei o tagata e fa’atinoina ata tifaga, ua toetiiti lava tutusa ma le leo o se pili lapoa. Peita’i, ae ou te le’i o’o lelei atu i le fale, na alaga leotele mai lo’u to’alua ma le fiafia tele, a’o o’u ulufale atu i le faitoto’a. “Ua e talanoa ia Gandalf.” Na fa’afuase’i ona ou manatua, ua fa’atoa uma atu lava ona ou fa’atalanoaina Ian Mckellen, o se tasi o fetu pupula o le ata tifaga o le “Lord of the Rings.” O se tasi lea o fa’atalanoaga faitauina i lo’u olaga faigaluega, e ui ina ou te le’i mafaufauina i lenā taimi.

Ou te masalo, sa tataua ona i ai fo’i i tagata Isaraelu o le Esoto, le lagona o le matuā lē talitonuina o le feso’ota’iga a Mose ma le Atua. O le fa’aaluina o taimi e talanoa fa’afesāga’i ai ma le Atua, e lē ona o ia o le tupu ma lana auuana, po’o lē na foafoaina ma le tagata na foafoaina, ae o se talanoaga fa’afesāga’i a se faigā-uo mafanafana. O se mea e faigofie ona lē mafaufauina.

O lo’o tatou mafatia pea e va’ai a’e i le Atua ma o tatou mafaufau e lelea solo, ona ua le gata ina ia mana’o e pulea i tatou, ma matuā uluulu-mamau lona alofa iā i tatou peita’i, ua ia finagalo fo’i ia tatou fa’afesāga’i i taimi uma o ni uo. I le taimi nei la, afai e lē mafai ona tupu a’e iā i tatou se mafaufau, o se faigā-uo o se mea alofa mai le Atua e tataua ona fa’atinoina o se mea lilo Paia, e mautinoa la o le ā le isi mea?

Tatalo: Lo’u Atua la’u Uo, fa’afetai ua lē na o lou alofa iā te a’u, a ua e mana’o fo’i iā te a’u. Fesoasoani mai ina ia ou sa’ili i ou fofoga ma fa’auo pea ma lau Afio i aso uma. **Amene.**

Mafaufauga Loloto: Fa’amata e lava le ‘Facetime’ i luga o le smartphone, e fa’amalieina ai le talanoaga i le va o le Atua ma Mose?

Aso Lua, Oketopa 03, 2017. “Filifili lelei au uo.”

Tusi Faitau: Fa’ataoto 22: 22-25.

Matua: (ff: 24-25): *“Aua ne’i fefa’auoa’i ma le tagata itagofie, aua fo’i lua te o ma le tagata lotoa, ina ne’i e fa’aa’oa’o i ona ala, ona maua ai lea o lou agaga i le mailei.”*

O se tasi o a’u faia’oga sa telē lona sao i lo’u olaga, o se faifeau o le militeri e suafa ia Phil. O se ali’i na ia fesoasoani i lo’u olaga fa’atuatua ina ua ou paū ese atu i le loloto o le leaga ma ua tauau lava ina oti. O ia o se ali’i e maualuga lona fa’atuatua ma tausa’afia ona uiga fa’aalia. Peita’i, ou te manatuaina pea le taimi muamua na ma i ai ma Phil i totonu o lana ta’avale. Na fa’afuase’i ona suia Phil i se tamāloa ita ma le leai o se onosa’i. O lona lima ua fa’alālā mai iā te a’u, o taofi o le ta’avale ua fe’ei leotetele, ua lē malōlō le e’e o le pu, ma le saosaoa mata’utia o le oso masau a le ta’avale. O fea ua mou atu i ai le filemū, sa fausia ai lenei faia’oga tausa’afia ma fa’atuatua, e ui ina o ia o le faifeau Hindu?

E te iloa, o le fa’amalosi-‘au mai le Fa’ataoto ina ia ‘alo ‘ese ma le tagata itagofie, e lē o matuā tu’u sa’o mai i lona ulua’i aliali mai. Auā iā te a’u, o le i ai o la’u uo i taimi fa’apitoa, e ui ina itagofie, o se tasi lea o mea sili ona tāua ua tupu i lo’u olaga. O fea lā o lenei fautuaga fa’a-fa’ataoto mo i tatou, o le ā fesoasoani i le tatou galulue atu e

filifili a tatou uo? Ou te mafaufau ua matuā manino lelei a’oa’oga a Iesu i lea mea, o tagata Kerisiano, e lē tatau ona fa’auo atu na o tagata lelei, tausa’afia ma amio lelei, po’o tagata faigofie fo’i. Peita’i, ua fa’amanatu mai e lenei faitauga iā i tatou uma, ina ia fa’aaogā lelei le potō ma le iloa, ma ia maua le va’aiga aupito sa’o, tatou te iloa lelei ai o tatou fo’i vaivaiga ma leaga.

O le mea lea, afai o e mafatia ma tauivi ma le faitatala, toe mafaufau fa’alua, ae e te le’i fa’auo atu i se tagata faitatala. Afai o e tauivi ma le manatu fa’apito, aua le fa’auo atu i se tagata ua fa’atumuina i lona lava ta’u na o ia. Afai o e tauivi pea e alofa atu i sē ua aupito itiiti o i latou ia, e lē o se mea lelei pe afai e fa’auo ma le tagata mativa ina ia pulea ai mea totino a i latou na.

I le isi taimi i le lumana’i o le ā e fesāga’i ai ma sau faigā-uo fou, fesili ifo nei iā te oe, Fa’amata o le faigā-uo po’o le mafutaga ua faia nei o le ā matuā loloto ai se fesoasoani i lou olaga aga’i atu i le Atua ma lona malō, pe na ona atili ai ona toso mamao ‘ese ai oe mai lea malō?

Tatalo: Le Atua amiotonu e, fesoasoani mai ia ou iloa ma mautinoa tagata ua e vala’auina a’u ia ou fa’auo i ai i lo’u olaga, e a’afia ai tagata agasala ma tagata Paia. **Amene.**

Mafaufauga Loloto: O ai o au uo o lo’o fesoasoani e tosina atu oe i le malō o le Atua? O au uo ea o lo’o e mafaufau i ai, o ni Kerisiano ma lolotu, po’o se tasi?

Aso Lulu, Oketopa 04, 2017. “Ionatana ma Tavita.”

Tusi Faitau: I Samuēlu 18:1-5.

Matua: (f:1): *“Ua uma atu ana upu iā Saulo, ona pi’i mau lea o le loto o Ionatana i le loto o Tavita, ua alofa Ionatana iā te ia, pei ona alofa o ia iā te ia lava.”*

Ou te lē mā e ta’utino le mea sa’o. E tusa ma le 1,498 a’u uo i luga o le facebook. E pe ā ma le lua o vae tolu ou te matuā iloaina lelei o latou tagata, ou te fa’amalō atu i tagata pe tusa ma le afa o i latou uma, ae i ai fo’i taimi ou te lafi ai i tua ma fa’apasi ni tagata pe ā ma

le lua sefulu, ina ia ou ‘alo ‘ese ai mai se feso’ota’iga ma i latou pe afai ou te va’aia i nofoaga faitele.

I nei so’otaga mautū ma i latou uma nei, ua aliali mai ai se fesoasoani mo a’u e fa’avaeina ai se fa’agasologa sa’o o mea tutupu e mafai ona fa’amatalaina ma fa’amalamalamaina, i le va o tagata talavou, ua ta’ua o le mamafa o le ola to’atasi. E i ai la’u uo sa ma fai ‘aiga i le tasi afiafi, sa ia fa’amatala iā te a’u e uiga i le la nonofo fa’atasi ma lana flatmate i le iunivesite sa ou a’oga ai. Ua latalata ina ma’ea lona tikeri, peita’i, e lē o i ai lava sina uo se to’atasi mo ia i le fa’tausaga i le lotoā o le a’oga.

Na tusia e Sherry Turkle le tusi e ta’ua o le ‘Nofo to’atasi fa’atasi.’ O le fesili o lo’o tulimata’ina ai, Aisea tatou te mafaufau tele ai i le tekonolosi, ae itiiti mai isi tagata? I totonu o lenei tusi o lo’o ia fa’ailoa ai, o auala o fa’asalalauga, latou te ofoina mai le aofo’i sa’o e mafai ona feso’ota’i ai, le aofo’i e mafai ona puleaina. O ia faiga, e tu’uina tagata ia lē felataa’i pe mamao fo’i, peita’i, ua nā o le mamao fa’atulagaina lava. O aso nei, ua tumu le lalolagi i tagata ua fa’amafanafanaina i feso’ota’iga ma isi tagata, e pei lava fo’i o tagata o lo’o latou mau fa’atasi i le nofoaga e tasi.

Peita’i, o le faigā-uo a Tavita ma Ionatana, ua tatou va’aia ai se ‘ese’esega tele ma faigā-uo i luga o ala fa’asalalau. O le to’atele o i tatou, e vāvālalata se faigā-uo ma i latou e tumu o latou lima i le tamāoaiga. Ae maise ai, o le to’atele ua alu uma lo latou malosi e taofiofi ai i se faigā-uo ma i latou ua silafia i le va’ai i foliga ae lē o le loto.

O le mea lea, O i ai se tasi i lou olaga o le ā vala’aulia e le Atua lua te o fa’atasi i le loloto o faigā-uo? Fa’amata e te toa ma lava sou malosi e fa’aitiitia ai ou taimi i le lalolagi to’atele, ae fa’aavanoa lou tagata e manu’anu’a mo isi tagata?

Tatalo: Tamā e, o mea uma ua iā te a’u, i le taimi nei po’o le lumana’i fo’i ua e silafia uma lava. Fesoasoani mai ia ou tumau i lo’u tagata moni i le feso’ota’iga ma a’u uo ua ou alofa i ai. **Amene.**

Mafaufauga Loloto: Fa'amata o le facebook o se auala lelei lea o faigā-uo e fa'avae a'e i le fatu? O ā ni ona lelei a'o ā fo'i ni ona fa'aletonu?

Aso Tofi, Oketopa 05, 2017. "Manu'a o le uo"

Tusi Faitau: Fa'ataoto: 27: 5-19.

Matua (ff: 5-6): *"E sili ona lelei o le a'oa'iga ua aliali mai, i le alofa ua lilo. E fa'amaoni manu'a mai le uo, ae tele le feāsogi o lē ua 'ino'ino."*

Ua ou masani i le tauiviga ma fete'enaiga. O le mau tauave a lo matou aiga, 'Ia na ona matou fialia i le 'ata'ata ma feso'ota'i fa'atasi.' O le mea lea na alu uma ai le taimi o lo'u olaga e taumafai ai ina ia aua nei save'uina le fa'avae lea. E le'i mamao tele atu ona ou ta'utino lenei mea i lo'u faia'oga o le mafaufau, ma ia ta'ua mai ai iā te a'u le fuālaau o lo'o ia avatua i tagata e pei o a'u ma o'u fete'enaiga, o le 'oka lea o se hamburger mai le Burger King. (o se leo manaia lea ou te manao i ai). Peita'i, afai ou te faitio i le hamburger, ma toe talosaga se isi hamburger e sui ai, o le latou fautuaga, e lē mafai, ona atili ai lea ona fete'ena'i ma lo'u fialia i le hamburger. Afai o se pepelo ua matuā nātia iā te a'u, o le mautinoa lea o le 'fa'asa'oga o le te'ena,' o lona uiga fo'i la, ou te lē mana'o e lagona e se tasi le lagona o le te'ena. Ae maise lava ou te lē mana'o fo'i a'u ou te lagona lea lagona o le te'ena. O le mea lea ua ou mā ai lava e tautala i le mea sa'o.

O le faitauga o le asō, ua lu'iina ai i tatou i lea mea, ma aumai se manulauti tatou te tulimata'ina e amata ai a tatou faigā-uo ia mausalī ma feuluuluta'i. O le faigā-uo aupito lelei lava, e tataua ona i ai le alofa e talia ai le isi, ae tataua fo'i ona tatou mana'omia a tatou uo latou te lu'iina i tatou, fa'asa'o i tatou, ma fa'amanu'a i tatou. Ua masani ona lu'iina i tatou e tagata mai le mamao o i ai ona o feso'ota'iga fa'asalalau, peita'i, o i latou o lo'o tataua nonofo vāvālalata, latou te filifili pea e taofi mau le filemū, nai lō le tautala malosi i le sa'o. O le tele o mafutaga fa'a-Kerisiano ua sātia ma fa'amutaina, ona ua fa'avae ma fausia i mea fe'ilafi o le olaga, e lē o mau tulaga ma mautū ai le tautala sa'o, le fa'asa'o, ia po'o ni 'ese'esega o lagona, ae malōlōina mo le soifua o le tagata.

E fa'apefea ona amata se olaga tatou te ola ai i totonu o le fa'avae lea, 'o manu'a mai le uo e tatau ona fa'atuatuaina ma talitonuina?' E fa'apefea ona tatou totoa e tautatala i le mea sa'o ona o le alofa, ma ia fa'ataga fo'i o tatou tagata e fa'alogi i le mea sa'o pe afai e maua i tatou i le tulimanu?

Tatalo: Le Atua alofa e, fesoasoani mai iā te a'u ina ia lava le toa o lo'u loto e tautala ai i le mea sa'o, ma ia maua fo'i le lotomaulalo e talia ai le mea sa'o i le alofa mai a'u uo. **Amene.**

Mafaufauga Loloto: I au lava upu, o le ā se mafaufau o le Atua i faigā-uo? O faigā-uo e mo le ā.?

Aso Faraile, Oketopa 06, 2017. “O ai e te fa'atuatuaina.”

Tusi Faitau: Mika: 7: 1-7.

Matua: (ff: 2, 5a, 7): *“Ua fano lē ua agalelei nai le nu'u, e leai se tasi tagata ua amiotonu, latou te lamalama uma ina ia fasioti tagata, ua latou ta'itasi ma tuli lona uso ma le upega... Aua ne'i outou fa'atuatua i le uo, aua ne'i fa'alagolago i le aumeamamae... A'o a'u, ou'te fa'atalitali i le Alii, ou te fa'amoemoe i le Atua o lo'u olataga, e fa'afofoga mai lo'u Atua iā te a'u.”*

Mai le 2006-2009, na ou maua ai se tasi fa'amatalaina fou o le upu 'talimalō' i le matou 'aulotu, e ta'ua o le “Umukuka.” I le fa'agasologa ai o le tolu tausaga lea, o le mea tele na ta'ita'iina aga'i i ai e le Atua le matou fa'apopotoga, o le toe maua mai lea o le olaga talimalō fa'a-Kerisiano. O le manatu muamua lava sa tatagi pea i le mafaufau e pei o se vala'au, 'e sa'o?' O le tali ioe, auā ua tele le pizza, tele le pasta ma le uaina mūmū sa talia fiafia i le suafa o le Atua, i ia tausaga e tolu. Peita'i, o le vaega sa matuā faigatā lava, o le sa'ili'ilia lea o tulimanu fa'a-Kerisiano uma o le 'talimalō fa'a-Kerisiano.' O le ā sa'o lona uiga pe afai ou te talia sē ua fa'atauva'a matou te aai fa'atasi?

O se tasi o talanoaga matagofie sa tumau pea iā te a'u i ia tausaga e tolu, o le matou talanoaga lea ma se ulugali'i e fa'avaeina lelei, e tutū fa'atasi, ma a'oa'oina lelei i le matāupu silisili. Sa laua fa'asoa i le matou vaega se tala e fa'atatau i nisi o ā la uo na latou taliaina se

tagata faigatā tele i le latou ‘aiga o le afiafi. Na latou faia lea mea i lo latou manatu tele i lo latou soifua talimalō, e ui ina sa gaoia ai tupe ma mea fe’ilafi, a’o fa’atagā alu ‘ese lea tagata i le falemamao. Mo i latou, o le a’oa’oga o le tala e lē fetau, e mautinoa lava o le talimalō o lo’o mautū ma sili atu ona lelei. Peita’i, aua nei tuleia mamao ‘ese le Kerisiano ina ne’i i’u ane i lagona tigā ia po’o le fa’amativaina fo’i.

O se valaau fa’amanatu ua aumai e Mika mo i tatou i foliga va’aia o le mata’utia o taua e fesāga’i ma le talimalō fa’a-Kerisiano. E mafai ona mafaufaaina e so’o se tagata le leaga o tagata. A’o le Kerisiano, o nei, ua valaauina ai i tatou ina ia tatou tula’i atu e fa’auo ma fa’apotopotoga ua leaga. Aua nei o tatou solomuli ma va’ava’ai i autafa po’o a mea o le ā faia e le Atua i le lalolagi, tusa lava po’o le uiga o ia mea o le fa’atafunaina uma i le taimi nei ma le lumana’i. O ai le tagata mulimuli na lua fai ‘aiga fa’atasi i se afiafi?

Tatalo: Le Atua e, e ou le areto ma le uaina, a’o e taliaina a’u i lau lāoai i lou malo, fesoasoani mai iā te a’u ia ou talia le tagata fa’atauva’a, le tagata mulimuli ma lē ua leiloa i lau laulau matou te aai ai. **Amene.**

Mafaufauga Loloto: Ia vala’aulia se isi tagata fou tou te aai fa’atasi i lenei vaiaso.

Aso To’onai, Oketopa 07, 2017. “E lē o lenā.”

Tusi Faitau: Salamo: 55:1-23.

Matua (ff: 12-13): *“Auā e lē o sē fai a’u mona fili na upuleagaina a’u; ana sē ita mai, po ua ou ‘o’ono ai; e lē o lē ita mai iā te a’u na fa’asausili mai iā te a’u; ana sē ita mai, po ua ou lafi iā te ia; a o oe lava, o le tagata ta te tutusa ma a’u; o la’u uo lava, o lē ua ta masani;”*

O le to’atele o tagata ua malamalama i le tigā o le oti o se pele i le loto. O le tali malōlōina e fa’aaoga pea, o le fa’anoanoa. Tatou te fa’amalosi atu i tagata ina ia lototele, ma aua nei avea tigā o le to’esea e vaivai ai, ae ia lagona pea tigā o le oti. Ae aisea e lē fa’apea ai la tatou masani pe ā o’o ina oti se faigā-uo? Aisea tatou te lē mafai ai ona tatou fa’anoanoa i le auala lava lea e tasi.? E i ai se isi mea e

sili atu lona tigā nai lo le masani i le tete'a o se faigā-uo vavalalata? Pe a feiloa'i ma manu'a e tau i le oti, o upu e matuā ma'ama'ai e pei o le pelu, o so'otaga ua susunuina i lalo ma le suamalie o le faigā-uo ua liua ma vai o'ona.? E i ai se isi tigā e sili atu.? Ae fa'amata e fa'afia e sili atu ai tigā o le Kerisiano e tete'a ma isi, peita'i ua lē mafai lava ona folau i afā ma matagi o le fa'amagaloina.? Na asaina e Iesu le pa'i tumutumu o le fa'alataina o ia e se tasi o ana uo, ma i'u ai ina tete'a ma isi uo.

O le Salamo e 55, ua matuā maioio lelei mai ai le fa'amatalaina o le mea moni o lo'o tupu pea, o le oti o se faigā-uo, e mafai ona tutusa le tigā ma lagona o le tigā alofa moni, pe ā oti sē ua pele i le loto. E mautinoa le o'o ifo i lou mafaufau se o'ono sa e feagai ai ona o se faigā-uo ua leiloa i lou olaga. "E fa'apefea la i tagata mulimuli iā Iesu ona tali atu i le mea moni o le lē "tutusa" pe ā fai ua mamao lava se fa'aleleiga ma se fa'afouina.? E lē mafai ona tatou maua ni fōfō atoatoa, peita'i, fa'amata e mafai ona tatou fa'atagaina a tatou faigā-uo e oti filemū, ae alu atoa lo tatou lelei e fau ai le alofa iā i latou ua tatou mamao ma ua le tapunia mai le faitoto'a tatou te tutusa ai?

Tatalo: Le Atua alofa e, fesoasoani mai a'o o'u tigā i la'u faigā-uo ua oti, a'o ou taumafai pea e tumau i lou agaga o le filemū, le fa'amoemoe ma le tumu i le loto fa'amagalalo. **Amene.**

Mafaufaga Loloto: O fea o e va'aia ai lenei Salamo o olaina i totonu o lau Ekalesia ma 'aulotu ma potopotoga a uo.?

FAIGA-UO O ASO NEL- FA'AFESĀGA'I.

Friendship in the digital age.- Face to Face.

(Saunia: Helen Van Koevering.)

Aso Sa, Oketopa 08, 2017. "Uo ma aiga."

Tusi Faitau: Fa'ataoto:18: 24 -19: 7.

Matua: (18: 24 & 19: 4: "*O le tagata ua fai ana uo, e i'u ina tigāina ai o ia, a o i ai le tagata alofa e sili ona pipi'i mai i lo le uso. O le oloa e fa'aopoopo mai ai uo e to'atele; a o lē ua mativa e te'a 'ese o ia ma lana uo.*"

I lenei vaiaso, o le ā tatou va'ava'ai ai i amataga tāua e fa'avae ai faigā-uo lelei, o le fa'afesāga'i lea, e amata lea i le faitauga lea mai le tusi o Fa'ataoto. O tagata uma lava e fiafia i tala fa'a-fa'ataoto ma manatu o lo'o fa'aalia ai, e ola ma savali ai i le olaga. E faitau i ai ma manatua, peita'i, e mafai fo'i ona tiai ese pe afai e iloa o le upu atamai lea o lo'o feagai tonu ma le olaga o lo'o ola ai. Ona tula'i mai ai lea o se fesili tele i le va o fuaitau e lua ua tatou amata ai, o lo'o i le amataga ma le i'uga o le faitauga lea.

O le ā lea mea? O le si'osi'omaga ma le taimi, o le talafa'asolopito ma le avanoa. E i ai le matāfaioi o le olaga i so'o se tagata, a lē o le savali ma le fa'amaoni e lē fa'atauina, o se tautalaga e fa'avalevlea, o le naunau i se faigā-uo e aunoa ma se taimi e tu'uina ia iloa ma silafia ai le isi tagata. O le saosaoa o lo'o tatou olaina ai o tatou olaga, ua faigofie ai ona tatou maua le ita po'o aga e fasiotia ai so'otaga ma uo.

E fa'apefea ona a'oa'oina i tatou i le mea e ta'ua o le faigā-uo sa'o? E fa'apefea ona avea i tatou ma uo moni? Masalo e mafai pe ā tatou fa'atāuaina le nutimomoia o tatou loto i totonu iā i tatou, 'e aofia ai ma tāua atu a'u lava.' Masalo fo'i e mafai pe ā fa'atāua le fa'alologologo atu, i lo le tautala so'o. Manatu fo'i e mafai, pe ā tu'u se taimi e nofo ai i lalo ma mafaufau, ma asiasi atu i se tasi. Ae sili atu ona manatua, e tasi le tagata e tatau ona suia atoatoa i lenei lalolagi, "o lou ma lo'u lava tagata."

Tatalo: Iesu e, le uo o lo'o sili ona pipi'i mai iā te a'u nai lo o se isi lava, e mafai ea ona ou iloa atili oe i lenei aso.? **Amene.**

Aso Gafua, Oketopa 09, 2017. "O le agaga fai-uo o Iesu."

Tusi Faitau: Luka: 7: 31-35.

Matua (f: 34): *"Ua sau le Atali'i o le tagata, ua 'ai o ia ma inu; ona outou fai ane lea, Fa'auta, o le tagata 'ai tele ma le inu uaina, o le uo a tagata ao lafoga ma ē agasala."*

A o le'i ulufale Iesu i totonu o le fale o le faresaio, o ia ua vala'aulia, peita'i, o se malō e lē tatau ona taliaina i'ina, ae maise fo'i o le nofoaga na u'u ai e le fafine vae o Iesu i lana suā'u, o ona loimata

ma sogi e tele, na maua ai e ia le fa'amagaloina o ana agasala, ua tatou a'oa'oina mai ai i'ina le agaga fai-uo o Iesu.

O Ioane ma Iesu o avefeau a le Atua. O le soifuaga fa'afiti o Ioane e lē o ia o le Mesia, sa matuā lē maluelueina lava lea. Na fa'apea tagata o lo'o iā te ia se temoni. Mo Iesu, na te le'i fa'aogāina mea'ai ma vai inu o se fa'ailoga o a mea paia, a'o ai fo'i e paia, ae sa fa'aogā o le fa'ailoga o le soso'o fa'atasi o lona tagata ma tatou uma. O lea na faitioina ai o ia. O le tusi o tatou lima i se mea o ia mea ua tāua, o le tapunia lea o tatou mafaufau ma tatou lē ano ai i le "Poto," (Atua) o lo'o mana'o mai e fai-uo ma tagata uma, ma ia uo fo'i tagata uma. O le Poto, e silasila i le loto ma mana'oga o so'o se tagata, ae lē na ona fa'amasino i fafo i le lē mamā ma le mamā e pei ona faia e sosaiete, ua le o'o atu ai se fesoasoani mo se tasi ina ia lelei, e ala i le ofoina atu ma le taliaina. Peita'i, ia feiloa'i ma so'o se tagata i le tulaga o lo'o i ai, ma le nofoaga o i ai.

O le ā se feau ua tatou a'oa'oina mai le agaga fai-uo o Iesu? O le 'Poto' ua vi'ia e lana fanau uma. (v:35). O tagata uma e lagona ma mulimuli i ala o le Atua, o fanau i latou a le Poto. O le agaga fai-uo o Iesu ua fa'ailogaina i le talimalō e lē fa'atuāo'ia, pe o se malō pe talimalō fo'i. O ia o le malō vala'aulia a tagata uma e vala'auina o ia, ae o ia fo'i e talimalō e talia fiafia ai i tatou uma. Talosia ia fa'amalosia i tatou e mulimuli i le alāfua lea a Iesu i lona agaga fai-uo, e lē afāina po o ai tatou te fetau ma talanoa i ai i lenei aso, a ia lagona lona valaau mai iā tatou faigā-uo, ina ia tumau i le talimalō e lē fa'atuāo'ia.

Tatalo: Le Atua e, alofa mai ia mafai ona matou mulimuli i ou ala o le talimalō e leai se tuāo'i, fa'apupula o matou mata ina ia matou iloa atu ai avanoa tatala mai, e fai-uo ai e tusa ma ala o le Atua, i tagata 'ese'ese o le ā matou milo fa'atasi i lenei aso. **Amene.**

Mafaufauga Loloto: Po o oe o se malō po o le talimalō i lenei aso, maitau lelei le tagata o le ā lua fetau i lenei aso. Tatalo filemu mo mea o lo'o nātia i lenā tagata e lē o fa'aילוaina mai i fafo, po'o se mafatiaga o lo'o ia tauaveina ae lē o fa'aילוaina. A ia silisili lava, taumafai e fa'ata'ita'i le talimalō lē fa'atuāo'ia i so'o se tagata.

Aso Lua, Oketopa 10, 2017. “Aua le vala’auina au uo”

Tusi Faitau: Luka-14: 12-14.

Matua (f: 14): *“Peita’i o oe, pe ā e sauni le faigā’ai, inā tala’i ia i e matitiva, i e mumutu, i e pipili, ma e tauaso...”*

O le vala’aulia e omai e talia le areto ma le uaina o le faamanatuga i le aulotu o lo’o o’u galue ai, e gasolo mai i luma le fa’apotopotoga, ona to’otutuli lea ma fa’atalitali ma lima ua fa’amafola atu i le faifeau e ofoina mai i ai le falaoa ma le uaina. O se taimi matagofie tele lea i le va’ai atu i tamā ma tinā atoa ma tagata uma, i le naunau atu i lē o lo’o talimalo o le ‘aiga. E i ai i le taulaga lea le fa’atonusili o a’oga ma lona to’alua. O le tinā o Ana ma lona to’alua gasegase ua matua, o Toma e fe’aveai i le wheelchair, ma le ta’ita’i pese o Osvaldo. Ua latou to’otutuli o le tasi i autafa o le tasi, i le mana’oga tutusa lava ma e malolosi, e tali atu i le vala’aulia lea e tasi o le ‘aiga mo le olaga tatau.

Ua matou fa’alogo so’o i le autū o le talimalō, e afua a’e mai le ta’ele o le loto i ā matou faitauga o le asō. I totonu o le vala’aulia i le aiga lea, ua matou va’aia ai se ata o se ‘aiga tele o lo’o fai i le lagi, ua vala’auina ai i matou uma, atoa fo’i ma i latou ua mafai ona matou mafuta i le sauniga i se taimi pu’upu’u, pe ta’u fo’i o le Fa’amanatuga Paia po o le Iukalisitia. Sa matou va’aia fo’i se ata o i latou o le ā i ai i lea ‘aiga tele. O i latou ia ua tu’ulafoaiina, ta’ufaatauva’aina ma lē amanaiaina, o lo’o oi ma tigā i faiga a tagata o le lalolagi. O se vaega tonu lea o le lalolagi ua vala’auina i ai i tatou e fai-uo atu i ai, i le taimi nei ma le lumana’i.

E mafai, ina ua tatala o tatou loto ma iloa moni le ute o le uo talimalō, o i’ina e a’oa’oina ai fo’i i tatou i le mana’omia tele o lo tatou maua o le pogai moni o le talimalō, i auala e iloa atu ai tala atu o faigā-uo moni ma isi tagata e pei fo’i o i tatou lava, ia po o le ā lava le li’o o tagata tatou te iloina. O i latou tonu lava ia e mafuli i ai ma tatou naunau i ai e avea ma ā tatou uo. A’o tatou, o tagata tonu ia e mana’omia lo tatou lagonaina o le ofoina mai ma le taliaina e le Atua o tagata uma. I le ‘aiga lenā, o le ā avea ai i tatou uma o se aiga ua fa’amagaloina ma tutusa uma ai.

Tatalo: Iesu Keriso e, le Alo o le Atua, o lou vala’auina o i matou i le ‘aiga i le lagi ua matou iloa ai le atoatoa o lou alofa tunoa ma le fa’afouina o tagata uma, Fa’afetai tele lava. **Amene.**

Mafaufauga Loloto: I le isi taimi e te auai ai i le Fa’amanatuga Paia, tatalo mo i latou o lo’o siomia oe, ia pei o i latou o lo’o latou fa’asoaina fa’atasi le taumafataga ma oe. Fa’afetai i le Atua mo le felanua’i o le lalolagi ma le matagofie o le fa’amoemoe i le lagi.

Aso Lulu, Oketopa 11, 2017, “Fa’asoa le Areto.”

Tusi Faitau: Salamo- 41:1-13.

Matua (f: 9): *“O le tagata fo’i o la’u uo, o lē na ou fa’atuatua i ai, na ‘ai la’u areto, ua a’a mai o ia iā te a’u i lona mulivae.”*

E mafai ona loloto ma ogaoga tigā o i latou e latalata mai iā i tatou. O le malepe o le talitonuina ma le fa’alataina o i tatou e i latou e latalata mai i o tatou tagata, e matuā afāina ai o tatou tagata i totonu. O i latou na o’o i ia tigā ua latou fa’amatalaina i latou, ua tu’ulafoaina i le olaga.

Peita’i, i le Salamo ua tatou maua i lenei aso, ua tu’uina mai ai iā i tatou le fa’atagana ma le ta’iala tatou te aue ai pe ā o tatou tigā. I lea auega, e tatau ona tatou fa’alauiloaina ai le auai mai o le Atua iā i tatou i le talitonu atoatoa ma le fa’afetai. Silasila i le fa’agasologa o lo’o i le Salamo lenei e 41. I lenei tatalo, o lo’o fausia mai i elemeni o salamo o auega e le tagata e ona le tatalo. E amata i le valaau i le suafa o le Atua, o le fa’amatalaina o le mana’oga, o le valaau i le Atua i le mafua’aga e tatau ai ona aiā mai i ona tagata, ma le vi’iga i le Atua. I le ogātotonu o le amataga ma le i’uga o lana tagi i le Atua, e leai se mea e lē o ta’uina mai ai le tulaga o lo’o i ai, ua matuā fa’amaoni lava ona fofola manino mai i le tatalo. I se iloiloga o lenei tatalo, ua maua ai i se tulaga o le fa’amatauina ma le lē saogālemū. I le lē fa’agae’etia o lona fa’amaoni ma le fa’alauiloaina o ana lava agasala i le tulaga e pei o isi, na aio’i ai le fai salamo i le Atua mo se fa’amalologa.

E ui i le fa’agasologa masani o salamo o auega i le fa’amatalaina o tigā, na matuā tumau pea le iloa e lē fai salamo o lona Atua, ma toe

fo'i lava i le mautinoa mausalī o le auai mai pea o lona Atua i taimi o tigā. O le auega o tigā ua suia aga'i atu i le manatuaina ma le vi'iga. O le fai salamo ua tali atu i le 'ioe' i fa'amanuiaga fa'aauau pea a le Atua, e lē gata mo ia, a o tagata uma lava. Ma o le mea moni lava lenā. O le galue i totonu o o tatou tigā ma mafatiaga, tatou te masani ai i le loloto ma maua ai le ala e fa'aeaina ai. E a'oa'oina ai fo'i i tatou ia tatou iloa ona fa'alogo i mana'oga o isi tagata o lo'o siomia i tatou, ma tatou mautinoa uma ai, o lo'o iā i tatou le Atua.

Tatalo: Le Atua e, taofia i matou uma i lou auai mai e fa'avavau, ma ia ou tuputupu pea i lenā iloa e o'o lava i taimi faigatā o le olaga.
Amene.

Mafaufauga Loloto: Taumafai e tusi sau salamo o se auega.

Aso Tofi, Oketopa 12, 2017. “Faigā-uo ma'ale'ale, uo na ofoina mai.”

Tusi Faitau: Ioane-13: 12-30.

Matua (f: 30): *“Ua talia fo'i e ia le mea e 'ai, ona alu loa lea o ia i fafo; ua po.”*

Ua saunia mai mo i tatou e le toe talisuaga a le Ali'i ma ona so'o, se ata o ni uo o lo'o fa'atasia i le la'oai. O faigā-uo, ma faigā-uo e fa'alataina, o lo'o i le fatu lea o le talalelei. Peita'i, e tupu le pouliuli ma save'uina ai le fa'apotopotoga o le lotu, ma o'o ai ina tatou tu'ufesilisili, o le ā ea le mea o tatou faia nei?

Sa asiasi mai se tasi failauga ma lauga ai i le manatu autū lea. O lana fesili, aisea e tumau ai tagata i le fa'apotopotoga o le 'au fa'atuatua?. Aisea e mafai ai ona lavātia le lē fa'agae'etia pe ā o'o ina tutupu tigā ma mafatiaga i le fa'apotopotoga a Iesu ma ana uo? E mana'omia le filifiliga e tumau ai, e sa'ili le uiga, o le alofa o le Atua i le ala lea. E mana'omia le filifiliga e fa'aauuina ai le a'oa'oina o le foa'i atu i taimi ogaoga o tigā ma faigatā o le fa'alataina i totonu o le fa'apotopotoga o le 'au kerisiano. O Iesu, e ala i lona alofa na ofoina mai ai o ia, o lo'o fa'aalia mai ai le Atua e lē mafai ona ia fa'atagaina se mea e fa'a'ese'eseina mai i latou uma e alofa i ai. Ina ia iloa oe fa'atasi ma Iesu i le auala lea, ua ia aumaia ai se filifiliga e fa'atulaga

ai o tatou tagata, ma i latou o lo’o taumafai e avea le auai mai o le Atua o se mea moni e mafai ona pa’i atu i ai ma o tatou lagonaina i le lalolagi lenei. Peita’i, o le aotelega mo i tatou uma, ua filifilia i tatou ia a’oa’oina lelei i le alofa atu i isi, i taimi tigā, ma matuitui ogaoga o le olaga.

O le tasi uo a Iesu o Iuta, na alu ‘ese ina ua o’o mai le po. Na auai le tiapolo iā te ia, atonu fo’i e fa’apea i le fa’apotopotoga. O Iesu, i lona maliu ma lona toetu, na afio mai ai e fa’aioa manino mai iā i tatou, e lē o le pouliuli le toe upu. O le upu mulimuli lava, o le galuega o le alofa i ā tatou faigā-uo ua valaauina i ai i tatou uma.

Tatalo: Le Atua Paia e, ma le alofa tele mai, a’oa’o mai i matou i le uiga o faigā-uo i galuega a le alofa e pei ona e soifua ai i le fa’apotopotoga ma ou so’o. **Amene.**

Mafaufauga Loloto: Manatunatu i se tali mai lau fa’apotopotoga o le ‘au fa’atuatua na e tigā ai. Na fa’apefea ona e tali atu i ai? O fa’apefea ona suia oe i le taimi nei, pe ā e mafaufau i le galuega a le alofa i totonu o faigā-uo?

Aso Faraile, Oketopa 13, 2017. “Upu galue a le Atua.”

Tusi Faitau: Luka- 21:5-19.

Matua (ff: 16-19): *“E tu’uina atu fo’i outou e mātua, ma uso, ma aiga, ma uo; o isi fo’i o outou e fasiotia e i latou. E inosia fo’i outou e tagata uma ona o lo’u igoa. A e leai lava so outou lauulu e tasi e paū. O lo outou onosa’i tou te maua ai lo outou ola.*

O ni upu atamai tele lenei faitauga o le asō, o upu e tataua ona teu fatu i o tatou loto mo taimi faigatā o lo’o aga’i mai. Fa’alologo ma le manino, aua le sauni atu i se finauga mo oe lava, pe fa’amaa’aina lou loto. Ia e mātua mata’u i lou a’apa atu i le alofa o le Atua e fa’amaonia ai ou lagona. O le alofa o le Atua, o le Poto, o le upu galue lenā ma le upu e taofīmauina lou agaga.

I totonu o Mozambique, o le gagana aloa’ia na amata mai i seneturi a’o avea Portuguese ma kolone, o le Portuguese. E lē o tagata uma e iloa tautatala ma tusitusi i le gagana lea. E mafua lea ona e sili atu ma

le 21 isi gagana o lo’o i ai i totonu o Mozambique, e leai se gagana o ia gagana e tautatala ai la matou pule’aga. I le gagana lea, ‘o Iesu le upu a le Atua, e fa’aleoina i le upu “o Verbo” o lona uiga o le “Verb of God” (po’o le veape a le Atua). O galuega, o le ola, o le iloa ma le iloaina o le alofa o le Atua, “o Iesu.” le Alo o le Atua o loo fetalai mai i lenei fuaitau i lenei aso. E ala i le agaga o Iesu, ua tatou ola ai ma le mautinoa i le anoanoa’i o lugā ma lalō o le olaga. Ua suia o tatou tagata, ua fa’afouina ma atoatoa. A’o le malosiaga lava fo’i lenā o lo’o i ai i o tatou aiga, o fa’apopotoga ma o tatou tuāo’i, e pei fo’i ona i ai i le lotu.

E leai se mea e tasi e mafaia ona fa’ate’a’eseina mai le tagata ua alofaina, mai le alofa o le Atua. Le alofa e matuā auau i le tagata e ui i upu ma fa’amatalaga, e o’o lava fo’i i le faitauina o lauulu o lou ulu. O le mea mautinoa lava, o Iesu lava na ia faia le fa’ata’ita’iga ma lapata’i mai i tatou i le tele o fa’afitauli o lo’o i o tatou luma, peita’i, na ia tanumia ma nātia e ala i lona maliu ma lona toetu manumalō. O lo’o soifua fa’atasi ma i tatou ma le lalolagi uma e ala i lona agaga.

O tagata o Mozambique, ua latou iloa lelei lea mea, e pei ona latou maua le nofofo filemū, ina ua uma taua o le fasioti e le uso o le isi uso, ma le lē to’afilemū o le olaga i faiga a isi tagata. O le alofa moni lenā o lo’o tumau pea i a latou ta’utinoga.

Tatalo: Le Atua e, ua matou iloa lou auai mai iā i matou, o le ola ma le mānava o matou agaga. A’oa’o mai ia matou tumau pea i le iloa o lou alofa, le alofa e tumau i taimi uma ma nofoaga uma, e ta’ita’iina ai pea i matou. **Amene.**

Mafaufaga Loloto: Sa’ili’ili i le auai o le lotu i le tuana’i fete’ena’i i nofoaga o le lalolagi, e pei o Mozambique, ma taumafai e fa’alogologo iā latou ta’utinoga i taimi totoe o le olaga i le alofa ma le agaga o le Atua. Taumafai ia e fa’amalosi i lea galuega.

Aso To’onai, Oketopa, 14, 2017. “O le tulafono fou.”

Tusi Faitau: Ioane- 15: 12-17.

Matua: (ff: 14-15). *“O a’u uo outou, pe afai tou te faia mea uma lava ou te fai atu ai iā te outou. Ou te lē toe ta’ua outou o auauna,*

auā e lē iloa e le auaua mea e faia e lona ali'i; a ua ou ta'ua outou o uo, auā ua ou fa'ailoa atu iā te outou mea uma na ou fa'alogoa ai i lo'u Tamā.

O faigā-uo e fa'amaoni ona ola i le fa'afesaga'i lelei, o le manatu autū lenā o lenei vaiaso. O le asō, o le ā tatou va'ava'ai ai i ni fa'ata'ita'iga na tu'uina mai e Iesu mo i tatou.

I le faitauga o le asō, o se vaega o upu taumavae a Iesu i le tusi o Ioane. Ua matuā sasa'a atoa mai i le fetalaiga a Iesu lana fa'asinoga ma le fa'amoemoe autū o faigā-uo. O le alofa i lau uo, e va'aia lea i le ofoina atu o lou ola mo lau uo. E ta'ele lea i le fa'agaogaoina, gaua'i i ai ma le lē solomuli, ae maise fo'i o nisi taimi e matuā tigā. O le maliu o Iesu i luga o le satauro, o lona auai lea i le mafutaga e fa'ailoa mai ai le alāfua ma le fa'amoemoe o faigā-uo ua ia fa'ata'ita'i mai. O se fa'agaogaoina ma fa'amativaina e Iesu o ia lava, o se fa'agae'etiaga mo tagata uma, ae maise o le matagofie o le toe fa'ailoa mai i le pese i le tusi iā Filipi- 2:5-11. O le fa'agaogaoina atoa e Iesu o lona tagata, e tatau ona tumau i o tatou mafaufau ma agaga, pe afai tatou te sa'ili i faigā-uo moni ma fa'amaoni.

O fuaiupu fo'i o le asō, o lo'o fa'asino fo'i i le fa'amoemoe o se faigā-uo, o se fa'ata o lo'o va'aia ai le feuluuluta'i o se mafutaga fa'ale-uo a Iesu, na tofu sao i ai o ia ma lona Tamā. E tutusa lea ma se tamaitiiti matua ma ona mātua o lo'o fa'afailleina, puipuia, ma ta'ita'iina i tausaga o le tuputupu a'e agai ina tagata matua. E o'o lava fo'i i mafutaga fa'alē-uo a tupulaga i aso nei, o se fa'ailoga lava lea e tutusa i le va'ai lea, o le mafutaga feuluuluta'i a tagata matutua. O le fa'amoemoe ua i tala atu o le fa'agaogaoina o mātua e 'aputiputi le alofa ma le amanaiaina ma le va'ava'aia o le tamaitiiti. O le feuluulutai o le alofa i faigā-uo, ua i ai lea i mātua, o faigā-uo fou ma pa'aga, o ta'ito'alua ma fanau e o'o lava i pepe. O le ola ua sasa'a mai ma sasa'a atu, atoa ma le feuluuluta'i o le alofa, o itu ia e lua o le tupe e tasi, ua tatou ta'ua o faigā-uo.

Tatalo: A'oa'o mai a'u le Alii e, ia ave'a ma uo i alāfua ua e fa'aali mai, uo i lo'u to'alua, o la'u fanau, o o'u tuāo'i ma le matou

fā'apopotoga. I lea auala, ia suia ai a'u ia avea ma vaega o au fesuia'iga o lo'o i ai i le lalolagi. **Amene.**

Mafaufauga Loloto: E fa'aapefa ona avea lenei alāfua o faigā-uo ia moni ma fa'amaoni i faigā-uo i luga o feso'ota'iga fa'aneionapo?

O TALA MAI FA'AMASINO- FA'AEAINA MA LE MANUMALŌ

Stories from Judges- Triumph ana Victory.

(Saunia: Anthony Loke.)

Aso Sa, Oketopa 15, 2017. “O le augani a le afafine o Kalepo.”

Tusi Faitau: Fa'amasino- 1: 9-15.

Matua (f: 15): *“Ona fai atu lea o ia iā te ia, ia e alofa mai iā te a'u; auā na e avane iā te a'u le fanua i le itu i toga; ia e foa'i mai fo'i ma ni vaipuna. Ona avatu ai lea e Kalepo iā te ia o vaipuna o i luga atoa ma vaipuna o i lalo.”*

O le tele o aganu'u sa i ai, o afafine e lē aloa'ia o latou tulaga e pei o atali'i. I totonu o Saina i aso ua leva, na fausia ai se tulafono e ta'ua o le 'one child policy' e pulea ai ma fa'atonutonu le si'itia o tamaiti fananau mai. O mātua e i ai so lā afafine, e mafai ona toe taumafai fa'alua i le fa'amoemoe ia fanau mai se atali'i. E le'i mamao atu ona mapu le malō o Saina mai le latou tulafono lea, ma ua fa'atagaina nei mātua ina ia to'alua tamaiti i le aiga. E mafai fo'i ona tatou va'aia le tulaga lea iā Isaraelu anamua, o le lē tutusa o afafine ma atali'i, po'o le aloa'ia o atali'i nai lo o afafine. (Numera: 27). I le gasologa mai o augā-tamā, o afafine e leai sa latou vaega i le fa'agasologa o augā-tamā.

O le tala i le asō, o le tu'uina atu lea e Kalepo o lona afafine o Akesa e fai ma ava a Otinielu le atali'i o Kinasa, o le uso laititi lea o Kalepo, o le tau lea po'o le tau o Otinielu i lona aea o 'au tau a Kiriata-sapera. (o le igoa anamua o Tiperi). E ui i le maua e lona to'alua o se malō fou, o se fa'atoafaiavā ma se fa'aipoipoga lelei, o Akesa pe ā fa'atusatusa i ai na ia maua se vaega itiiti mai lona tamā e fai ma meaalofa e tu'uina atu mo lona to'alua o Otinielu, o le fanua matūtū o

Nekapa.(Negeb). Na ia alu ane ma fai atu i lona tamā ina ia avatu mo ia se isi meaalofa e sili atu, o se vaipuna ina ia fua feti’iti’i ai le fanua i le itu i toga.(Nekapa).

O le gaioga a Akesa, ua atagia mai ai o se taumafaiga ina ia suia ai faiga fa’apolokiki a lona tamā, e pei ona ia lē taliaina ai le fanua na ofoina atu e lona tamā mo ia ma lona to’alua, i lona fesili atu iā te ia i luma o tagata a ua lē fa’alililoina. I lea faiga, na manatu ai Kalepo e tatau lava ona tali sa’o i lona afafine ina ia lavea’iina ai le fesāga’iga. O lea ua maua ai e Otinielu mea e sili atu mai iā Kalepo ona o lona to’alua atamai ma meaalofa na tu’uina atu mo lona to’alua e ala i le fa’aipoipoga.

Tatalo: Le Atua e, ua e a’oa’oina fo’i i matou ina ia matou tautatala e maua ai fa’amanuiaga. Fesoasoani mai ina ia matou fesili ma le tonu, ina ia matou maua ai fa’amanuiaga ua e finagalo i ai e tu’uina mai mo i matou. **Amene.**

Aso Gafua, Oketopa 16, 2017. “O le sao o Euta.”

Tusi Faitau- Fa’amasino-3: 12-30.

Matua (f: 15): *“A ua alalaga atu le fanauga a Isaraelu i le Alii, ona fa’atuina ai lea e le Alii o le fa’aola mo i latou, o Euta lea le atalii o Kira o le sā Peniamā, o le tagata tauagavale ia, ua auina o ia e le fanauga a Isaraelu e momoli le taulaga iā Ekelona le tupu o Moapi.”*

O tala mai le tusi o Fa’amasino, o loo mulimuli lava i se fa’agasologa ua fa’atulagaina, e pei o le agasala o le ifo i tupua, o le ola taotaomia, o le oi ma le tagi mo se lavea’iina, o le auina mai o se fa’amasino e fa’aola mo i latou, ma ia mapu ma malōlō lelei i le laueleele.

O le ata lea o le soifuaga na masani ai tagata ia, ina ua agasala i le Atua, ma ua avea ai lava o se fa’ataamilosaga o fa’afitauli tutupu i o latou olaga, le fofō o le isi faigatā, ae tupu mai ai le isi faigatā e sili atu nai lō le amataga. Peita’i, e ui lava ina lavea’iina mai i latou e le Atua mai le olaga taotaomia i o latou fili, e le’i mafai ai lava ona o ese mai le olaga to’ilalo i le agasala. O le fa’aola muamua na ta’ua o le fa’amasino mo i latou, o Otinielu, ma sa ia faia lelei le mea na mafaufauina mo ia e fa’atinoina. Ae ui i lea, o le fa’asolo ane o augā-

fa'amasino, na va'aia ai le paū o le fa'atinoga, auā e tofu lava le tagata ia ma ona vaivaiga ma ona lē atoatoa.

O le fa'amasino lona lua o Euta, na ia fa'aaogāina togafiti e taumafai malosi ai ina ia maua le manumalō. Muamua, ua taua e le tusitala, o Euta o le tagata tauagavale. O lona uiga, na a'oa'oina Euta ia popoto uma ona lima e lua, ia poto fo'i e fa'aaogā le lima agavale. O le ute lea o le tala. Afai o ia o le tagata tauagavale, na te nanāina ma fusi lana pelu i lalo o lona vae taumatau. E masani ona mafaufau fitafita o le tagata e lima taumatau, e nanā ma fusi lana pelu i lalo o le vae agavale, ae misi ai le iloa o le 'aupega o lo'o fusia i lalo o le vae taumatau. O lona lua, na fa'afoliga Euta o se feau fa'alilolilo mai le Atua, e nā o fofoga lava o le tupu e tu'uina atu i ai. O lona auala tonu lava fo'i lea na momoli atu ai lona fasiotia o le tupu o Moapi na o lāua lava, ma mafai ai ona ia sola ese mai le iloaina e tagata. I le fa'aaogāina ai o togafiti, na mafai ai ona o'o atu Euta i tafatafa o le tupu o Ekelona ma fa'ao'o atu i ai le oti mata'utia e ala i lana pelu na ia saunia.

O le manumalō ea e maua na o ala fa'atogafiti? O le manumalō ea i so'o se uiga ma so'o se fa'atinoga, e sa'o e talia e le Atua?

Tatalo: Le Atua e, e mana'omia ea ona ou liliu atu i faiga fa'atogafiti ina ia maua ai lo'u manumalō? E mafai ea ona ou lē talitonuina oe i lou olaga? Le Alii e, fa'aali maia ou ala uma iā te a'u i mea uma ou te faia. **Amene.**

Mafaufauga Loloto: O le i'uga ea e fa'amaonia ai le fa'atinoga, po'o le fa'atinoga e fa'amaonia ai le i'uga?

Aso Lua, Oketopa 17, 2017. “O Tepora le perofeta fafine.”

Tusi Faitau- Fa'amasino: 4: 4-22.

Matua (f: 9): *“Ua fai atu o ia, ta te o lava ma oe; a e peitai e leai sou vi'iga i lenei mea e te alu ai oe; auā e tu'uina atu e le Alii o Sesera i le lima o le fafine.”*

Na oti Euta, ae toe amio leaga fo'i le nu'u o Isaraelu i luma o le Atua, ona tu'uina atu ai lea o i latou e le Alii i lima o lāpino le tupu o

Kanana, ma lana ta'ita'i-'au o Sesera latou te fa'apologaina Isaraelu. Sa fa'asilisiliina le militeri a tagata Kanana i le faitau aofa'i o kariota solofanua e iva selau.

Ina ua fa'atulai e le Atua le fa'amasino lona fa e lavea'iina ona tagata, ua lē o se tamāloa, a'o le fafine ua igoa iā Tepora. O le ā le mea ua tupu i tamāloa? Ua leai ea se tamāloa e agava'a e avea ma fa'amasino, e pei ona i ai le fa'agasologa mai le muamua, lua ma le tolu? A'o lea ua amata e Tepora le fa'amalosia o Parako e avea ma ta'ita'i-'au o le 'autau a Isaraelu, e tau fa'asaga atu iā Sesera i tafatafane o le vaitafe o Kisona. E pei o fitafita lelei uma, na lagona e Parako e i ai le mea sesē i le filifilia o le laufanua e tau ai le taua. E lē mafai e se to'atasi ona tau atu i se vaegā 'au to'atele o kariota solofanua ma tagata tau e anoanoa'i i se laueleele laugatasi, ua nā o le foa'iina o le ola. Na iloa fo'i e Parako, e faigatā ona fa'apopototo ituaiga o le nu'u e fausia ai se 'autau e o i le taua, pe afai e lē i ai se sui va'aia o le Atua, o se fa'amasino tamāloa.

O le tali a Tepora iā Parako, na ia te'ena ai le manatu o Parako, auā o le manumalō, e lē malō ona o se tamāloa, a'o se isi fafine. O se matuā tui malosi lea i lagona o tamāloa. Peita'i, na moni ma fa'amaoni lava, o le tinā o Iāeli le avā a Kaveru, na maua ai le manumalō, e ala i lona fasiotia o Sesera i le fao o lona fale ie, ma le samala na tutu'i atu i le manifinifi o Sesera, ae lē o se pelu po'o se kariota. Sa ia fa'atagaina le sola'aga a Sesera i lona fale ie, ma avatu i ai le susu mafanafana, ma tu'uina atu loa iā te ia le moe e fa'avavau. O se tulaga e lē tatau ona feoti ai le to'atele, o lima o se fafine e lē tulagā i le faitauga o fafine. O le manumalō lona fa, na ala mai i auala fa'atino a fafine e fa'atumuina i mafauauga na fa'ataoto ai le amataga o le manumalō mo le nu'u, ina ua lē mafai ona faia e tamāloa.

Tatalo: Le Atua e, fesoasoani iā i matou ia matou manatua lava, o le fesoasoani e ala mai i lau Afio i so'o taimi, ma ia matou manatua ai, e tatau lava ona fa'atino la matou vaega. **Amene.**

Mafauauga Loloto: O le tusi o Fa'amasino o le ā tatou va'ava'ai pea i ai, o le tusi o le fa'amaligi toto. O le ā se mea o le ā e faia i le feso'ota'iga o le Atua ma le fa'amaligi toto ua uma ona tatou maua?

Aso Lulu, Oketopa, 18, 2017. “O le vala’auina o Kitiona.”

Tusi Faitau- Fa’amasino: 6: 11-16, 34- 40.

Matua (f: 15): *“Ona fa’apea atu ai lea o ia iā te ia, E! le Alii e, ou te lavea’iina Isaraelu i ni a? fa’auta mai, ua tōpito ona fa’atauva’a lo’u aiga i Manase; o a’u fo’i, o le aupito itiiti i le aiga o lo’u tamā.”*

O le fa’amasino lona lima, o Kitiona. O ia o se tagata e tete’e ina ia fa’amaonia muamua se mea. Ina ua fa’aali muamua i ai le Atua iā Kitiona, na ia te’ena ma lē talitonu o ia ua filifilia e le Atua e lavea’iina Isaraelu (f:15). O lana sisi’o, e tutusa lava ma Mose, na fa’avae i lona talitonuga, o ia e vaivai ma o ia fo’i o le aupito itiiti o le aiga, a’o le tōpito i ituaiga uma o Isaraelu. Na fa’amaotinoia i ai e le Atua iā Kitiona, o le ā i ai pea o ia iā te ia, o le mea lenā e lē faia’ina ai o ia i le fa’amoemoe o lona vala’auina. O le talosaga a Kitiona i se fa’aailoga mai le Atua, ua ato lona fa’ataunu’uina. O le agelu a le Atua na pa’i ane i tufa’aga ma le areto e lē fa’afefeteina, ona alu a’e ai lea o le afi nai le papa ma susunuina ai. Ua tatou manatu nei o le ā usita’i ma le matuā fa’atuatua atoatoa Kitiona i le vala’au a le Atua, ma amata loa lana galuega lavea’i.

I fuaiupu e 34-35, ua tatou faitauina ai le fa’apotopotoina e Kitiona o lana ‘autau e sauni e tau le taua. Ae i fuaiupu o lo’o soso’o ane ai, ua fa’aauau pea ona tofotofa e Kitiona le Atua. Ua ia mana’o ia lē tasi se fa’aailoga a ia lua. O le lona lua, e foliga o le toe feliu’ina o le fa’aailoga muamua. Afai e na o le fulufulu mamoe e i ai le sau, ae matūtū le laueleele uma, ona iloa ai lea e fa’aolaina Isaraelu e Kitiona. E ui lava ina fa’atinoina e le Atua nei fa’aailoga i luma o Kitiona, e le’i atoatoa ai lava le fa’amalieina o Kitiona, ma ia toe talosagaina ai le toe fa’atinoina o le fa’aailoga lona lua ae feliu’i fo’i. Ia matūtū le fulufulu mamoe, ā ia i ai le sau i le laueleele.

Fa’amata na musu Kitiona i se i’uga e pei o Iefata? (mataupu e 11). Fa’amata na mana’o i le tele o fa’amaoniga mai le Atua, o se tulaga e tauia ai pe ā manumalō? Vaganā ua ia maua i le taimi nei le fa’aailoga lona tolu, fa’amata na ta’ita’iina e Kitiona ona tagata i le manumalō? E fa’afia ni taimi tatou te mana’omia, tatou te talitonu ai i le Atua ma ana folafolaga mo i tatou?

Tatalo: Le Atua e, ua ou talitonu, ā ia e fesoasoani mai i lo’u lē talitonu. **Amene.**

Mafaufauga Loloto: O le lē manatu mamafa i le finagalo o le Atua e seāseā ona tu’u sa’o. O fa’apefea ona e manatu i le finagalo o le Atua i lou olaga?

Aso Tofi, Oketopa 19, 2017. “O le filifiliga o tagata tau.”

Tusi Faitau- Fa’amasino: 7: 1- 8.

Matua (f:7): *“Ona fetalai mai ai lea o le Alii iā Kitiona, o le tolu selau o tagata e na etoeto i le vai, ou te fa’aola ai iā te outou, ma tu’uina atu Mitiana i lou lima; a o le nu’u uma ua totoe, ia ta’itasi ma alu i lona nu’u.”*

Ua sauni mea uma mo le amataga o le taua. Ua fa’apopotoina e Kitiona lana ‘autau o ali’i e tolusefulu ma le lua o afe, mai ituaiga o Apieseru, ma isi ituaiga e fa, o Manase, Asera, Sepulona, ma Nafatali. Peita’i, na fa’alavelaveina e le Atua lea to’atele o le ‘autau, ona ua to’atele nauā, ina nei mitamita tagata ma manatu o lō latou malosi na maua ai le manumalō. O le filiga muamua o le ‘autau na fa’aitiitia ai i le sefulu afe o tagata. O le taimi lea na finagalo ai le Atua, o le ā fa’atulaga le tuāo’i e filifilia ai se aofa’i e tauina le taua, ia nā o tagata lava ua agava’a. Ua ave fitafita i le vaitafe, o i latou uma e to’atuli i lalo ma feinu, ia tu’u’ese’eseina ma i latou o lo’o etoeto i le suāvai. Masalo o i latou na inu etoeto i le vai, o lo’o fa’aalia mai ai le sili atu o lō latou nofo sauni i itu uma, o lona uiga ua matuā saunia lava e fa’atino le taua i so’o se taimi faigatā.

O i’ina na tu’ua ai na o le toluselau o tamāloloa iā Kitiona. I le itu lea, ua mafai ai e le tagata faitau ona fa’aילו lona tagata fa’atasi ma Kitiona. O le ta’ita’i-‘au lauילו e mana’o ia aumai se ‘autau to’atele e tauina le taua, ua matuā fa’aitiitia lava lana vaegā-‘au i se tulaga e lagona ai le leai o se fa’amoemoe mo se manumalō e maua i le to’aitiiti. Peita’i, o le manumalō i le taua lea, na maua i le fa’aitiitia o le aofa’i o tagata. (f: 22- 23).

Fa’amata o le auala lea e a’oa’oina ai e le Atua ona tagata lauילו e tofotofa iā te ia? E lē afaina po’o le ā le tele o fa’amaoniga na ia

aumaia, o Kitiona e tatau lava fa'atosinaina i taimi uma. O le fa'aitiitia o lana 'autau, ua fa'aalia manino mai ai, o le Atua e manumalō ai i so'o se faigatā ina ia lavea'iina ai ona tagata mai le fili. O le manumalō, o le mea patino lava lea i le Atua.

Tatalo: Le Atua e, o lau afio iā i matou, matou te tu'uina atu ai nā o se to'aafē e tau ma le fili. **Amene.**

Mafaufauga Loloto: O tu'uina atu ea lo tatou talitonu ma le fa'atuatua i le aofo'i o fuainumera, po'o le Atua e to'atasi?

Aso Faraile, Oketopa 20, 2017. “Ua fa'atoilaloina e Kitiona o Mitiana.”

Tusi Faitau- Fa'amasino: 7: 9- 22.

Matua (f: 15): *“Ua fa'alogo Kitiona i le tala o le miti ma lona fa'amatalaga, ona ifo ai lea o ia i le Atua. Ua toe fo'i atu i le itu taua a Isaraelu, ua ia fa'apea atu ai, Tutū mai ia, auā ua tu'uina mai i ō outou lima e le Alii o le itu taua a Mitiana.”*

Ua fa'aitiitia lava le 'autau a Kitiona i le nā o le toluselau lava tamāloloa. Peita'i, na fai e le Atua le tautoga iā Kitiona, o le ā tu'uina atu lava Mitiana i lona lima, e ui ina nā o le toluselau le 'autau. (f:7). Ae le'i ave lenā ma auala e ave'ese ai le lē mautonu pe fa'amalieina ai Kitiona i le maua o le manumalo. Na fa'atonuina e le Atua Kitiona ina ia alu fa'alilolilo i le togālauapi e fa'alogo manino ai, ina ia iloa ai o ā mea o lo'o fetautalatalaa'i ai Mitiana, e mulimuli ane ona malosi ai lea o ia e alu ifo i le taua. Na silafia e le Atua le fefe o Kitiona e alu nā o ia, ona ia fa'ailoa lea iā te ia ē o ma Fora lana auuana. Na laua ulufale i le togālauapi ma fa'alogoina mamao atu ai le tasi fitafita Mitiana o fa'amatalaina lana miti. E ala i le miti a le fili ma le fa'amatalaina o le uiga o le miti na lā fa'alogo i ai, na fa'aaogaina ai e le Atua tagata e lē o ni Isaraelu e fai ma leo o le mautinoa iā Kitiona, o mea uma lava, ua i lalo o le pule'aga a le Atua. E foliga mai ua tele atu le fa'atuatua o le fili i le Atua, i lō le itu taua a Isaraelu.

I le fa'amautinoaina mulimuli lenā iā Kitiona, na ia fo'i ai i lana 'autau ma vaevae i vaega e tolu, ma sauni atu ala e osofa'i ai le togālauapi a Mitiana. E ofoofogia le osofa'iga a Isaraelu auā na tupu

ai le fenumia'i o le itu taua a le fili. O le fa'aaogaina o sulu ua mumū, o le ta'eina o kate, ma le ilia o pu ua si'o ai le togālauapi, na matuā sosola ma sulu solo ai le fili i lo latou fenumia'i ua pogisā tele. O se fasi tele na fa'atagaina ai e le Atua Kitiona e fa'atoilaloina ai le fili to'atele.

E fou iā i tatou le mea moni lenei, e fa'aauauina pea ona fa'aaogaina e le Atua lana tagata ua ia filifilia ma valaauina, e ui lava ina mana'o pea i ni fa'ailoga e fa'amaonia ai se mea. I le tele lava fo'i o taimi, tatou te lē 'ese'ese lava ma Kitiona.

Tatalo: Le Atua e, fesoasoani mai iā te a'u ina ia ou lē fa'amasani e faia ni sisi'o, i lo'u lē fa'atagaina ma talitonuina Oe i totonu iā te a'u.
Amene.

Mafaufauga Loloto: O Mose e tutusa ma Kitiona i le sisi'o pea ona o le lē talitonu atoatoa i le Atua. O ai nisi tagata o le Tusi Paia fa'apea e o'o ane i lou mafaufau?

Aso Toonai, Oketopa 21, 2017. “Ua fōua e Apimeleko le pule.”
Tusi Faitau- Fa'amasino: 9: 1-21.

Matua (f: 16): *“O lenei, afai ua fa'amaoni ma ua tonu la outou amio, ina ua outou tofia o Apimeleko e fai ma tupu; afai fo'i ua outou agalelei atu iā Ierupaala ma lona aiga, ma ua outou faia iā te ia e tusa ma mea na ia faia...”*

O Kitiona, e iloa fo'i i le isi ona igoa o Ierupa'ala, sa iā te ia se aiga to'atele e fitusefulu atali'i. O isi ona atali'i o Apimeleka, e mai lana auauna fafine mai le nu'u o Sekema. O le uiga o le igoa “Apimeleko” o le “o lou tamā o le tupu.” Fa'amata o le auala lea na mana'o i ai Kitiona ina ua maliu, o lona atali'i e fiafia i ai o le ā aveva ma tupu e sui tulaga iā te ia? Peita'i, o fa'amasino o Isaraelu, e lē faia fa'a-aiga. Afai e maliu se fa'amasino, e fa'atuina e le Atua se isi fa'amasino e tali atu i le fili. E fa'amaonia i'inei le lē fa'atuatua o tagata i le Atua, ma ua toe fo'i lava i le fa'ata'amilosaga mata'utia o le fa'agaloina lea o le lavea'iina o i latou e le Atua i le tuana'i. I le mataupu e 8:35, o lo'o fa'ailoa mai ai e le tusitala le isi fa'amanatu o lo latou lē fa'atuatua, auā o lea ua latou lē manatua fo'i le agalelei o Kitiona i le

lavea'iina o i latou, a'o lea ua matuā lē amiotonu le mea ua faia i le aiga o Kitiona.

O Apimeleko, e itiiti se avanoa e mafai ai ona avea o le isi ta'ita'i e soso'o iā Kitiona, auā o lea e fitusefulu isi ona uso e i luma atu o ia. I lona lē fa'amoemoe i le Atua, na ia fa'aoleoleina ai i ana lava upu ma tala tagata o Sekema, o tagata o le aiga o lona tinā e fa'apea, e sili atu le to'atasi o le tupu i lō le fitusefulu. Na ia maua tagata uma o Sekema ma 'au'au fa'atasi mai i lona mana'o, ona latou fasiotia lea o ona uso e fitusefulu i se oti mata'utia, o luga o le ma'a e tasi, vaganā le to'atasi na sola ese. Ona fa'alauiloa ai lea o Apimeleko, o le tupu o Sekema. O le atalii la'iitiiti o Iotama, na sola ese ma ia alaga atu I tagata o Sekema, se fa'ataoto o le ā fa'aalia ai le amiotonu I lo latou fasiotia o ona uso. O le a'ano moni o le fa'ataoto, o le ta'uina atu lea o le paū o Apimeleko ma le ave'esea o ia mai le tulaga tupu ma ana mea uma.

O le fasiotia e le uso o le isi uso ina ia maua ai le tulaga aloa'ia ma le paoa malosi? E le ta'atele lea mea, peita'I, ua masani tagata I auala pi'opi'o e maua ai le paoa ma tumau ai I lenā paoa. O fea o I ai le amiotonu? O lo'o I ai lava le tagata e to'atasi o le a fesili I lea mea.

Tatalo: Le Atua e, o lo'o tagi mai le eleele le toto o I latou e mamā mo le amiotonu. Se'I e fa'afogaina lo latou tagi. **Amene.**

Mafaufauga Loloto: O le tali fa'avae a le 'au-Kerisiano ma Iutaia pe ā le o'o mai le amiotonu I le lalolagi, o le amiotonu e mautinoa e maua pe ā uma le ola nei. O le ā sau mea o le ā fai I lea manatu?

O TALA MAI FA'AMASINO- OTI MA MALA.

Stories from Judges- Death ana Disaster.

(Saunia: Alexandra Wright.)

Aso Sa, Oketopa 22, 2017. “O le oti o Apimeleko.”

Tusi Faitau- Fa'amasino: 9: 22-29, 50-56.

Matua (ff: 53-54): *“Ona lafo lea e le tasi fafine o le fasi ma'aolo i luga o le ulu o Apimeleko, ua momomo ai lona ulu. Ona valaau loa*

lea o ia i le taule'ale'a o lona soātau, ua fai atu iā te ia, se'i mai ia lau pelu, ma e fa'aoti iā te a'u, ne'i latou fa'apea iā te a'u, o le fafine lē na fasiotia ai o ia. Ona tutu'i ai lea iā te ia e lona taule'ale'a, ua oti ai."

E lua ituaiga ta'ita'i i le Tusi o Fa'amasino. Muamua: o tagata ta'uta'ua e i ai le paoa uiga ese fa'amiliteri na latou lavea'iina ai Isaraelu mai le olopalaina, tagata e mamafi i le 'o a'u.' O le paoa e masani i le fa'amaligi toto ma le fasioti tagata mata'utia ma le matagā. Lua: O tagata fa'atamala iā te ia lava, e masani ona ta'ita'iina e lagona o le tu'inanau tele i tupe, o le tauimasui i se tulaga e oti ai le isi, atoa ma le fia inu pea i le manumalō.

O Apimeleko, lē na ia fasiotia ona uso e fitusefulu, e i le vaega o i latou e lē alolofa ma fa'alumaina e tagata, e lē fa'aaloologia ma e tumu i le maasiasi, o le tagata na sae'eseina mea uma sa iā te ia. O le uiga o lona igoa, 'o lou tamā o le tupu' o se ta'u e fa'atautu i lona malosi ma lona soifua malōlōina lelei, na tu'uina atu iā te ia ina ua lē taliaina e Kitiona le pale o le tupu, a'o ia na taliaina le avea ma tupu. E aliali mai i le uiga o lona igoa, e matuā leai se feso'ota'iga fa'ale-tagata ma lona Tamā i le lagi. O le mea moni, ua fa'aluaina ma fāoa e Apimeleko le tulaga tupu o le Atua. E lē o le Atua na fa'atuina o ia e fai ma tupu, a'o ia lava e to'atasi na fia atua mo Isaraelu i le nā o le tolu tausaga. E fa lava taua na faia ma le leai o se alofa i tagata, na pau'u ai tagata e to'atele fa'atasi ma Apimeleko.

O lona fa'asalaga na tatau lelei mo ia, o lona oti ina ua lafo ifo e le tasi fafine se fasi ma'aolo i luga o lona ulu ma momomo ai. O le fua fa'atautau lea na fuaina ai e le Atua le oti o Apimeleko, o se fa'asalaga o lona fasiotia o ona uso i luga o le "ma'a e tasi." (f:9:5). E sili atu ona leaga mo Apimeleko, ona o le fafine na manu'a tigāina ai o ia, o le ala lea o lona valaau i le taule'ale'a o lona soātau, ina ia tutu'i atu o ia i lana pelu ia oti ai, e 'alo ese mai ai i le ta'uvalea ma le maasiasi, o lona malosi ma le maualuga o le tane, ua fa'amuta e le fafine.

Tatalo: Le Atua fa'avavau e, a'oa'oina i matou i au a'oa'oga, ma ia avea i matou o tagata fa'amaoni i au tulafono. Ia lē mafai, lē mafai

lava ona matou ioe atu i le tiāpolo, pe loto atu i fa'aosoosoga po'o le manatu fa'apito. **Amene.**

Aso Gafua, Oketopa 23, 2017. “O le valaauina o Iefata.”

Tusi Faitau- Fa'amasino: 11: 1-11.

Matua (ff:1-2): *“O Iefata le Kiliata, o le toa malosi lava ia, o le tama a le fafine talitane, na fanaua Iefata e Kiliata. Na fanau mai le avā a Kiliata o tama tane iā te ia; ua matutua tama tane a le fafine, ona latou tulia lea o Iefata, ma latou fai atu iā te ia, e te lē maua se tofi i le aiga o lō matou tamā, auā o oe le tama a le fafine ese.”*

O le fanau mai o Iefata i le fafine talitane, na avea ai o ia ma tagata 'ese i ona lava uso. E leai sona tofi i le aiga ma fa'amalosia ai ona tulia'ese. Na alu 'ese mai le aiga ma feoa'i fa'atasi ai ma tagata fa'atauva'a e fai ma ona aiga. O tagata e mo'omo'o i so'o se mea e va'ai i ai, ona fiafia lava lea i ai. Peita'i, o Iefata fo'i, o le toa malosi ma tu matilatila lona iloa i taua fa'amiliteri. Ina ua sauni le taua a Isaraelu ma tagata o Amoni, o toea'iina o Kiliata na o ane ia Iefata, o i latou tonu lava ia na tulia ma te'ena Iefata mai lona aiga. O le latou aio'iga ia toe fo'i atu Iefata e fai ma ta'ita'i-'au ma o latou ali'i sili, i le taua ma Amoni. O le tali a Iefata, afai e tu'uina mai e le Atua sā Amoni i lo'u lima, e fai ea a'u ma o outou ta'ita'i ma le ali'i sili?

Ua tatou maua i'inei le tama ua fa'amaufa'ailogaina e lona fanau mai ma lona tala'aga. Te'ena e le aiga ma lona ituaiga, tosina i ituaiga maualalo ma fa'atauva'a, e ta'ua e le Tusi Paia Eperu o “reikim” o lona uiga o le “gaogao”(empty). Aisea na le tula'i ai Iefata e fesili atu mo sana vaega e maua mai lona pi'itaga i lona tamā? Ua fa'amanatu mai mo i tatou i'inei afafine o Selofeata i le tusi o Numera, e le'i fefefe e fa'amalosi la latou finau i se latou vaega o mea-totino a lo latou tamā. (27:1-11), e ui ina lē taulia i le gafa ona o i latou o tinā.

O ā ni lagona e lagonaina e se tagata ua ta'u'ese-ina mai le li'o o le aiga? Ae ā le tuli'esea ma taula atu ai fa'alogona o se tasi ua leai sona fa'asinomaga? I le tele o seneturi, na avea ai tagata Isaraelu ma tagata 'ese na fa'aunu'ua, o tagata 'ese i lau'ele'ele na nonofo ai, e le'i mana'omia i latou, fa'ate'aina ma olopalaina. Peita'i, i le tatou Tusi Paia ma ā tatou tapuaiga, i lo tatou lagona mausalī i o tatou

talafa'asolopito ma le tāua ō o tatou aogā o lo'ō taofiina ai i tatou, ua tatou maua ai auala e ofoina atu ai fua lelei ō o tatou tupu'aga i le fa'amalōlōina o le lalolagi, ua avea ai tatou ma sona vaega.

Tatalo: Aumai mo i matou le lototele le Alii e, e fa'atumauiina ai lo matou ola ai i le lalolagi pogisā, ina ia matou iloa atu ai se fa'amoemoe ola o se feso'ota'iga loloto o tagata uma, ma ia nonofo fiafia i le filemū o lau Afio. **Amene.**

Mafaufauga Loloto: E fa'apefea ona tatou atia'e se lagona o le auai atu i so'o se mea ma le lē popole, o i tatou ta'ito'atasi e i ai se mea aogā e ofoina atu mo le ola malōlōina o se sosaiete?

Aso Lua, Oketopa 24, 2017. “Tautoga tu'ulafoa'i a Iefata.”

Tusi Faitau- Fa'amasino: 11: 29-40.

Matua (ff: 34-35): *“Ona alu atu lea o Iefata i Mesepe i lona fale; fa'auta fo'i, o lona afafine ua ulufafo mai e fa'afetaia'i iā te ia ma topa ma siva; ua leai sona atalii po o se afafine, ua na o ia lava. Ua iloa atu o ia, ona saei lea e ia ona ofu, ua fai atu, Aue! Lo'u afafine e, ua e matuā fa'atigāina a'u; o lo'o ua e fa'atasi ma e fa'aatuatuvale iā te a'u; o a'u fo'i, ua ou tautala atu i le Alii, ou te lē mafai ona fa'afō'i mai la'u upu.”*

O le afafine o Iefata, e lē o tāua sona igoa, o le teineitiiti e leai sona uso po'o sona tuagane. A o fea sona tinā? A'o le igoa lea na fa'aigoa ai e Iefata o ia, 'o le teineitiiti na ia matuā fa'atigā i lona tamā.' Na tupu a'e i se aiga e talenia i topa ma siva. I lana lava va'ai, o ia e tutusa ma Miriama le tuagane o Mose, na ia aveina le topa i lona lima ma o atu fa'atasi ma fafine na mulimuli iā te ia i lana siva ma pese. Ina ua maua tala o le fa'atoilaloina e lona tamā o Amoni a o lei taunuu ane, na ia ulufafo 'ese mai le fale e fa'afetaia'i le toa malosi. E mamā o ia i le tautoga mata'utia na faia e lona tamā i le Atua, “afai e tu'uina atu e le Atua le fanauga a Amoni i lona lima, ona fai lea mo le Alii o sē na te ulufafo i faitotoa o lo'u fale e fa'afetaia'i iā te a'u; i lo'u fo'i atu ma le manuia nai le fanauga a Amoni, pe ou te fai ai le taulaga mu.”

Peita'i, ua ia va'ai i lea feiloa'iga, e lē o le atoatoa o le alofa i lona talavou taupou e mamā, a'o se matuā tigā loloto ma ogaoga lava le fa'afitauli mo ia. O le tautoga e tatau ona fa'aaloaloga, ma o lo'o iloa e le teineitiiti, e pei fo'i ona iloa e lona tamā, e lē o se mea e mafai ona toe fa'afo'i mai. Pe ā fa'atusatusa le teineitiiti ma lona tamā a'o talavou, ona iloa lea o le 'ese'esega lea, ma i latou na lē mafai ona o e tau le taua ma Amoni, na o ia lava. O Iefata e maliu mai e fai ma ta'ita'i-'au ma ali'i iā i latou, a'o tuli'esea o ia i lona talavou e lona aiga. A o lona afafine, na o ma ana uo i le mauga e ifoifo ma fetagisi, ma fa'anoanoa loloto i lona teine taupou, na taofia o ia i o latou mafaufauga ma fa'ailogaina lona olaga i pese o auega mo aso e fa i le tausaga.

E pei o le auega a Tavita mo Ionatana, na matuā fa'anoanoa ona o lona uso, o le alofa ua matagofie e sili atu i lo le alofa o tinā. O uo a le teineitiiti lea, ua a'oa'o mai ai mo i tatou e fa'atatau i le alofa moni e fa'amaoni o faigā-uo, e fa'amafanafanaina ma fa'amalosia i tatou i taimi o le atuatuva le ma le fa'anoanoa.

Tatalo: Aua ne'i fa'amalosia a'u e tu'ua lau Afio, pe liliu ese mai le mulimuli atu iā te oe. O mea uma e te afio i ai, ou te alu fo'i i ai, o o'u tagata ia avea ma ou tagata, o oe le Atua ia fai ma o'u Atua. **Amene.**

Mafaufauga Loloto: Afai tatou te leiloloa i o tatou ala, ona leai lea o se mafanafana ma se alofa i o tatou olaga. Ona tatou fesili lea, e fa'apefea ona tatou ava ma fa'atuatuaina i a tatou uo?

Aso Lulu, Oketopa 25, 2017. "O le fanau mai o Samasoni."

Tusi Faitau- Fa'amasino- 13: 1-24.

Matua (ff:4-5): *"O lenei, ia e fa'aeteete; ne'i e inu uaina po o se 'ava, aua fo'i e te 'ai se mea leaga; auā fa'auta, o le ā to oe, e te fanau fo'i se tama tane; e lē o'o se tafī i lona ulu, auā e faia le tama ma naseri i le Atua, e afua mai ina fanau; o ia fo'i e afua mai ona fa'aola iā Isaraelu ai lima o Filisitia."*

O le to'alua o Manoa e pa e lē fanau, o le ala lea o le leai o sana fanau. E tusa ai ma le fa'aaliga a le agelu, e le'i 'alo lava i le ta'uina atu o le tulaga o le avā a Manoa. I tusitusiga o le Tusi Paia ua tāua o

le ‘midrash’ o lo’o tāua mai ai iā i tatou, e foliga mai o le tane a le fafine e pa, o le leai o ni tamaiti, o le i’uga lea o le leai o se maliliega lelei tau i le fa’aipoipoga.

Ae ina ua to le avā a Manoa, na matuā fa’aeteete ai lava le fafine i le tausia o tulafono o lana to. E leai se uaina po o se ‘ava, e leai fo’i ni mea’ai leaga. Ina ua fanau le tama, sa lē seleina lona lauulu a ua fa’atutupu pea, e tusa ai ma le tulafono o ‘naseri’ i le Numera mataupu e 6, auā o le tama e tatau ona fa’asaina ma fa’amamāina mo le Atua, i matafaioi fa’a-ositaulaga. Na fa’aigoa e lona tinā le tama iā Samasoni. O le igoa e feso’ota’i ma le upu Eperu o le ‘shemesh’ (sun). O ni mafauauga e foliga e moni, auā o le fa’amoemoe o le tinā mo lana tama ia fa’ataunu’uina, o le tama lea o le ā vi’ia, ona e tumu i le malamalama, o le lelei atoatoa ma le malosi. O le mea lea na fa’amanuia ai e le Atua le tama, ma ua fa’atumuina i le Agaga.

Peita’i, e pei o le to’atele o talavou ma tagata matutua fo’i, o mone o lona tino ma ona fa’alogona na lelei lava iā te ia, ua galo ai mātua na fanauina i lana feso’ota’iga mata’utia ma fafine o nu’u ese. Tatou te ioe, o vaega o le polokalame fa’ata’atia a le Atua o lo’o nātia. O Samasoni, o le ā fa’aipoipo atu iā Tālila le fafine Filisitua, ma o le ā fa’avaivaia ma ave’esea ai lona malosi e Tālila, ina ua ia maua le mafua’aga lilo o lona malosi, ma tu’uina atu ai o ia i lima o Filisitua le fili. E nā o se mea na tupu i sina taimi se’ia o’o ina toe tutupu lona lauulu, ma toe maua lona malosi, ona ia toe tau’i atu lea iā i latou na fa’alataina o ia.

Tatalo: Fa’amamā mai o matou agaga le Alii e, se’i o matou auauna atu ai iā te oe i le fa’amaoni. **Amene.**

Mafauauga Loloto: Fa’amata e iā i tatou le lototele e fa’atagaina ai ā tatou fanau i mea ua latou manatu e tatau mo i latou, e aunoa ma le tu’uina atu i ai o tatou fa’amoemoega mo i latou?

Aso Tofi, Oketopa 26, 2017. “O Samasoni ma Tālila.”

Tusi Faitau- Fa’amasino: 16: 4-22.

Matua (f: 17): *“Ona ta’u atu ai lea iā te ia o lona loto uma, ua fai atu iā te ia, e le’i o’o se tafi i lo’u ulu; auā o a’u o le naseri i le Atua,*

talū ina fanau mai; afai e tafi lo’u lauulu, ona mavae ai lea o lo’u malosī, ou te vaivai, e aveā fo’i a’u e pei o se tasi tagata.”

O le tusi-ata Italia e suafa iā Caravaggio’s, na ia valiina le ata o Samasoni ma Tālila. O lo’o fa’ailoa mai i le ata le moe o Samasoni ua seleina lona lauulu i luga o le vae o Tālila. O molī o lo’o susulu i lona muāulu ma lona ulu ua tafiina. O ona foliga ma lona ua o lo’o i se ataata lafoia. O Tālila o lo’o fa’alagolago atu i ona luga, ma lona tamatama’i-lima e tasi i ona laugutu, e fa’ailoa atu i Filisitia e to’alua, e tatau ona la filemu. I le isi ona lima, o lo’o u’u ai le tafi. O le lapotopoto o ona foliga e mamā ina ua fa’ataele e le malamalama, o lona gutu e lē mamao ese, ua nā o le tāa’iga o lona fusi mūmū ma lona fatafata o lo’o fa’alataina ona lagona.

O Samasoni na ia vaevaeina le liona tele, fasiotia le 30 tagata-nu’u o Asekelona, na ia pue’a le 300 alope ma nonoa fa’atasi o latou si’usi’u, ma fai ai sulu e susunu ai i le afi togā saito, o olive ma vine a Filisitia. O le ivi auvae o le asini, na ia fasiotia ai le 1,000 o tane, na ia tago atu fo’i i puipui o le faitoto’a o le aai ma pou e lua, ua ia fa’ia atoa ma le fa’amau ma fa’ae’e i lona ua, ma ava’e i le tumutumu mauga sa feagai ma Heperona.

Ae ua ā nei, ua matuā fa’agaogaoina lona tagata i le fa’aoleole ane a Tālila. ‘Ta’u mai iā te a’u, po o le ā e te malosī tele ai? a’o moe o ia i luga o vae o Tālila. E atagia mai i le tala le fa’avaleaina pea o Samasoni e Tālila, i lona tauānuaina lā te momoe ma se’i maua ai le a’uga o lona malosī. Ua fa’auigaina e rapi le taumafaiga lea, ua feuluuluta’i i le va o Tālila ma Samasoni, ina ua ia gaua’i ma ta’u le mea sa’o. E le’i iloa e Samasoni le matuā leai ai o sona fesoasoani, o lo’o ia manatu lava e mafai ona ia alu ‘ese mai ma sa’oloto mai le togafiti a Tālila, e pei ona i ai lona malosī muamua. O Samasoni, sa ola i se vaipanoa o le olaga fa’ale-tino i lona malosī, ma le fa’amatalaina o le alofa i ni mafaufauga o se mea moni o lo’o tupu ma i ai, ā ua sesē ai le fa’amatalaina o le natura moni o le alofa.

Tatalo: Le Alofa Tunoa e, pe ā o’o ina vaivai lo’u tino ma gaogao lo’u mafaufau, ia aveā pea oe ma o’u papa ma lo’u malosī, auā ua nā o oe lava ou te tu’uina atu atoa i ai lo’u fa’amoemoe. **Amene.**

Mafaufauga Loloto: E fa’apefea ona tatou iloa o le fiafia ua tatou maua ua nā o se ata o mea moni e lē o va’aia? E fa’apefea ona tatou iloa ona fa’ailoa le malosi’aga o le alofa ma le fa’atumuina i le fiafia?

Aso Faraile, Oketopa 27, 2017. “O le oti o Samasoni.”

Tusi Faitau: Fa’amasino- 16: 23-31.

Matua (f:31): *“Ona o ifo lea o ona uso ma le aiga uma o lona tamā, ua latou si’itia o ia, ma ava’e, ua tanu iā te ia i le va o Sora’a ma Esetaola i le tu’ugamau o Manoa lona tamā. Ua ia fa’amasino iā Isaraelu i tausaga e luafulu.”*

E faigofie sauniga o malii a Isaraelu. O le tagata oti e vave lava ona tanu, ina ia lē tu’ua ai i latou o ola e fa’anoanoa mo se taimi umi. O le tagata oti e fa’aofuina i le ofu pulupulu pa’epa’e ma tanu i le pusa-oti laupapa e leai ni ona teuteu. E tutusa uma ai lava tagata mauoloa ma tagata matitiva i lea faiga. E fa’aopoopo i ai, a lē o ni siliva o ni auro e alu ma le tagata i lona tu’ugamau. O tagata fa’anoanoa latou te avatu tatalo o vi’iga i le Atua, e fa’amautuina ai lo latou amanaiaina o le pule aoao a le Atua i taimi o le fa’anoanoa ma le tigā o le oti. Latou te nonofo mo le fitu aso, faia tatalo, a’o asiasi atu aiga, o uo ma le to’atele o tagata e saunia atu mea’ai, ma fa’ailoa le agaga o se pa’aga lelei e toe manatua ai lē ua malii.

O Samasoni i’inei, na ia lolo’u i lalo pou e lua i totonu na mau ai le fale, ma feoti ai o ia fa’atasi ma tagata Filisititia e to’atele sa i totonu o le fale. Na ave o ia e ona uso ma tagata o le aiga o lona tamā i le tu’ugamau o Manoa lona tamā. O lana tautoga i lona tina, e fa’asaina ma fa’amamāina o ia mo le Atua, ua foliga ua mamao lava. O le malamalama mai le soifuaga o si ona tinā, ua mou ese atu. Ua tatou maua nei ua nā o le ata o Samasoni, e fete’ena’i ma le fa’avaivaiina o lona malosi, na fa’atagaina ma tu’uina i ai e le Atua e manumalo ai i ona fili. Na tosina i le alofa feuluuluta’i ma fafine, ona latou fa’aoleole lea iā te ia, ia maua le tali o ō latou mana’o i le mafua’aga o lona malosi. Na ia sa’ili e tau ai iā Filisititia, peita’i, na tauaso i le fa’atosina a Talila la te momoe.

I le i’uga o lona soifuaga, e le’i va’ai i ai se tasi, o le taule’ale’a na ia tu’uina atu Samasoni e fa’alagolago i poutu e lua o le fale, e tusa ma

lana fa'atonuga. E leai se tasi e mafai ona fesoasoani i le taimi lea, peita'i, ua tatou va'aia fa'ale-mafaufau, le tala ua atoa lelei lona ta'amilosaga. O le tama o Samasoni na tauto i lona tinā, a'o lea ua auai fa'atasi ma lona tamā i le tu'ugamau o le aiga.

Tatalo: O ai ea i matou le Atua fa'avavau e, e te faitauina ai i matou nei? O le ā ea so matou tāua e te amanaiaina ai i matou? Ua nā o se manava lava i matou le Alii e, ma o matou aso ua nā o se ataata e lafoia ma mou ese. **Amene.**

Mafaufauga Loloto: E fa'apefea ona tatou manatuaina ma tumau pea mafaufauga alofa iā i latou ua tatou lē toe mafuta i le tino? Ae fa'apefea ona tatou fa'amatalaina o tatou lagona fa'amalieina i fa'amanuiaga uma na latou aumaia mo i tatou?

Aso Toonai, Oketopa 28, 2017. “O le oti o le pālatae.”

Tusi Faitau: Fa'amasino- 19: 1, 16-30.

Matua (f: 26): *“Ona sau ai lea o le fafine i le vaveao, ua paū i le faitoto'a o le fale o le tagata sa i ai lona ali'i, ua o'o i le malama a'e o le taeao.”*

I Initia iā Tesema 2012, na fa'amalosia ai e se keni leaga se tama'ita'i a'oga talavou i luga o se pasi. Na latou sasa, ma fa'ataumao'iina, ma tu'ua ai i ni manu'aga tugā, na o'o ai lava ina maliu Jyoti Singh. O le fa'ataumao'iina ma le fasiotia o lea tama'ita'i a'oga, na matuā tupu tele ai solo tete'e i Initia, ma le mana'oga ina ia matuā fa'amalosia ma fa'amamafa tulafono e fa'asaga i fe'usua'iga fa'amalosi i tinā ma tama'ita'i, i se atunu'u e lē masani ona va'aia ai ni tinā o nisi e afāina pea.

E fia ni seneturi o lo'o fa'amauiina ai le fa'afitauli ogaoga lea mai o tatou fo'i seneturi, ma le tala i le fafine e lē o tāua lona igoa i le tusi o Fa'amasino, na tulei fa'amalosi i fafo e lona to'alua mai le fale na nofo ai, na fe'usua'i fa'amalosi ma fa'ataumao'i e tagata leaga i le po atoa seia o'o i le taeao? I le tafa o ata i le vaveao, na ia mafai lava ona taunu'u i le fale, peita'i, na matapogia ma paū ai i le faitoto'a o le tagata e ona le fale. I lona lē tali ane i le mana'o o lona to'alua e nofo i luga, na ia tu'uina ai o ia i luga o lana asini ma alu i lona nu'u.

Aisea? Ina ua ia toe fo'i i lona fale, aisea na lē mafai ai ona taofia o ia i lona tago atu i le polo ma pena ai lana pālatae i ivi ma tufa'aga e sefulu ma le lua, ma avatu i itu uma o Isaraelu.?

I tupulaga o aso nei, o le iloa ma malamalama i aiā tatau ma le fa'apelepeleina o le ola o tagata ola uma. Fa'amata e lē o va'aia pea le lūlūina ma le fa'amata'uina o tinā ma tama'ita'i, o lo'o i ai pea nisi o nofoaga o lo'o aliali ai pea le fa'amalosia ona ave'esea aiā tatau a nai tinā, ae sili atu le leaga, o le sauāina ma fa'ataumao'iina o i latou? E lē o tāua le igoa o le palatae lea i le tala. O fea lona leo i le va ma lona to'alua, o le tamā o lona to'alua, o le tagata talimalō, ma tagata na fa'amalosia ma fa'aleagaina o ia? Ua gūgū lava o ia, i ia mea uma. Ua lē o tāua ia lava mea e le tusitala. A'o le feau tāua, o le palatae, o lo'o fai ma ata manino o fafine uma, o lo'o tumau pea ona olopalaina ma fa'ataumao'iina i le lalolagi atoa.

Tatalo: Mai le loloto o puapuagā, ou te alaga atu ai i le Atua o le fa'avavau, ia e fa'afogaina mai la'u tagi. **Amene.**

Mafaufauga Loloto: E fa'apefea ona tatou matuā auai atu i le taumafaiga e feasoasoini iā i latou ua leai ni ō latou aiā tatau fa'ale-tagata, pe afāina fo'i i le fa'ataumao'iina o ō latou ola?

“OU TE TULA'I ATU NEI---UA OU LĒ TOE GAFATIA SE ISI MEA.”

Here I stand—I can do no other.

(Fa'amanatu le 500 tausaga o Matini Luteru).

(Saunia: Raj Patta).

Aso Sa, Oketopa 29, 2017. “Nātia ma fa'aalia.”

Tusi Faitau: Isaia- 45: 15.

Matua (f: 15): *“E moni, o oe lava le Atua e fa'aliloaina oe e oe, le Atua o Isaraelu, le Fa'aola.”*

O le tausaga leni e fa'amanatuina ai le atoaga o le 500 tausaga o Matini Luteru, le aso na tutu'iina ai e Luteru le 95 tusitusiga i faitoto'a o Wittenberg ma amataina ai loa le Toe Fuata'ina fa'a-

Kerisiano o le talitonuga Poretasano. I le isi tolu vaiaso o i luma, o le ā tatou va'ava'ai muamua i nisi tagata o le Tusi Paia sa i ai le lototele e pei o Matini Luteru, na tumau ai ma le lē fa'agae'etia, i lona talitonuga i le Atua na valaauina o ia i mea na te faia. Na matuā lagona e Luteru le agaga tatala atu ma gaua'i i le Atua e pei ona ia fa'atinoina.- Ou te tula'i atu nei, ua ou lē toe gafatia se isi mea. O le ā lava le i'uga e o'o mai i tagata, e tatau lava ona tatou ususita'i i le Atua, ae lē o tagata.

O le perofeta o Isaia, o se tasi o fetu pupula na tumau ma le lē fa'agae'etia, e o'o lava i taimi e leai ai le Atua. O le fa'amatalaina o le tala iā Isaia, o lo'o fa'aalia ai, o le Atua e natia e ia, ia lava, a'o le isi fo'i itu, e fa'aalia mai ai, o ia o le fa'aola. Na fa'amatala e Luteru e fa'apea, o le Atua sa natia i le si'osi'omaga o le ave fa'atagata-o-taua ma le olopalaina, na fa'aalia ai e le Atua ia lava, e ala i lana galuega o le lavea'iina ma le toe fa'aeaina o tagata e o'o mai i ō tatou taimi. I se isi fa'aupuga, pe afai e fausia e tagata se si'osi'omaga o le olopalaina ma le fetaua'i, e natia pea le Atua ma lē va'aia e mata o tagata. Ae pe ā fa'amasinoina ia faiga ma fa'atoilaloina. O le Atua lenā ua fa'aalia e ia, ia lava. Na pau lava fo'i lenā o le ala tatou te manino ai i le fa'aolataga ma le fa'aeaina e le Atua.

Tatalo: Le Atua e, ia e lu'itauina i matou ina ia ave ma ala o lau Afio, matou te auai atu ai ma le lē fa'agae'etia i tauiviga ma le foafoaga, ina ia manumalo le amiotonu ma le fa'aeaina mai lau Afio.
Amene.

Aso Gafua, Oketopa 30, 2017. “Tumau ai ma le lē fa'agae'etia.”
Tusi Faitau- Isaia: 7: 9.

Matua (f: 9): *“O le ulu fo'i o Efaraima, o Samaria lea, o le ulu fo'i o Samaria, o le atali'i o Remalia ia; afai tou te lē fa'atuatua, ona lē fa'atumaia ai lea o outou.”*

O le ā le uiga o le tumau ma le lē fa'agae'etia i le fa'atuatua? Iā Matini Luteru, o le fa'atuatua lava ia, o se ala lea e malamalama ai i le fa'amaoniga ma le ta'uamiotonuina, auā o le ekalesia po'o le lotu, sa pulea lava e le malō o Roma na ō ia lava.

O a'u o se Kerisiano e mai Dalit lo'u tala'aga, e ta'ua i le talafa'asolopito "e lē mafai ona pa'i i ai se isi."(untouchables). Ina ua ou mafaufau i le tulaga o Luteru, ma toe mafaufau i le avea ma Kerisiano o Dalit, ona ou manatua lea o le tele o taimi na maulalo ai le vaai a tagata i Kerisiano Dalit. O le mafaufauga ua tumau i nisi o le sosaiete, o le avea ma tagata tauāloaina ma mamalu ae maise le atamai, o ā latou lava ia mea totino. Na a'oa'oina i matou e ō matou faia'oga, o le poto ua latou pulea ai mea uma. O le Ekalesia po'o le lotu, na fa'aeaina ai matou, ma maua mai ai i le lotu aoaoga maoa'e ma ese mai i le poto o tagata maualuluga. Ina ua amata ona maua e i matou le a'oa'oina lelei ma amata ona fa'aleleia o matou tulaga, e le'i suia ai lava le mafaufau o i latou o lo'o pito i luga. Na fa'aauau pea ona latou vaai maulalo iā i matou.

Peita'i, o le fa'atuatua fa'a-Kerisiano, na aumaia iā i matou le lagona maualuga o le loto maulalo ma le fa'amagalo, na fa'amalosia ai i matou ma aumai le fa'aaloalo i le va o tagata. Ua matou fa'atinoaina i totonu o le sosaiete se isi mafaufauga fou. O lo'u popole ma le lē mautonu i lo'u talitonuga sa tupu ae i le seminare, ua mafai nei ona ou fesiligia ma tautala atu iā i latou. O le fa'atuatua na fesoasoani iā i matou e tumau ma le lē fa'agae'etia i se auala matagofie, faigofie ma lelei.

O aso nei, ua tele sosaiete ua latou fa'amalamalamaina i latou, e lē feso'ota'i ma mea fa'ale-tino o le lalolagi, ae o lo'o manino mai ai pea le fa'aitiitia o le lautele o le galuega a le fa'atuatua. Peita'i, o le tumau ma le lē fa'agae'etia i lo tatou fa'atuatua, o lo'o matuā tāua pea e o'o i le i'uga. Ona o lo tatou fa'atuatua iā Iesu Keriso, ua fa'agae'etia ai i tatou e saili le liliuina o loto ma agaga o sosaiete. O le fa'atuatua lava lenā e pei o Matini Luteru, ua tatala atu ai o tatou tagata e fa'aliliuina le fa'atuatua i galuega, ma taofia i tatou ma le lē maluelueina i le olaga nei, ma le olaga ofoina atu o lo'o fai ma ā tatou manulauti.

Tatalo: Le Atua e, o le amataga ma le mafua'aga o le fa'atuatua, liliuina lo matou fa'atuatua i galuega fa'atino, ina ia mafai ona avea i

matou ma ala o lau fa'aolataga, ia i latou ua leai se fa'amoemoe o le ola seia o'o i le oti. I le suafa o Iesu ua matou tatalo atu ai. **Amene**

Mafaufauga Loloto: Sa'ili'ili atili e fa'atatau ia Matini Luteru i Initia, e aofia ai ma le NCCI (National Council of Churches in India) i Initia i le website, www.nccindia.in

Aso Lua, Oketopa 31, 2017. "Ia fuata'ina pea."

Tusi Faitau: Galuega: 5:17-29.

Matua (f: 29): *"Ona tali atu lea o Peteru ma le 'au aposetolo ua fa'apea atu, "E tusa ona sili o lo matou 'ana'ana i le Atua i lo matou 'ana'ana i tagata."*

O le aso, a'o tatou fa'amanatuina ma mafaufau pea i le 500 tausaga o le Toe Fuata'ina, ua tatou manatua ai le fa'amalō ma le fa'afetai mo Matini Luteru. O le Toe Fuata'ina, o se galuega na saunia lava e le Atua. Ae na maua e Luteru le lototele e usiusita'i ai na o le Atua lava e to'atasi, e aunoa ma le 'ana'ana i se paoa o se tagata. O lona fa'atuatua ma le alofa i le Atua, na tupu ai le fa'aeaina ma le lavea'iina o tagata mai le fa'apologaina e le pule fia atua o le tagata.

Mo 'au lava ia, ua avea le tamāoaiga, tulaga maualuluga ma galuega ua tofia ai i totonu o le malō, ma paoa malosi ua aliali 'ae ai le lē amiotonu ma le olopalaina o le faitau miliona o tagata Dalit i le lalolagi. O le valaau a le Toe Fuata'ina i aso nei, ia te'ena ma fa'ato'ilalo le pule sauā ona o le paoa. Tine'ia le fa'aauauina pea o le amiolētonu, a ia tautino ma le atoatoa le usiusita'i i lo tatou Atua fa'aola, ona avea ai lea o lo tatou malō, e tine'ia le fa'aailoga lanu i tagata.

Mo Iesu, sa ia feagai ma le pule'aga fa'a-emeperoa a Roma, e fetaia'i ma le malō o le Atua, ae sa ia filifilia le malō o le Atua e sili atu ia te ia. Mo Matini Luteru, sa ia feagai ma le malō o Roma, e fetaia'i ma Iesu, ae sa ia filifilia lava Iesu e sili atu i lo se isi lava pule fa'ale-tagata o le ekalesia ma le lalolagi i aso nei, o le paoa fa'ale-tagata o lo'o tatou feagai nei, e fetaiai ma Iesu. Peita'i, o le tatou filifiliga e matuā aupito silisili i mea uma, o lo tatou filifilia lea o Iesu e silisili o ia i le paoa o le tagata. O le mea aupito mana'omia lea i aso nei mo le

toe Fuata'ina o ā tatou ekalesia. Ua tofū i tatou ma le sao e faia i lenei valaau. E pei ona tāua e Matini Luteru, “O le lē amiotonu i se nofoaga e tasi, o le fa'amatau lava lea i le amiotonu i nofoaga uma.”

Tatalo: Le Atua Amiotonu e, una'ina i matou ia maua le agaga o Luteru i le Toe Fuata'ina o ā matou ekalesia i aso nei. A'oa'o i matou e tautatala i le mea sa'o iā i latou ua i ai le paoa ma le pule, ina ia mafai ai ona matou finau atu i le fa'aeaina ma le lavea'iina i le lalolagi nei. **Amene.**

Mafaufauga Loloto: O le ā se mea o mana'omia le Toe Fuata'ina i lau Ekalesia ma lou atunu'u i aso nei?

Aso Lulu Novema 01, 2017. “Manatua ē ua fa'agaloina.” (Aso mo le ‘Au Paia atoa - All Saints Day.)

Tusi Faitau- Fa'aaliga: 7: 9-17.

Matua (f: 9): *“Ua mavae atu ia mea, ona ou iloa lea, fa'auta fo'i i le motu o tagata e to'atele mai atunu'u uma, ma aiga, ma nu'u, ma gagana 'ese'ese, e lē ma faitaulia e se tasi, o lo'o tutū i latou i luma o le nofoali'i ma luma o le Tama'i Mamoe, ua o'ofu i latou i ofu sisina, ua i ai fo'i laupama i o latou lima.”*

O le asō, e pei ona masani ai, o le aso fa'amanatu mo le “ ‘Au Paia atoa.” Ia fa'a-avanoaina se taimi tatou te manatuaina ai i latou ua ulufale atu i le ola e fa'avavau, ua muamua atu iā i tatou, o lo'o fai vi'iga i le Atua. Tatou te fa'afetai i le Atua i o latou soifua ma o latou sao tāua, o ā latou molimau i le Atua na fa'agae'etia ai o tatou lagona ma agaga, o le ala lea ua tatou manatuaina ai pea o latou soifua ta'uaogāina ma fa'aolaola mea tāua na latou tu'uina mai mo i tatou.

O le fa'aaliga na iloa e Ioane i le mataupu e fitu, na ia iloa ai le motu o tagata ua lē ma faitaulia, o lo'o tutū i luma o le nofoali'i ma luma o le Tama'i Mamoe. O ai ea i latou uma o lo'o tutū i luma o le nofoali'i, a'o fea fo'i na latou omai ai? O tagata ua lē ma faitaulia, o le fa'apotopotoga e to'atele o tagata na o mai mai le puapuagā tele, o i latou ia e le'i amanai'aina ma fa'agalagaloina e tagata, ua pei e lē o ni tagata. I le talanoaga i le fa'aaliga lea, ua aliali mai ai o tagata ia, o i latou ua fa'agaloina ma lē faitaulia, ua lē amanai'aina o latou ola o ni tagata. O i latou mai atunu'u uma, o lanu ma aganu'u uma, o tagata ola uma fo'i ua tofū ma ā latou gagana ma o latou leo uma, o lo'o tutū

i luma o le nofoali'i. O tagata ia na lē manatuaina ma fa'agaloina, na omai mai le puapugā tele, ma latou fai vi'iga i le Atua.

O aso nei ma o tatou taimi, o lo'o i ai fo'i tagata ua fa'agaloina ma lē manatuaina, o i latou fo'i o ni tagata ola. O i latou o lo'o sopoia tuāo'i o le sami ua lē iloa o latou i'uga ma o latou aso, ona o taua ua lē uma ma le matelāina, ua mafua ai ona latou talia i latou lava e avea ma tagata sulufa'i i le fiaola, e ui ina lē iloa le i'uga. Peita'i, o tagata Paia na o lo'o tutū i luma o le nofoali'i, e lē ma faitaulia. Auā ua latou feoti, e aunoa ma ni fa'amaumauga o o latou tagata, leai ni o latou tusi folau, po'o se tasi lava mea e amana'i'aina ai o latou tagata ola.

I lenei aso fa'amanatu, ua valaauina i tatou ina ia tatou talia le lu'i tāua, ina ia tatou manatua ane i latou o lo'o sulufa'i solo i le fiaola, ma isi tagata ua fa'agaloina ma lē taulia pe amana'i'aina, o ni tagata fo'i, ina ia vala'aulia e affiō fiafia mai tatou te mafuta fa'atasi, ma tatou lagona fa'atasi le lagona o tagata ua soloi'esea e le Atua loimata mai o latou mata. Auā o le tatou galuega fa'amisionare lea o le talimalo alofa ma le fa'atuatua, ona avea ai lea o le aso mo le "Au Paia atoa", o se aso o le ā uigā ma i ai sona mafua'aga tataua ma sona fa'amoemoe ola, e fa'aolaina se tagata ua fa'agaloina.

Tatalo: Le Atua alofa e, ua matou manatua i latou uma e pele iā i matou ua malōlō i le malōlōga tumau. Fesoasoani mai ia mafai ona matou fa'atāuaina ma manatuaina tagata ua fa'agaloina ma lē faitauina o lo'o i o matou autafa, ina ia matou vala'aulia i latou uma matou te mafuta fa'atasi i lou suafa. I le suafa o Iesu ua matou tatalo atu ai nei. **Amene.**

Mafaufauga Loloto: Ia tatou manatuaina i latou ua lē manatuaina ma fa'agaloina e isi tagata i lenei aso tāua mo le "Au Paia atoa."

Aso Tofi Novema 02, 2017. "Se va'aiga fou."

Tusi Faitau- Galuega: 7: 51-60.

Matua (f: 60.): *"Ua to'otuli fo'i o ia, ma alaga atu ma le leo tele. "Le Alii e, aua e te tu'uina atu lenei agasala iā te i latou." Ua uma atu lea upu, ona moe ai lea o ia."*

Na lauga Setefano i se nofoaga faitele i luma o tagata na latou molia o ia, i lona taofimau i lona fa'atuatua iā Iesu Keriso. O le fonu sili a ta'ita'i o le lotu Iutaia na latou saisaia o ia a o fa'amatala e ia le

ofoina atu atoatoa o lona fa'atuatuaaga i le galuega a Iesu, ma ia toe fa'amatalaina ai ma fa'auigaina lo latou talafa'asolopito mai se va'aiga tuai ma le maualalo. Masalo sa tatau ona fa'asaoina mai o ia mai le oti, peita'i, sa ia va'ai i se avanoa e tosina ane ai le 'au mau tulaga maualuluga o le lotu, ae na lē suia ai le fetogiina o ia i ma'a ma oti ai. Mo le tautala atu i le mea sa'o i tagata o lo'o umia le paoa, na tagata-valeina ai Setefano e le paoa o i latou na.

E fa'apei o Luteru, o Setefano na fai ma sui o tagata ua lē lagona ma fa'amata'uina o latou leo. O tagata uma ua olopalaina e pei fo'i o tagata Dalits, ua leva ona latou fausia se fa'amoemoe ia toe liliuina ma suia le talitonuga o tagata i le mana o Iesu Keriso. O le ala lea o lo latou lototetele e tautatala i le mea sa'o iā i latou o lo'o umia le paoa ma faia tulafono i o latou lava si'osi'omaga. O i latou ia na osofa'ia ma fāsia e le 'au fai paoa, ae na tali lava i le gūgū e leai se upu, se'ia o'o lava ina maliliu fasia ai i latou. O tagata fa'apea, na tutupu ai suiga, o i latou na fa'ama'iteina le amiotonu, a'o ni perofeta e lē fa'agaloina o le amiotonu. Na maliliu fasia i latou a'o tūtūmau ma le lē solomuli i moliaga faiasaga iā i latou.

Mo i tatou o le Ekalesia i aso nei, ua vala'auina i tatou ina ia tatou amana'iaina leo o i latou ia, feso'ota'i ma mafuta fa'atasi ma i latou e fausia ni tala o le toe fuatāina ma fa'avae ni avanoa tāua o ia tala, ina ia mafai ona a'oa'oina ma ola ai, ma fa'amanatu pea ma le fiafia e tagata uma. Ia avea a tatou Ekalesia o ni avanoa fou e suia ai va'aiga tuai i ni va'aiga fou, e aga'i atu ai i le fausia o ni sosaiete fou.

Tatalo: Le Atua alofa e, aumaia mo i matou le lototele matou te tautatala atu ai i le mea sa'o, ma fa'amalosia i matou e molimau i lou toe fuatāina ma fa'aolaina le lalolagi atoa. **Amene.**

Mafaufauga Loloto: E fa'apefea ona aga'i 'ese mai se Ekalesia i talatu'u o le tuana'i, ae avea ma avanoa o se va'aiga fou mo le lautele?

Aso Faraile Novema 03, 2017. "Tauivi mo se sa'olotoga."

Tusi Faitau- Efeso: 6: 10-17.

Matua (f: 12.): *"Auā tatou te lē tau ma tagata, a o ali'i sili, ma faipule, ma ali'i o le pouliuli o lenei lalolagi, atoa ma agaga leaga i mea o i le lagi."*

Na fa'amafanafana atu le Aposetolo o Paulo i le Ekalesia i Efeso ina

ia malolosi i le Atua, o i latou o so'o o Keriso. Ua valaauiina i latou ina ia tauivi e tete'e atu i le leaga ua a'afia ai lo latou si'osi'omaga. O se tasi o mea tãua i le galuega o le misiona a Iesu, o le ituaiga tauiviga o lo'o latou tauivi ai, o le finau malosi e tete'e atu i ē o aveva ma ali'i sili, ma latou o lo'o i ai le pule, o ali'i o le pouliuli ma le malosi o agaga leaga, ina ia mafai ona fa'atuina le amiotonu ma le toe fuatãina ia Iesu Keriso.

Ina ua ou faitau i fuaiupu nei ma mafaufau i le tauiviga a Matini Luteru, ou te mafaufau i le tauiviga a tagata o Dalits i so'o se vaipanoa o le lalolagi mo le amiotonu. Mo a'u, o se tauiviga e tete'e atu i le fa'agasologa o le soifuaga o tagata o lo'o pulea e pule'aga fa'ale-malō i Andhra Pradesh, ua so'o uma ai Initia ae fa'apea i le lalolagi atoa. O se tauiviga lava lea a le lalolagi atoa, auã o lo'o aliali manino ai le lē amiotonu ma le lē tutusa o le faiga o tagata, ua mafua ai le fetauai ma le fefulituaa'i. O tagata taito'atasi uma ua a'afia i lea faiga ma le puleaina o olaga o tagata. O tulafono ua faia i le pule sauã o o tatou taimi, i la'u vaai, o lo'o a'afia i le faiga lea, ma ua aveva ma ala ua vaevaeina ai tagata i o latou lanu, o galuega, ma aiga e tutupu mai ai.

O tagata o le toe fuatãina e pei o Matini Luteru, na tu'uina atoa o latou tagata i le misiona a Iesu, e ala i le fa'aailoa ma ta'u atu i tagata le mata'utia o le lē amiotonu o lo'o fa'atinoina i totonu o lana Ekalesia. O tatou fo'i ua vala'auina ina ia tatou tauivi e tete'e atu i fa'agasologa ma fa'atulagaga o le agasala i o tatou taimi. E amata mai luga iã i latou o lo'o umia le pule, o le fa'aailoga lanu, o le ola fia tuto'atasi, o le manatu fa'apito atoa ma le olopalaina o ola o isi tagata. O le mea lea ua tatau ai ona tatou ta'utino atu i le aso nei, lo tatou auai atu e fa'afetaui ituaiga malosi leaga uma, ma tatou tauivi ma finau atu ia mausalī ma mautū le amiotonu ma le filemū, i so'o se vaipanoa o lo'o tatou nonofo ai.

Tatalo: Le Atua alofa e, fesoasoani mai iã i matou ina ia matou tauivi ma finau e tete'e atu i fa'agasologa ma fa'atulagaga leaga o o matou taimi. Ma ua matou mana'omia lava le ta'ita'iga a lou Agaga Paia i lenei misiona. **Amene.**

Mafaufauga Loloto: E fa'apefea ona e fa'aliliuina ma auai i ni misiona o tauiviga i totonu o lou lava si'osi'omaga?

Aso Toonai Novema 04, 2017. “Fa’amalōlōga tulaga ‘ese.”

Tusi Faitau: Ioane: 9:13-17, 24-38.

Matua (f:39): *“Ona fa’apea ane ai lea o Iesu, “O le fa’amasinoga, o le mea lea ua ou sau ai i le lalolagi nei, ina ia latou vaai o ē lē va’ava’ai, ia fa’atauasoina fo’i i latou o ē vaai.”*

Na fa’apupula e Iesu le tauaso i le tala lea, peita’i, na ia fa’atinoina fo’i i se tulaga e sili atu. Na ia fa’atauasoina fo’i i latou o ē vaai, tagata manatu fa’apito, o tagata e mapo lotu ae na taumafai e fa’aleaogā le fa’amalōlōga a Iesu. Ina ua fetalai Iesu na sau e folafola le talalelei i e matitiva, e i ai se taimi na tatou fa’aliliuina ai lea fetalaiga, o se tala leaga i tagata mauoloa? O se fa’aupuga faigatā lea, peita’i, ou te talitonu o le malosi’aga lea o le talalelei. Mo se Kerisiano Dalits, ou te fa’amoemoe afai ou te fa’alogo i ai, o lona uiga, ou te maua le tau i la’u mea sa fai. O le ā e seleseleina faigatā i le lalolagi lenei i au mea na lūlū. E aumaia iā te a’u le malosi’aga e iloa ai, o le lē amiotonu, o le ā tauia lava i le lalolagi nei, ae lē na o le i’uga o lo’o mulimuli mai.

Ou te fia iloa, afai o le manulauti o le ola e maua le tau po’o le fa’amasinoina i tala atu o le oti, ona fa’alotolotolua ai lea i le tāua o le misiona a Iesu. O le fuaitau lea, ua vala’auina ai i tatou le Ekalesia ina ia saili i le salamō ma le toe fa’afouina, mai le lē amiotonu, ae maise le matuā ave’esea o le olopalaina o aiā a tagata i faiga lē tutusa a i latou o umia le paoa ma le pule sauā ia lē toe va’aia.

O le misiona iā Iesu lava ia, ma ala na ia fa’atinoina ai, o le avatu lea o le malamalama e pupula ai ē o tauaso, ma vala’auina i latou ina ia toe fa’afouina ma salamō, ma o ‘ese mai iā i latou o lo’o olopalaina isi tagata, e ala i le fa’atino tatau ma le talafeagai o le amiotonu. O Luteru fo’i ia, na ia saili lava fo’i ina ia suia le lalolagi ma ia malōlō iā Keriso. Fa’amata e mafai ona tatou galueina le fa’amoemoe ma le vaai mamao a Iesu, ia tino mai i o tatou taimi?

Tatalo: Le Atua Amiotonu e, alofa mai ia avea i matou o tagata o le Ekalesia e fai ma avanoa e o’o atu ai lau amiotonu i tagata. I le suafa o Iesu ua matou tatalo atu ai. **Amene.**

Mafaufauga Loloto: O fa’apefea ona sa’ili mai isi e avatu le fa’amalōlōga i tagata matitiva i lā outou Ekalesia?

‘O a’u lenei’. (Here I stand)
Martin Luther 500th anniversary
Grace
(saunia e Malcolm Carroll.)

Aso Sa Novema 5, 2017 “O le alofa tunoa ua faapea ona o’u tula’i ai” (The grace in which we stand)

Tusi Faitau : Roma 5: 1- 11

Matua: Roma 5: 1 *‘O lenei ua ta’uamiotonuina i tatou i le faatuatua, o lea ua tatou lelei ai ma le Atua, ona o lo tatou Alii o Iesu Keriso.’*

Ua faamatala mai e Paulo le tele o upu taua i lenei tusi, o upu e avea ma faamanatu e mausalā ai le talitonuga o le Kerisiano faapea le faailoa mai o le Tolu Tasi Paia o le Atua i ulua’i fuaiupu e ono (6) i lenei mataupu. O le upu taua e tasi, ua aofia ai upu uma, o le upu i le **alofa**, o le **alofa tunoa**.

O le alofa tunoa, o le upu e faatupuina lagona ma ofo tele ai le loto, faapea le va’aiga i le Atua, e tumau ma le suia lona alofa, ua ia faailoa mai o ona fili ua avea ma ana fanau. O uiga ia o le alofa tunoa o le Atua, ua ia faia mo i tatou.

Na faapea se tala a le alii tusitala o Malcolm Carroll i lenei vaiaso, na faapea ona tetele atu le faaseā a le faifeau ia te ia. Na o’u fa’auigaina le mafaufauga o le faifeau ma lana galuega, o le valaauina lea o tagata ina ia talitonu i le Atua, ma faapea mai ma le leo filemu ma fesili mai, “E le o la tatou galuega ea lea, o le ta’u i tagata o le Atua, ina ia tumau ma talitonu i ai tagata uma?” - o le alofa tunoa lea o le Atua e tumau faatasi ma ona tagata.

Tatalo: Le Alii e, ia e fesoasoani mai ina ia tumau i matou o fanau a lau afio ua faaolaina. Seia fesoasoani lou Agaga e faatonu i fanau uma, ua le talitonu i le alofa tunoa o le Atua, le Tupu e malie ai o latou mana’o. **Amene**

Aso Gafua Novema 6, 2017 “O lenā alofa tunoa e pule pea”
(That grace might reign)

Tusi Faitau – Roma 5: 12 – 21

Matua- Roma 5: 21 *‘O lenei, e pei ona malo le agasala e oo i le oti, e faapea foi ona malo o le alofa tunoa e le amiotonu e oo i le faavavau, i lo tatou Alii o Iesu Keriso.’*

Na faamatala e le alii o Malcolm Carroll le tulau ‘ele’ele o le vaalele, o le vaalele mai le UK, e tauaveina aupega niukilia malolosi, na palasi mai ma se vaaiga ‘ofo’ofogia ma le aulelei (graceful), ma tu lau’ele’ele ma le malosi ma le silisili ese.

O le upu alofa tunoa, e tele ona faauigaga. E fa’amatala i le maualuga ma le malosi faale tagata peitai, ua faamanatu mai e Paulo, o le alofa tunoa, e sili atu lea i malosi uma. O le alofa tunoa ua faailoa ai e le Atua lona malosi uma lava, o le malosi sili lea ua ia tuuina mai ina ia avatu i tatou faatasi ma Ia i le mafutaga e faavavau.

O le taimuaga o le Malaga faa-kerisiano, o le tuuina mai lea o Keriso, le togiola e faamagalo ai le tagata agasala. E faapea le Malaga a le Kerisiano, o le alofa tunoa o Keriso e faavavau e tumau pea lea ma ona tagata.

I le tula’i mai o Matini Luteru, sa faapea ona ia iloa le vaivaiga o le Lotu, auā ua avea le Lotu ma ala e faapologaina ai tagata i tulafono, faapea le tuuina atu o tupe ina ia faamagaloina le tagata ua oti, ma toe tutū mai ai e ua oti i le ola e faavavau, e ala i le paū o le tupe siliva i le pusa o le tuugamau.

O le galuega tele lea a Matini Luteru, o le toe faamatalaina lea o le alofa tunoa o le Alii mo lana fanau. O le Atua ua ia faailoa mai e le fa’atāua le alofa tunoa i se tupe, o fanau uma i tatou a le Atua ua faaolaina e ala i le maliu o Iesu Keriso.

O le faatuatua, o le tuuina atu lea o le loto atoa ma maua o ana meaalofa taua. O le Atua na ia aumaia o lona alofa tunoa ma mau faatasi ma tatou. E faapea foi le Ekalesia, ia faamalolosi ma faailoa atu le alofa tunoa o le Atua, e tumau ma pule pea o Ia e faavavau.

Tatalo: Le Alii e, aumaia ia te a’u le lototele - ou te iloa ai mea ua faaletonu i le Ekalesia, ma faava’atuia ai le faatinoga o lou alofa, e tatau ona tafieseā. **Amene**

Mafaufauga loloto: E i ai lava Ekalesia i nei vaitaimi, e faia ma le alofa ma le agalelei o ana faaiuga.

**Aso Lua Novema 7, 2017 ‘Pe a miti tagata totoa’
(When superheroes dream)**

Tusi Faitau: Roma 6:1 – 14

Matua: Roma 6: 13, *‘a ia tuuina atu outou i le Atua, e pei o e ua ola nai e ua oti’*

E anoanoa’i a tatou miti – e masani ona ou miti i ta’aloga a tagata totoa ta’uta’ua. O leā se mea e ona tupu peā miti ni tagata malolosi ta’uta’ua? O tagata e pei o uamea malolosi o latou tino, ua latou maua le malosi faamasini faapea aupega e puipuia ai o latou tino. O lenei malosi, o le malosi e tupu atu i fafo. Peitai e le faapea le malosi ta’uta’ua o Dr Manhattan, o le malosi sili na tupu atu i totonu o lona loto. Ioe e tele lava tagata ta’uta’ua na lauiloa, e pei foi o nisi tagata – Pe ona o miti ea tagata totoa, ma ta’uta’ua i latou i ni suiga lelei? Ae ā, peā tatou galulue faatasi?

Ioe, e le oni tagata totoa i tatou nei, a o tagata o le Atua o loo faamalolosi e ta’u atu le Upu moni, faapea le faatinoga o le olaga amiotonu e pei ona faia e Iesu. O leā se auaunaga, ua avatu ai le malosi sili i mafaufauga matagā, faapea le lē faia o le mea moni?

Mo i tatou, o la tatou auaunaga lea e tatau ona faia. O le ola fou ua foaina mai mo i tatou, o le meaalofa sili e tatau ona faaoo atu i tagata uma le alofa o Iesu. Mai le oti i le ola ua maua ia Iesu, o le meaalofa sili lea mo tatou, ma tatou auai ai i galuega a le Atua i le lalolagi ma faailoa atu le galuega a Iesu. O le alofa tunoa ua avea ai tatou ma tagata fou, i mea ua i ai le agavaa, le faamoemoe, le faatauaina, le olaga ua avea ma soo o le Alii ua faamamāina mo lona mālō. O lo tatou faatuatua ua faatupuina e le Atua i o tatou loto. O le amiotonu o

le suiga fou lea mo i tatou ua aumaia e Iesu. Pe o faapea ona tatou ola ai i le amiotonu? O le meaalofa sili ua aumaia e Iesu mo i tatou.

Tatalo: Mafaufau i tala o le talalelei, na feiloai ai Iesu ma tagata lautele; o leā se feiloaiga ma Iesu pe ana faapea o le a feiloai ma ia i lenei aso? **Amene.**

Mafaufauga loloto: O leā se va'aiga i se tagata fou ua faafouina e le Agaga o le Atua? Ia va'ava'ai pea ia Iesu.

Aso Lulu Novema 8, 2017 'O le lalolagi fou ma lona faatautaiga.'
(The new world order)

Tusi Faitau: Roma 6: 15 -23

Matua: Roma 6: 15, *'O lenei, pe faapefea? Tatou te agasala ea, ina ua tatou le nonofo i le tulafono, a o le alofa tunoa? Aua ne'i faapea.'*

Na o'u vaai i le faaupuga - 'O le lalolagi fou ma lona faatautaiga' - i le Memorial Document i Hiroshima, 2005. O lenei faamatalaga na faapea mai, 'Pe ana soifua le Peresitene o Franklin D Roosevelt, e le o'o le palasi o le pomu i Hiroshima, auā sa vaai o ia i le faataunuaina o tausaga, e fesootai ai ma galulue ai faatasi ma Russia'. Na maliu Roosevelt ia Aperila 1945, ma tulai mai le Peresitene o Harry S Truman. O le Document ua faailoa mai, o Truman na faapalasia le pomu ia Aukuso 1945, ina ia taofia le malosi o Russia.

O le mea na iloa ai le malosi o Amerika, ma le naunau o Russia e fia maua lea malosi, o le pomu na uma ai le taua, na fefefe ai Russia ma lona osofai mai i atunuu i Sasa'e. Peitai, e ui ina ua fefefe, ae sa taumafai e kopi le fauina o le pomu, ma o le amataga lea o le Cold War, o le 'Lalolagi fou ma lona faatautaiga, e le pomu'.

O le 1945 na faia ai le maliliega, mo le galulue faatasi o malo, e ui ina tupu mai o le Cold War. Peitai, o nei fa'aiuga ua liliuina ai le lalolagi e ola ai le tagata i le olaga fou e tatau ona soifua ai.

I le faitauga i le asō, ua tatou iloa ai le faatautaiga o le lalolagi fou; ua tatou ola i le alofa tunoa o le Alii. E leai se pomu, e leoleoina ai i tatou, ao le alofa tunoa o le Alii e leoleoina ai i tatou. I lenei lalolagi fou ma lona faatautaiga, e tele lava fili e le mapu. O la tatou galuega,

o le pai atu ma maua le mafutaga ma tagata, e pei ona faia e Keriso i ai tatou.

O le isi Peresitene o Amerika na tele le lē fiafia i ai o tagata o le atunuu, ona o le agalelei pea i tagata ua avea ma fili o le mālō. Na tali atu le alii o Abraham Lincon; ‘Do I not destroy my enemies when I make them my friends?’

Tatalo: Le Alii e, e ala i lou alofa tunoa, o ai ni fili o’u te faaleagaina i le asō? **Amene**

Mafaufauga loloto: O le alofa ma le filemu e galulue faatasi. E faapefea ona faamatalaina o nei galuega?

Aso Tofi Novema 9, 2017 ‘O ala o le Agaga’

(The way of the Spirit).

Tusi Faitau: Roma 7:1 – 12

Matua: Roma 7: 6 ‘*o lea ua tatou auauna ai i la le agaga fou, a e le i la le tusi tuai.*’

O le aso ananafi na faailoa mai iai tatou le olaga fou, ma auala e faatino ai. O le olaga fou ua tatou maua lea ia Keriso Iesu, o le Agaga o le Atua. O le atoaga o le soifua o le Atua- ua faailoa mai lea i le Tamā, le Atalii, ma le Agaga – mo lo tatou faaolataga.

I lenei vaega o le tusi o Roma, ua faailoa mai e Paulo nei mataupu taua e uiga i le tulafono ma le oti (o ni mataupu taua e pei ona talanoaina i le mataupu e 7).

O le va’aiga ua faailoa mai le tali o le fesili, e lē o le tulafono a ua aumaia le saolotoga, e lē o le oti a ua aumaia le ola. E le gata i lea, e lē o le tulafono, a o le olaga fou ua taitaiina e le Agaga. O lenei ala fou e le o se auala e toe faia e se tagata peitai, o le ala fou ua faia e le Atua. O le Atua lava ua faia e ia le faaolataga, ua mau faatasi ma tatou, e le o se faaolataga e le tu mamao ma tatou, a’o le Atua ua mau faatasi ma tatou i aso uma.

O le tulafono na te faatonua oe i mea e tatau ona e faia, ma faataunuu. A soli le tulafono, ona o’o mai lea o le faasalaga peitai, o le olaga fou

e ala i le Agaga ua faailoa mai le ala tonu e tatau ona tatou faia. E i ai mea sesē i lo tatou ola peitai, tatou te galulue faatasi ma le Agaga na te fesoasoani mai, a’o tatou feagai ma mea faigatā. O le meaalofa sili lea mo i tatou, ua foaina mai e le Atua mo i tatou.

Tatalo: Le Alii e, fesoasoani mai ina ia fiafia e faailoa o matou sesē, nai lo le faia o mea sesē e aunoa ma se faamoemoe. **Amene.**

Mafaufauga loloto; O a ni tulafono ua ou tusia ma faaleagaina ai a’u ona o le lē tausia o ia tulafono?

Aso Faraile Novema 10, 2017 ‘O le oti, e maua ai le manuia’
(Being dead can have it’s advantages)

Tusi Faitau; Roma 7:13 – 25

Matua: Roma 7: se vaega o le ff, 24,25. *‘O ai sē laveai ia te a’u ai le tino o lenei oti? Ou te faafetai lava i le Atua, auā o Iesu Keriso lo tatou Alii.’*

E lima vaega o le rane (frog), e mafai ai ona ola ai o ia. Pe a o’o mai le taumalūlū, ma foliga ai ua mate. E fitu sefulu pasene o le vai, o loo i le manava o le rane (frog), pe a malūlūina, ona taofia lea o le tātā o lona fatu, ua le gaoioi ma foliga ua mate. Pe a oo mai le tau tutupu (spring), ona toe fo’i lea o le rane (frog) i lona tino sa faapea ona i ai, ua toe tātā le fatu ma ua toe foi mai le malosi, ona tula’i lea ma osooso ma le fiafia.

Ua faailoa mai e Paulo le oti, e faamalamalama ai le ola e faaolaina ai, faapea le faaolaina o le tagata ao agasala pea. E faapefea ona e tu’uese se mafutaga e tusa ma aiaiga faale-malo?

O le oti – o se vaaiga le lelei auā ua tatala ai mafutaga ma tagata. O le tulafono e matautia lona malosi – O le oti na te aumaia le faasalaga peitai, o le oti e leai sona malosi, e oo i ai latou ua maliliu atu. O le ā se malosi ua tatou faapea atu ai, ua faaolaina i tatou mai le tulafono, le agasala, ma le oti? E faapefea ona iloa ai ua faaolaina i tatou e le Atua i lona alofa tunoa? O le mafuaga o nei manatu, ona o tatou ua oti, ua oti faatasi ma Keriso. O le mea lea ua le mafai e le oti ona taofia i tatou ma pule ai auā ua tauamiotonuina i tatou ma ola i le

olaga fou ia Keriso. I lenei lalolagi, o le pule sa pulea ai i tatou i aso ua mavae ua ave’esea, auā ua oo mai le faaolataga ia Keriso a’o agasala pea. O le amiotonu e le atoatoa ma paūū ma o’o mai le oti peitai, o nei vaivaiga ua tauaveina e Keriso, ma tu’ueseā ma faaolaina ai i tatou, i lona alofa tunoa.

Ua toe faamanatu mai le tala i le frog na foliga ua mate i le taumalūlū peitai, ina ua toe ola mai le frog e pei lava ona ola ai ma faaauau i lona si’osi’omaga e pei ona ola ai. E faapea foi i tatou ua maua le ola fou, e pei ona faia e Keriso.

Ia manuia lou aso fanau alii Matini Luteru. (10 Novema 1483)

Tatalo: Le Alii alofa e, O le faaolataga o se meaalofo mo a’u, o lenei ua o’u tu atu ma folafola atu. **Amene**

Mafaufauga loloto: Ia tuuina ou lima e avea ma faamalologa mo i latou o loo fia maua se fesoasoani.

Aso Toonai Novema 11, 2017 ‘O suli o le Atua’

(Heirs of God)

Tusi Faitau: Roma 8: 1 – 17

Matua: Roma 8: 17, *‘Afa’i foi o fanau i tatou, o suli foi, o suli lava o le Atua, o suli faatasi ma Keriso; pe afa’i tatou te tiga faatasi ma ia, ina ia faamanuiaina foi i tatou faatasi ma ia.’*

O la’u uō sa galue i le Territorial Army, o le vaega’au a le UK’s e galue faa-vaitaimi. Na o’u talanoa i ai, i le avea ma tagata fitafita e galue faasoloatoa peitai, na tali mai ma le lē manuia ma faapea mai, ‘ua na o se tagata galue faa-vaitaimi’. O nai upu faaaloalo na faailoa mai o le SAS – ‘Saturday and Sunday’, ma le STABS – ‘Stupid T.A, Bs ...

I le lua afe tausaga ua tuana’i sa avea ai le ‘Kerisiano’ o se upu lē lelei ma faatauvaa, ma faapea mai, ‘o le Keriso a tamaiti’ (little Christs). I le lalolagi o tapuaiga tetele, o loo i ai i latou ua faatautaia le tulafono o le tamaoiga, faapea i latou ua i ai le poto e faia ai mea uma, ato ai ma le aga’i mai o lenei faalapotopotoga laititi, e tapua’i i le kamuta.

O le Alofa Tunoa: o le ‘ofu’ofu o lea ma le tumau e faavavau o le Atua ua ia faailoa mai, o tatou o lana fanau uma e ala ia Keriso Iesu. Ua taunuu le faaolataga ia Keriso Iesu, o le atoaga o le loto faamagalō, faapea le ofoina mai o le olaga faale-agaga.

O i tatou ua avea ma upu faatauva’a peitai, o i tatou e le o ni tagata e faafoliga ma avea ma Kerisiano laiti. O le ‘ofu’ofu o le Atua ma lona alofa tunoa ua tatou maua ai le mafutaga ma le Atua ma ola ia Keriso Iesu. O le mea lea tatou te auai ma ona puapuaga, i lenei avanoa lelei ma le loto fiafia.

Tatalo: Le Alii e, fesoasoani mai, ina ia ou iloa le aua’i faatasi ma lau afio, ma luina le lalolagi ma ona faigatā. **Amene**

Mafaufauga loloto: O aso uma o’u te fiafia ma faafetai, ona o le Alofa tunoa o le Alii ua ou maua.

‘O a’u lenei’

Martin Luther 500th anniversary

Faith

(saunia e Kristina Andreasson)

Aso Sa Novema 12, 2017 ‘O le fa’aolataga, e fa’aaauu pea i aso uma’ (Saved, again and again every new day)

Tusi Faitau: Roma 10: 4 – 13

Matua: Roma 10: 9, *‘Afai e te ta’utino i lou gutu i le Alii o Iesu, ma faatuatua i lou loto ua toe faatuina mai o ia e le Atua nai e ua oti, e faaolaina ai oe.’*

E faapea le tala a Kristina Andreasson, i Lonetona ia Novema, o le taimi o le tau, ua to’ulu ai lau o la’au (autumn). Ua oo mai foi le tau malūlū ma le pogisa. Ua faailoa mai foi i le lagi ata o le pogisa, ua atagia ai le pogisa o lo tatou ola faapea lo tatou lalolagi; o timuga ua faailoa mai loimata ua maligi. O le faatalitali atu i le oo mai o le malamalama i le tau totogo (spring), e le’i taitai ona oo mai. Pe faapea le faaolaina o se mea e mamao lona faataunuuna?

I le tusi o fesili ma tali na faaaogaina e le Lotu e aoaoina ai fanau mo le olaga kerisiano (The large Catechism), Ua faailoa mai e Matini Luteru le mafutaga ma le Atua, e iloa ai le talitonu o le loto i le Alii. O le faatuatua, o le mea e faamoemoe i ai le loto i aso uma, e le na o le aso e tasi a'o aso uma.

Pe a uma le faamoemoe pei o lau la'au ua malili i le eleele, e faapea foi loimata maligi ina ua oo mai le tau malūlū, o le faatuatua i le Atua o lē na faatuina mai le oti, ma manumalo ai o Ia i le pogisa ma faailoa i ai tatou, le agalelei ma le alofa. O le upu moni lea e tumau ma faavavau.

O laula'au o le taumalili, ma lona lanu ua faatetele lona lanu mumū; o lanu mumū ua pei o le alofa e le gata lona faailoa mai e pei o le aso o le Eseta, ae faapea fo'i le pupula mai ma mumū, o le amataga lea o le oso mai o le la, i le aso fou.

I le laititi o le laula'au mumū, o lo'u faatuatua ua ou mafaufau ai ia Matini Luteru ma lona olaga. I le malūlū ma le o'o mai o le tautotogo, na ou lagona ai lo'u faaolaina; o lo'u loto ua tuuina atu ma le alofa i taimi o le pogisa o le loto, ae na ia faaolaina a'u.

Tatalo: Le Alii o le ola, ia ou iloa lou alofa o loo i ai le malosi sili e feagai ai ma le malosi o matagi i le tau malūlū. **Amene.**

Aso Gafua, Novema 13, 2017 'O le faatuatua ua faailoa mai i upu a tagata' (Faith through the words of other people)

Tusi Faitau: Roma 10: 14 – 17

Matua: Roma 10: 15,17, *'E matagofie naua o latou vae o e au mai le tala lelei i le manuia!' O lenei, e tupu le faatuatua i le taulogologo atu, o le taulogologo atu foi o i le afioga a le Keriso lea.'*

E faapefea ona o'u iloa i latou, o vae matagofie o loo aumaia le tala lelei? Pe ou te iloa ea i latou i mea o loo tumutumu ai tagata ao savalia ala lavelave o Oxford? Pe o'u te iloa ea i latou i le toatele o tagata o loo faailoa a latou galuega? Pe o'u te iloa i latou ao savalia mea o loo matou nonofo ai? Pe ou te faalogoina ea le upu a le Alii ua fetalai mai?

Ou te talitonu, e faapea ona faailoa mai o le upu a le Alii. O se tamaita'i talavou i le tumutumu o auala, ua taumafai e faailoa mai magāala i tagata turisi, latou te iloa ai le ala tonu oloo latou fia maua.

O le tagata ofisa ua fialia ma faatalofa mai, ao savavali atu tagata i a latou galuega. O le toeaina mātua i le faleoloa, o loo i ai le fāata i lo matou neighbourhood, ua fesili mai ma faapea mai, poo a mai lenei taeao, ma le faamoemoe ina ia manuia le faaiuga o le vaiaso.

I tu ma aga faa-Luteru, e ogatotonu le Upu a le Alii i totonu ma manatu, ua avea ma Upu e tupu ai le faatuatua.

Ou te le iloa le soifuuga o le tamaita'i na faasinosinoa le ala i turisi, le soifuuga o le tagata ofisa na faailoa mai i tagata a'o aga'i atu ia latou galuega, faapea foi le toeaina o lo matou nuu na faamalo mai. Ou te le iloa foi le uiga o lo latou faatuatua peitai, o a latou upu uma, ma le matagofie o ala na latou faailoa mai, ua avea lea e faamalosia ai lou faatuatua.

Ia latou upu, ua ou lagona le Atua ua fetalai mai. Afai e te faalogologo ia latou upu, e tumu le loto i le faagaetia, ua faamafanafana mai i lou loto, ma le uma le fialia i le tagata ua ia au maia upu matagofie mo a'u.

E matagofie naua o vae o e 'au maia le tala lelei i le manuia. Pe afai tatou te faalogo iai, tatou te faalogoina pea le upu fetalai mai i lenei aso. E faapea le faailoa mai e aga'i ai i luma, ma le fialia la tatou savaliga. Ou te talitonu, e faapea le galuega a le Atua, na te faailoa mai i ai tatou upu i lea aso ma lea aso, e ala i o tatou tagata.

Tatalo: Faafetai le Atua ona o lau Upu o le faamoemoe, ma le olioli o le malosi sili, e tumau ai i lea aso ma lea aso. **Amene**

Mafaufauga loloto: Faamatala i le tagata, e telē i iloa muamua, se mea manaia ua e iloa ma fialia i ai lou loto. O lea se mea e ona tupu mai?

Aso Lua, Novema 14, 2017 'O le faatuatua e lavatia mea uma.'
(Faith holds something more)

Tusi Faitau: 1 Korinito 1: 18 – 25

Matua: 1 Korinito 1: 20, *‘E le ua avea ea e le Atua le poto o lenei lalolagi ma valea?’*

O le atunuu o Suetena (Sweden) o se atunuu e iloa ai le olaga faale lalolagi (secularized country), e pei ona faailoa mai e le tamaita’i o Kristina Andreasson.

E tau le maua ni tagata e faailoa le olaga faatuatua i le Atua. O le mataupu faa-saianisi, faapea le mataupu faale faatuatua, e matau atu e fete’ena’i, ma ua avea le mataupu faa-saianisi, ma mataupu maualuga ma faasilisili i le loto o le tagata. O a’u na ola ae ma le fiafia i le mataupu faa-saianisi, faapea le mataupu i le faatuatua, na avea a’u ma foma’i ao avea lo’u tamā ma faifeau ma lo’u tinā.

O le Lotu i Sweden, e i ai lana aganu’u e fa’ataua ai le faa-saianisi i se vaaiga taua. O la matou Epikopo (Archbishop) o Antje Jackelen, na te fa’ataua tele le mataupu faa-saianisi. O le mea lea na ou manatu ai, o mataupu ia e o faatasi, o le faa-saianisi ma le faatuatua, a ui ina ‘ese’ese ana matafaioi.

Ua faapea mai talitonuga o Matini Luteru, o le faatuatua, ua faailoa mai le saili atu i mea e le o va’aia. O le iloa faale lalolagi, o mea ia tatou te iloa ai o mea ua tatou fia iloa; peitai o le faatuatua ua aumaia i ai tatou se isi va’aiga ese.

Ua tatou maua nisi uiga lelei i lenei aso faapea foliga o le lalolagi i lenei aso. Tatou te le o iloa mea e ona tutupu i le aso taeao peitai, tatou te talitonu ma le faatuatua, i le oo mai o le aso taeao ma ona manuia. O le faatuatua o loo i ai ma le faamoemoe. O le faatuatua, ua avea ma faitotoa pea le faailoa mai e le lalolagi manuia mo i tatou. I le faatuatua i le Atua ma lona alofa, ua avea ma faamalama o le alofa e tupu ai pea le faamoemoe, ma le vaavaai atu.

Tatalo: Au maia le faatuatua ina ia o’u tauaveina le faamoemoe, poo le a lava mea e ona tutupu i le asō, faapea taeao. **Amene**

Mafaufauga loloto: Faitau i galuega a se saianitisi e te fiafia i ai. O leā se mea ua e iloa i a latou galuega? Pe ona tupu ai se faatuatua?

Aso Lulu Novema 15, 2017, ‘Saili atu i le alofa tunoa o le Atua’
(Seek God’s Grace)

Tusi Faitau: Kalatia 2: 15 – 21

Matua: Kalatia 2: 21, *‘Ou te le faaleaogaina le alofa tunoa o le Atua; auā ana oo mai le amiotonu e ala i le tulafono, po ua maliu fua Keriso.’*

O lau uō e masani ona ma savavali i ala uumi o Lonetona, ma fia iloa le ese o le faataatiaga o lo matou nuu, o se mafutaga e ese ma le fiafia o lenei savaliga.

E le mamao atu ma le nofoaga pisi i King’s Cross, o le a e va’aia ai ala matagofie o i ai faletuai, faapea moli o loo mumū mai. O le auala e vāapiapi ma maamaā, o le ala sa feoi ai taavale solofanua i ia aso.

I le to’a malie o le savili i le po, e matagofie le savaliga i le Thames ma lona siosiomaga. O le musika ua lagona i le loto, a’o savalia le auvai i sasa’e, ma pesega ua fiafia ai la’u savali ma ua avea ma pese malie i le loto.

E faapea le saili atu i le Atua ma le faailoa mai o lona alofa tunoa. Ou te fiafia i lenei savaliga, aua ua o’u maua le faailoa mai o le alofa tunoa o le Atua, ua fa’aali mai i nofoaga e soifua ai tagata faapea mea o loo ola ai.

Ua faamanatu mai, ina ia ou saili i aso uma i lo’u olaga. E ui lava ina foliga itiiti i nisi aso peitai, e le fa’agaloina e le Atua lona alofa tunoa mo i tatou. E taitaiina i tatou i ala na tatou le manatu i ai peitai, o le ala ua susulu mai ma le pese malie, ua faatumuina ai le loto i musika. Ua va’aia le savaliga i lenei aso, o se mea e faia pea i aso uma, ma iloa ai isi mea matagofie ua ou iloa.

Tatalo: Le Alii o le ola, faafetai ona o lou alofa tunoa ua matou maua, e ui ina vāapiapi i la’u vaai peitai, ua avea ma ala e tumau ai i aso o lenei ola. **Amene**

Mafaufauga loloto: Savali ma vaai i mea laiti ma o latou uiga ua faailoa mai. Ia tuu i ai ou manatu. O le a se mea ua e iloa?

Aso Tofi Novema 16, 2017 ‘O le alofa ua fusia ai i tatou’

(A loving link between us all)

Tusi Faitau: Kalatia 3:23 – 29

Matua: Kalatia 3: 27 – 28, *‘Auā o outou uma lava na papatisoina ia Keriso, ua outou oofu ia Keriso, e le o i ai se Iutaia po o se Eleni, e le o i ai se pologa po o se sa’oloto, e le o i ai se tane po o se fafine; auā ua tasi lava outou uma ia Keriso Iesu’.*

O la’u faia’oga i le gym, e masani ona ma talanoa i le faatuatua, faapea le Atua ma Iesu pea oo ina malōlō. O le tagata Nigeria na ola ae i le UK, ma faailoa mai ona manatu fou, ma ua faatupu tele ai lou fiafia ia te ia. I le taimi sa ma feiloai ai muamua i le gym i faipelega, e fou foi la latou vaai ia te a’u peitai, matou te lolotu faatasi. O iinā na maua ai le so’otaga, ma feso’otai ai o lagona ma manatu.

A o faia le a’oga i faipeleega i le vasega, na o’u va’aia i latou sa aua’i. O tagata laiti, faapea tama ma teine e ‘ese’ese mea na ola ane ai. E tele tagata mai le UK, faapea Farani, Turkey, Sweden, Romania, Italy, faapea Nigeria. O tagata ‘ese’ese ua fusia faatasi ma taliē ma mafuta faatasi i lenei a’oga.

Ou te le o iloa le faatuatuaga o loo latou soifua ai peitai, ua le avea lea ma faafitauli ia te au. Auā, o le Atua o le malosi sili lea e pei ona faailoa mai e la’u faifeau Epikopo ia te a’u. O le Atua ua aumaia le papatisoga, e tumau pea ma a’u i aso uma, ma fetalai mai, ‘o i tatou uma ua mafuta faatasi, e ui ina ‘ese’ese o tatou tu ma aga, faapea ‘ese’esega na tatou ola ae ai’.

E faapea lo tatou ola, o mea uma e foliga e ‘ese’ese, na faapea foi ona le vaايا le isi i le isi peitai, o le alofa tunoa ua fusia i tatou uma, faapea le papatisoga ua faailoa mai le alofa o le Atua, tatou te mafuta faatasi ai i mea uma

O la’u faia’oga ua fesoasoani mai ina ia o’u malosi. O lea foi le fautuaga, ua ia faateleina ai lo’u faatuatua. O lo’u faatuatua e feso’otai ai ma tagata, auā o le Atua lava ua faailoa mai, o i tatou uma ua mafuta faatasi, i le alofa tunoa e ala ia Keriso Iesu.

Tatalo: Le Atua o le ola, faafetai i lou faailoa mai, o i matou o tagata uma ua mafuta faatasi, e ala ia Keriso Iesu. **Amene.**

Mafaufauga loloto: O ana fea na e feiloa'i ai ma se tagata, ua feiloa'i ma mafuta faatasi?

Aso Faraile Novema 17, 2017 'Peā lu'iina le faatuatua' (When faith is challenging)

Tusi Faitau: Filipi 3: 7 – 11

Matua: Filipi 3: 8, *'O lenei foi, e moni lava, o lo'u manatu ua le aoga mea uma lava ona o le silisili ese o le poto i la Keriso Iesu lo'u Alii; ona o ia ua ou faaleaogaina mea uma, ma ou manatu o otaota lava ia mea, ina ia o'u maua Keriso'.*

I le tele o taimi i aso uma, o'u te faalogo ai e faapea, 'O le filifilia o le Atua, o le filifiliga ina ia faapea ona tali atu e leai, i le tele o mea e ona tutupu mai'.

I le avea ma se tamaita'i talavou, ma avea ma faifeau i le atunuu o Sweden, le atunuu e faamuamua le ola faale lalolagi, ou te manatu e i ai taimi e le maua ai se to'a malie i lo'u loto. E i ai taumafataga a faalapotopotoga ou te le fiafia i ai, ona o le faailoa mai, o'u te tula'i e faia se molimau e tusa ma le faitauga o le Tusi Paia, pe faailoa le tala faasolopito faa-kerisiano. O se mea faigofie i tagata i mea o loo auauna i ai peitai, e le faigofie lo'u olaga feso'otai ma le Ekalesia.

O le mea sili lea ona faigatā ia te a'u ma la'u filifiliga, i le avea ma tagata o le Ekalesia faapea le a'oa'o ina avea ma faifeau. Ou te le manatu o se filifiliga lea. A ua faailoa mai e Matini Luteru le faatuatua, o le meaalofa a le Atua ua tuuina i o tatou loto, ma o lo'u manatu o le mea sili lea. O lo'u faatuatua ua avea ma meaalofa sili, ou te fiafia e faailoa.

I le tusi i Filipi e pei ona faaliliuina e le Swedish translation, e faapea; **'Ou te togia lea i le fa'aputuga o lapisi'**. Ia te a'u, o nei upu ua faatupuina ai lou fiafia. Pe faifeau, pe leai foi, o lo'u faatuatua o le meaalofa sili lea ua aumaia lo'u faamoemoe, ua faamanatu mai ina ia manatua o'u tuaoi, o le alofa e faatula'i mai pe'a ou paū, faapea le

alofa ou te mulimuli ai pea i aso uma. O le olaga e pei ua lafoa'i i le lapisi peitai, o le meaalofa a le Atua ua ia tuuina i lo'u loto, o le auro sili o'u te vivii ai pea i le Atua.

Tatalo: Le Atua alofa e, o'u te tula'i e tusa ma o'u talitonuga. Peitai, e i ai taimi o le lē mautonu, faapea mafaufauga ua sesē ese ma lau afio, faamolemole fesoasoani mai. Faamanatu mai le faatuatua ua i totonu o matou loto, o le meaalofa e ao ona fa'atāuaina. **Amene.**

Mafaufauga loloto: E tele mea taua i le olaga. O le a se mea ua e maua i le filemū o le po? O le mea sili lena e tatau ona fa'atāuaina.

Aso To'onai Novema 18, 2017 'O le Atua alofa' (God is love)

Tusi Faitau: Efeso 2:1 – 10

Matua: Efeso 2: 4-5, *'A o le Atua, ua i ai le faulai o le alofa, ona o lona lava alofa tele na ia alofa mai ai ia i tatou, a o oti lava i tatou i amio leaga, ua na faaola mai ia i tatou faatasi ma Keriso; (o le alofa tunoa ua faaolaina ai outou;)'*

I le Swedish Church i Lonetona, o le a e maua ai se vaaiga e faigofie ona e iloa, o le laulau e ofoina atu ai le agaga tapua'i ma avatu ai o foa'i (altarpiece), ma ona upu ua tusia ma faitauina faapea: **'GOD IS LOVE'**

Ua tatou ola i lenei lalolagi, ua tau le iloa upu ona o le lē manino. O tulafono ma faatinoga, o le vaaiga lea e tatau ona iloa e tagata uma, o upu e tatau ona manino ma matamata tetele i vaitusi ma silafia ai peitai, o le lalolagi o vaaiga ua fiafia e tau faale iloa upu, i vaaiga taupulapula. I lenei lalolagi, tatou te moomia le alofa, auā o le alofa e ese ana tulafono.

O le laulau e ofoina atu ai le agaga ma le foa'i (altarpiece), o se vaaiga fiafia lea. O le laulau o loo manino ai upu, **'God is Love'**. Tatou te o mai i le lotu, ona o mafua'aga tatau: i taimi o le fiafia faapea taimi o le faanoanoa, i taimi o le faamoemoe faapea taimi o le atuatuvaale, faapea le mā ma le faalumaina. Peitai, o le laulau o le alofa, o se mea tatau lea e faamanatu mai le alofa o le Atua, e tumau

pea ma tatou i taimi uma o lo tatou ola. O le uiga lea o le faatuatua i le alofa tunoa, ma le agalelei o le Atua i tagata uma.

O le faatuatua i le alofa tunoa e tau aveina a'u i aso uma o lou ola, ma faamanatu mai, e le gata ina ola, a ia faailoa atu le ola e le uma.

Tatalo: Le Alii alofa e, seia e faailoa mai o lou alofa e gafatia ai mea uma. **Amene**

Mafaufauga loloto: Ia tali atu i le fesili o loo atagia ai le alofa. Poo le a maua ai le fesili e pei ona fesili mai? Mafaufau i le alofa o loo faamasinoina ai i tatou.

Faitauga mai ia Mataio

(4) 'Iesu- O le lui, ma le luiina'.

Jesu- challenged and challenging.

(saunia e John Holder Archbishop Anglican Province of the West Indies)

Aso Sa Novema 19, 2017 'Ia faamatu'u ma savali atu e iloa ai le faatuatua'. (Letting go and stepping out in faith)

Tusi Faitau: Mataio 22: 1 – 14

Matua: Mataio 22: 4, *'Ia outou fai atu i e na tala'iina, Faauta, ua ou saunia mea e taumafa, ua fafasi a'u povi ma a'u mea pepeti, ua sauni foi o mea uma; ina o mai ia i le tausamaaga'*

Ua fa'aailoa mai e le tusi tala i lenei taeao, le Faifeau Epikopo o John Holder, le fa'ata'oto e pei ona faailoa mai e Mataio, o nisi o va'aiga faapitoa na luiina ai Iesu, a o feagai ma lana galuega. E faapea foi va'aiga e luiina ai le tagata e mulimuli ia Iesu, ma faia lona finagalo.

O le luiina o Iesu e pei ona faailoa i lenei faataoto, o le faailoa atu lea o le upu fou, o le mafutaga a le Atua ma lana fanau, o se faatinoga na le talia e tagata ma o latou manatu. O le mea fou ua ofoina atu, e tusa lea ma le valaaulia i le faaipoipoga, o se mea fiafia lea i le ulugalii o le'a faaipoipo ae faapea foi matua ma aiga.

O le valaau, ina tuua o mea uma o loo faia e le tagata, a e auai atu i le fiafia ua valaauina peitai, na le talia e tagata le valaau a le Tupu, ma iloa ai le aloaia o le valaau taua e pei ona valaau atu.

O le faataoto ua luita le Au Kerisiano faapea tagata uma, ina ia tautuanā ma le lototele ina ia faamatu'u mea o loo fiafia ai, a ia savavali atu ma le faatuatua e pei ona valaauina ai i tatou. Ua faailoa mai e le Atua ala lelei tatou te tali atu ai. O le Agaga o le Atua o loo faatasi ma tatou ma taitaiina i tatou pea faamatu'u mea uma o loo manatu i ai. E faapefea ona e tali atu i le Alii i lenei taeao ma lana valaau mai?

Tatalo: Le Alii e, pe a feagai ma faigatā ma lē faamatu'u ai manatu ina ia faia lou finagalo, seia e fesoasoani i lou alofa, e te ta'ita'i ma faamalosi mai ia te a'u. **Amene.**

Aso Gafua, Novema 20, 2017 'O le malosi o Kaisara ma le malosi o le Atua' (The power of Ceasar versus the power of God.)

Tusi Faitau: Mataio 22: 15 – 22

Matua: Mataio 22: 21, *Ona fetalai atu ai lea o ia ia te i latou, "O lenei, o mea ia Kaisara, ia outou avatu ia Kaisara, a o mea a le Atua ia avatu ia i le Atua."*

Ua luita pea Iesu e pei ona iloa i lenei tala. Ua fesiligia o ia e tagata, ina ia faailoa le lē aloaia o Kaisara e faatusatusa i le Atua, e pei ona atagia i le fuaiupu e 18; **"O outou tagata faafiaamionu, se a le mea ua outou tofotofoto mai ai ia te au?"** O le manatu o tagata e tofotofoto le Alii, ma le manatu, o leā tali mai nei Iesu, o mea e 'ese'ese e le tatau ona tu'u faatasia. O le talanoaga o loo faailoa ai le malosi, ma lē ana le malosi uma lava. O le faatusa o Kaisara, o loo iloa lea i le ata o le tupe. Ona ia faapea atu lea i tagata, **"O le faatagata lea o ai, o le a foi lona tusi?"**

O le tupe, o loo faailoa ai le lē tumau o lea malosi. E oo ina le iloa, e faapea foi ona toe faatulaga lona tau, ma oo ina faaitiitia ma le maua le malosi e pei ona sa i ai. E faapea foi ona toe fuafua lona fa'apaūina o lona malosi.

Peitai, o le Atua e pei ona faailoa e Iesu i le tusi a Mataio, o le Alii e leai se na te fuafuaina lona malosi. O lona malosi e lē ma faitaulia, o lona malosi e leai sona gata’aga, ua faailoa mai lona mau faatasi ma tagata, faapea ai ma Kaisara.

O le loloto o le iloa o le malosi e tumau faatasi ma le lalolagi. E pei o le mutia i le eleele (e pei ona maua ia Mataio 5:30) e oo ma i le asō, ma toe magumagu taeao. O le lē mautonu o manatu e uiga i le malosi, e tatau ona tatou toe silasila i le faailoa mai e Keriso lona finagalo mo i tatou.

Tatalo: Au maia i ai matou le Alii, ina ia fa’aaogāina le malosi ua e tuuina mai, e iloa ai le potu ma le agalelei. **Amene**

Mafaufauga loloto: E faapefea ona e fa’aaogāina le malosi ua aumaia e le Atua ia te Oe? Tatou tatalo i le ta’ita’iga a le Atua, tatou te faailoa ai le agalelei.

Aso Lua Novema 21, 2017 ‘O le malosi o le oti, ma le malosi o le Atua’ (The power of death and the power of God.)

Tusi Faitau: Mataio 22: 23 – 33

Matua: Mataio 22: 23, *‘O lea aso ua o mai ai ia te ia satukaio, o e taofi, e leai se toe tu; ua latou fesili mai ia te ia’*

O le fuaiupu ua agatonu ai le fa’atalanoaga.

O le toe tu, e pei ona faailoa e Iesu, o se mea taua lea i lona manatu. O le talitonuga e tatau ona maua e Kerisiano uma. O le tala ua tusia ma le faatuatua, ua maua’ a i loto o tagata.

Peitai, o le au satukaio ua taumafai e faaleaogāina le moni o lea mau, ma taumafai e ave’esea lea talitonuga e le moni. Ua latou le manatunatu, ina ia siitia le talanoaga i le malosi o le Atua, e mafai ai ona faia e le Atua mea uma. E pei o le tala i le valaauina i le faaipoipoga, faapea le tala i le totogia o lafoga ia Kaisara peitai, o lo’o i ai se vaega o i latou e pei o ni tagata ua saisaitia i le olaga ua le faitaulia.

I le toe tu mai nai le oti, ua fetalai Iesu, o i latou e toe tu, latou te le toe faiava, pe nofo tane, a e faapei i latou o agelu o i le lagi.’ O le toe tu, e le faitauina e pei o le numera e tuuina i totonu ma aofia ai le tagata peitai, o le talitonuga e tusa ma le faatuatua e faamaonia le malosi o le Atua i le ola, nai le oti.

O lenei lu’i ua lu’iina ai Iesu, o se vaaiga ua toe faamanatu mai le valaau, ina ia faafouina pea lo tatou faatuatua i le malosi o le Atua ma lona mana.

Tatalo: Faamalosia i matou e lau afio le malosi o le ola, ua toe faatuina mai le oti. **Amene.**

Mafaufauga loloto: O le talitonuga i le malosi o le Atua, e lui’ina pea le olaga i aso uma.

Aso Lulu Novema 22, 2017 ‘O le alofa i le Atua, ma le alofa i le tuaoi’ (Loving God and loving neighbour)

Tusi Faitau: Mataio 22: 34 – 46

Matua: Mataio 22:ff 34-35, *‘Ua faalogo le au faresaio ua le mautali ia te ia le au satukaio, ona latou faapotopoto mai ai lea i lea mea, ona fesili faatofotofo mai ai lea ia te ia o so latou, o le a’oa’o tulafono, ua faapea mai,’*

O le manatu autū i lenei vaiaso, o le ‘lu’i ma le lu’iina’, e pei ona iloa i faitauga o lenei vaiaso. Ua faailoa mai, le auai o le ‘au faresaio ma le ‘au satukaio, o faalapotopotoga e le tutusa o latou manatu i le mataupu i le toe tu.

O le faamoemoe i lenei mataupu, ina ia faamaonia le lē atoatoa o manatu o Iesu, faapea le lē sa’o o ana a’oa’oga. O le lu’i ua tuu atu ia Iesu, ina ia iloa ai le tulafono sili. Po’o se mea e tatau ona faailoa lenei mea? Ou te manatu o se mea e tatau, auā o le tulafono e iloa ai le mafutaga ma le Atua faapea o tatou tuaoi.

Na tali atu Iesu i le loia, ‘E te alofa atu i le Alii lou Atua ma lou loto atoa, ma lou agaga atoa, ma lou manatu atoa. O le poloaiga muamua lena ma le sili. O le tulafono sili o le alofa lea. Peitai, e i ai le feso’otaiga, e mausalī ai le alofa i ona tagata; ‘Ia e alofa atu i le lua te

tuaoi, ia pei o oe lava ia te oe' O nei tulafono ua atoatoa i ai le tulafono ma le 'au perofeta.

O le tali atu a Iesu, ua faailoa ai le Tolu Tasi Paia o le Atua - le Atua le Tamā, le Atua ua liutino tagata i lona Alo, ma le Atua ua mafutaina lona Agaga i ona tuaoi- o le so'otaga e feso'otai ai mea uma i le alofa. O le iloa o le alofa, e feso'otai ai le kerisiano ma ona tuaoi.

Tatalo: Le Alii e, ia avea au ma aupega o lou alofa. **Amene.**

Mafaufauga loloto: O le a se va'aiga e faamalosia ai oe i le alofa?

Aso Tofi Novema 23, 2017, 'O le loto maulalo, ma le auaunaga; o le ala moni e fa'aeaina ai'. (Humility and servanthood; the way of true greatness)

Tusi Faitau: Mataio 23: 1 – 12

Matua: Mataio 23: ff.11,12, *'A o lē sili ia te outou e fai lea ma a outou auauna. O sē e faamaualuga o ia ia te ia, e faamaulaloina lea; a o sē faamaulalo o ia ia te ia, e faamaualugaina lea'.*

O le avea ma sili, faapea le avea ma auauna, poo le faamaulalo faapea le faamaualuga, e faapea lava ona le feso'otai uiga i lenei olaga. Ua tuu faatasia o nei manatu e pei ona a'oa'o mai o Iesu ina ia iloa ai e le Kerisiano lona faamoemoe.

O le a'oa'oga a Iesu, 'A o lē sili ia te outou ia fai o ia ma auauna', o le faamanatu lea a Iesu i le ata o le tagata e mulimuli ia te Ia. O le mea silisili lea ona taua i le tagata Kerisiano. Ua ave'esea le manatu faapito, ma faailoa atu le fa'alagolago atu i le Alii, o le manatu sili lea e feagai ai ma nisi o manatu o le lalolagi. O le lui lea ua lūina ai le Kerisiano.

Ua lu'iina i tatou e Iesu, ina ia tula'i ma faailoa le lapataiga ma le faamoemoe ua faailoa mai, 'O se faamaualuga o ia ia te ia, e faamaulaloina lea, a o se faamaulalo o ia ia te ia, e faamaualugaina lea'

Tatalo: Le Alii e, ia e faatumauina a'u i le loto maulalo. **Amene**

Mafaufauga loloto: O fea o i ai le loto fou i lenei aso?

Aso Faraile Novema 24, 2017 ‘O le lu’i ua tula’i mai, i va’aiga i aso ua mavae.’ (Challenges of the emerging from the old)

Tusi Faitau: Mataio 23: 29 -39

Matua: Mataio 23: 39, *‘Auā ou te fai atu ia te outou, tou te le toe iloa mai a’u, seia outou fai mai, Ia manuia lē maliu mai i le suafa o le Alii’.*

O fete’enaiga i le va o ulua’i Iutaia Kerisiano, faapea ai isi ituaiga o Iutaia, ua iloa lea i tusitusiga i le Feagaiga Fou.

I le Mataio 23, ua iloa ai le maualuga o lenei ‘ese’esega. O le lu’i tele i le ‘Au Kerisiano, o le manatu o lo latou faatuatua e le talia, o tagata ua faatui’ese ma le tapuaiga faa Iutaia. Ua faailoa e Mataio faapea Paulo lea manatu. O le lē talia o le tapuaiga Kerisiano e tagata Iutaia, ona o le manatu, o le tapuaiga mai aso ua mavae, i tu ma aga faale Atua.

O le feau taua a Iesu, o le faailoa mai lea o le mea fou, o le ola fou ua faaolaina ai tagata uma. O le feau taua ina ia iloa le lē atoatoa o le olaga tuai ma faiga tuai, ae aga’i i luma ma le lototele i suiga fou ua faailoa mai.

O le feau taua, o le u’unai o le tagata ina ia aga’i i luma, ma tuu’ese le olaga tuai e pei ona tusia e Mataio 23:2. O le atoatoaga o lenei olaga fou o loo i ai lea i le lumanai: ‘Auā ou te fai atu ia te outou, tou te le toe iloa mai a’u, seia outou fai mai, Ia manuia lē maliu mai i le suafa o le Alii’

I le lumanai i le afio mai o le Mesia, e faaatoatoa ai mea uma e pei ona tusia e Mataio 23, o le faamoemoe lea o le Kerisiano, ma lona faatuatua ua faavae ai,

Tatalo: Aumaia ia i matou le iloa ma le lototele, ina ia tumau ai i le faamoemoe, a’o aga’i atu pea i luma ma le alofa. **Amene.**

Mafaufauga loloto: O a ni suiga o lou olaga i lenei aso?

Aso Toonai Novema 25, 2017 ‘O le ala faigatā i le fa’acaina ma le viiga.’ (The rugged way to a glorious victory)

Tusi Faitau: Mataio 24: 1 – 14

Matua: Mataio 24: 14, *‘E tala’iina atu foi lenei tala lelei o le malo i le atu laulau uma, e fai ma molimau i nuu uma; ona oo mai ai lea o le gataaga’.*

O le vaega o le Tusi a Mataio, ua tatou feagai lea, ma le oo mai o le aso o le gata’aga. O le molimau ma lona faatinoga, e pei ona taua i le Mataupu e 23, e faataunuunuina pea lona oo mai. Peitai, e pei ona maua i le fuaiupu e 24, o loo talanoa ai Iesu i le manumalo, o le faailoa atu o le manumalo o le tala lelei i atunuu uma.

O le ala i le manumalo, e le faigofie ala e fa’ataunu’uina ai. O le lepetia o le malumalu, o tagata tau faasesē o le a tula’i mai (f.5), o le oo mai o faiga fa’a-militeri, faapea le natura o le foafoaga ua faaleagaina, o le tuuina i puapuaga faapea i latou ua le faamaoni i a latou ta’utinoga (11,12).

I le feagai ma ia vaaiga, ua faamanatu mai i le Kerisiano, ina ia tumau i le faamaoni, seia oo i le gata’aga. O le vaaiga taua lea i le Kerisiano, o le tagata e faamaoni i le Alii i itu aso faigatā.

O le faitauga i le asō, o loo atagia ai le va’aiga i le ata moni. Ua valiina le ata o mea faigatā e pei ona maua i lenei lalolagi. O le va’aiga lea i le molimau a le Kerisiano e pei ona iloa e Mataio i ona taimi. O le fete’enaiga i le olaga faa-kerisano, faapea le olaga faale lalolagi, ua aafia ai le olaga kerisiano i tupulaga i aso uma.

O le olaga kerisiano moni, e le faigofie le tula’i mai, ma fua mai i fua lelei, e pei ona tatou mafaufauina.

Peitai, tatou te talitonu i le Atua alofa o loo mafuta faatasi ma tatou, ma pulupulu lima ma u’una’ia i tatou e aga’i pea i luma, ma faamalosi lou fa’amoemoe, ina ia oo atu ma aulia i le tini, o le faailoga o le manumalo.

Tatalo: Le Alii e, au maia lou alofa ina ia o’u aulia i le tini. **Amene**

Mafaufauga loloto: Po o e maua ea lenei faitauga i le faamoemoe?

Faitauga mai ia Mataio
(4) O le fa'amasinoga a le Atua.
(How God judges)
(saunia e Richard M Benda)

Aso Sa, Novema 26, 2017 ‘Ua valaauina oe’ (You’ve been summonsed)

Tusi Faitau: Mataio 24: 15 – 28

Matua: Mataio 24:16 -17, *‘o e o i Iutaia i ia ona po, ia latou sosola i mauga; o le ua i luga o le fale, aua ne’i alu ifo ia e ave se mea ai lona fale’.*

O le feau taua a le Tusi Paia, e faatatau i le oo mai o le taimi taua, faapea lo tatou ola ua manino ma faailoa mai. Ua tatou aga’i atu i le taimi o le gata’aga e taitasi ona faailoa ai o lou tagata i mea sa ola ai i lenei lalolagi.

I lenei aso, o le Atua o leā faamasinoina le lalolagi. O le faamasinoga e lelei lona faatinoga, o tagata uma ua ma’ea ma faailoa atu tusi samania i faamatalaga i mea e faia ai, i le taimi faapea i latou uma ua valaauina.

O le tusi faitau i lenei aso, o le tusi ua valaauina ai tagata uma. Ua faailoa mai e Iesu o le mea taua, ina ia ‘aua ona toe mafaufau i mea o loo tatou le oo atu i ai. O le valaauina ina ia tūtū ma le loto matala, ma tumau i le mea ua valaauina i ai, ma taofia le maua atu o le tagata i mea sesē e le tatau ona i ai, faapea le mafaufau ua le lelei faaiuga ua faia. O le upu faalototele, ina ia maua le agaga e iloa ai ma le lē faasesēina, e iloa ai le mea moni ma le mea e le moni.

I lenei auala ua vaaia ai i tatou o tagata ua tuuina atu o tatou manatu i mea lelei ma aogā, a o feagai ma le Faamasino Sili, oloo ia te ia le ātoaga ma le ki o le ola e fā’avavau.

Tatalo: Mafaufau i mea ua le atoatoa ai lau vaai. O a ni mea o loo e manatu i ai e te feagai ai ma le Alii, poo taitaiina ou manatu i le faitauga i lenei aso? **Amene.**

Aso Gafua Novema 27, 2017 ‘Aua le popole...tatou te iloa le Faamasino Sili’ (No worries ... we know the Judge!)

Tusi Faitau: Mataio: 24: 29 – 31

Matua: Mataio 24: 30,31, *‘... latou te iloa atu foi le Atalii o le tagata ua sau i ao o le lagi, ma le mana ma le mamalu tele. E aauina atu foi e ia ana agelu ma le leo tele o le pu, latou te faapotopoto foi i e ua filifilia e ia mai matāmatagi e fa, e amata mai le tasi tulu’iga o le lagi, e oo i le tasi tulu’iga’.*

E faatolu ona ou oo i le potu faamasino.

Muamua, na tuuaina sesē a’u ina ua ou ave’esea mea e faia ai le galuega: Lua, na ou tulai e molimau i le faamasinoga i le fasiotia o tagata i Rwanda (genocide); Tolu, o le faamasinoga e iloa ai lo’u aiga ma le mea o lo’o ou nofo ai. Ua tele lava taimi ua oo mai ai le agaga le fefe peitai, na ou le popole i se mea e tasi.

Ua faamatala mai e Mataio, se tala e foliga e silisili ese lona faailoa mai, ma le faagae’etia i lo’u loto, atoa ai ma le loto atuatuvaile. E ui i lea, o i latou e vaai atu ma le faatuatua, e tasi le mea e sili i lea vaaiga, ua iloa e i latou le Fa’amasino Sili, na te pulea mea uma. O Iesu Keriso, le Alo o le Atua, ae maise le tāua o le Atalii o le tagata.

O le iloa o lenei faaaliga, ua iloa ai mea uma e le lalolagi. O Iesu, o le Faamasino Sili o le a oo mai, na te iloa i tatou uma. O ia o loo faatasi ma tatou ma faaolaina i tatou.

Ua faamanatu mai e Paulo, o Iesu o lo tatou Ositaulaga sili ua oo atu i le lagi, o le Alii ua iloa i tatou ma faatoga atu e tusa ma o tatou vaivaiga, i taimi uma i le nofoalii o le alofa tunoa (Eperu 4: 14 – 16)

Pe afai e te molimau i se faamasinoga, ma iloa ua aga’i ina faigatā mea uma, pe e te fia maua se Faamasino faapenei? O le Faamasino na te iloa lou tagata lilo i mea uma, o le Faamasino na te iloa ou uiga ma mea o loo tutupu, o le Faamasino na te tula’i e tauaveina lou

faamasinoga a o lei tofia e avea ma Faamasino? O le faamasinoga faale tagata, pe a oo i mea e ono fesootai ai le tagata ma le Faamasino, ona alalaga lea o tagata e lē tatau ona avea se Faamasino, ma se tagata e tau i le Faamasino.

Peitai, i le soifuaga ma le galuega a Iesu, ua faaumatia ai e ia lenei fe'ese'eseaiga, e ala i lana galuega faaola.

Tatalo: Tatalo ia Iesu ina ia aumaia ia te oe le potu, e iloa ai o ia faapea lona iloa o oe. **Amene**

Mafaufauga loloto: Mafaufau ia Iesu, o lē ua tatalo mo lou faasalaga. O le a sana upu ua fai?

Aso Lua Novema 28, 2017 ‘Ua faafuaseia le oo mai o le taimi’ (An unexpected hour)

Tusi Faitau: Mataio: 24: 32 – 44

Matua: Mataio 24: 44, *‘O le mea lea ia outou nofo sauni ai; auā o le itu aso tou te le manatunatu ai, e sau ai le Atalii o le tagata’.*

I aso ua mavae a o o’u a’oga i le A’oga Faafaifeau i le Ekalesia Katoliko, e masani ona faia e faia’oga le su’ega fa’afuase’i e iloa ai le tulaga o le a’oga. Na i ai se vaaiga na ou iloa, o nisi na lē vevesi i le fa’afuase’ia o le su’ega.

I le isi itu, o le iloa o le taimi e faia ai su’ega, e le faapea o le a lelei ai le su’ega. Na ou iloa nisi o le vasega na le su’e a’o sauni le su’ega, atoa foi ma latou na su’e ma le lē faamaoni, i le toe su’esu’e o mataupu a o faia le suega.

O le faitotoa o le fa’acaina, o le lē faalagolago poo afea e faia ai su’ega peitai, o le nofo sauni i le aso e faia ai. Ua faailoa mai e Mataio, le faamanatu mai a Iesu i ona soo, ina ia aua ona maumau taimi e fia iloa ai le aso e toe afio mai ai. O nisi faitauga ua faailoa ai e Iesu, e oo ia te ia na te le o iloa le taimi e toe afio mai ai le Atalii o le tagata.

O o tatou taimi ua oo mai, ma o le agaga tatou te maua i le sauniuni ma iloa le tamāoaiga o le Atua, e pei ona ofoina mai i lea aso ma lea

aso. O fitafita tau, e sauniuni i aso uma i tapenaga e ui ina le oo mai o se osofaiga, e faapea foi le tagata tamo'e, e faatumauina ina atoatoa lona malosi i aso uma.

O le lui mo i tatou i le asō, ina ia maua le agaga sauni faale agaga i aso uma. Poo faapea ea ona faatino lo tatou olaga i le tatalo ma le tapuaiga, faapea le faitauina o le afioga a le Atua? Poo tatou faamuamua ea le faailoa o le alofa, le agalelei, le amiotonu faapea a'oa'oga lelei a Iesu? Pe afai o lea, ou te manatu ua saunia i tatou!

Tatalo: Le Alii e, ia e ave'ese lo'u manatu i mea o fia iloa, a ia e a'oa'o mai ia sauni i le fa'ailoa mai o lau afio, nei ma aso uma.

Amene

Mafaufauga loloto: Mafaufau i upu a Matini Luteru, 'Pe ana o'u iloa o le lalolagi e uma i le aso taeao, o'u te totoina le laau o le apu i le aso'. O le a se mea e te totoina i le asō?

Aso Lulu Novema 29, 2017 'Ia atina'e se sailiga manumalo'

(Building a winning case)

Tusi Faitau: Mataio 24: 45 -51

Matua; Mataio: 24: 45, 46, *'O ai foi le auauna faamaoni ma le mafaufau, ua tofia e lona alii e pule i ana auauna, ia avatu a latou mea e 'ai i ona itu aso? Amuia lea auauna, pe a sau lona alii e maua o ia o loo faapea ona fai'.*

O le ata o le 'Shawshank Redemption, o loo avea ai ma tama autū le alii o Tim Robbins, ua ia faamatala i ai latou ua avea ma pagota, i latou uma e faia le filifiliga i le olaga e galulue pea, poo le aga'i ina faavaivai.

O ananafi sa tatou feagai ai ma le nofo sauni e pei ona a'oa'o mai. Ou te faailoa, o a'u le isi tagata e faigatā le faamalosi, ina ia tumau i le nofo sauni i le oo mai o le gata'aga. O nisi taimi, o le faamalosi e tumau i le faamoemoe, e le faigofie, auā o le olaga o loo i ai ma le mafatia (stress), ma avea ma tagata ua fiu e faatalitali (destructive boredom). Peitai, o le mea sili ua faailoa mai e Iesu, le faiga e tumau ai i le faatalitali ma le fiu, o le atamai poo le pototo e maua ai le nofo

sauniuni, ma liliu i tiute tauave e pei ona faia i le aso, ma avea ma auauna faatuatua faamaoni.

O le fa'avae i le faiga o tulafono, faapea faasalaga, e le faamoemoe i se manatu o se tagata e manatu i ai peitai, e i ai fa'avae e faia ai o ia tulafono. E faapea foi le faamasinoga a le Atua. O le fa'aiuga i le faasalaga pe solofua, e fa'avae i luga o molimau. E fa'avae i au faatinoga ma faata'ita'iga, i auala lelei e iloa ai le faatinoga o o tatou tiute, faapea le soifua auauna e pei ona faia ai i tatou e le Alii.

Ua faapea mai Iesu i lenei taimi, ua faia lo tatou faamasinoga mo lo tatou manumalo i nei ituaso. O le fesili pe faapefea ona fai?

O le avea o le tagata, na te fa'asoa atu meaalofo a le Atua i le isi tagata, faapea tagata uma; o le avea ma tagata e galue ma le lē fa'avaivai, ina ia fua mai o ni fua lelei ma le matagofie i mea na faia e le Atua.

Pe a lē faatinoa o ia feau, ona atagia lea o lo tatou fa'atamala, ma le lē faia o ni suiga e lui'ina ai le lalolagi ua tumu i faiga lē amiotonu, ma faatupulaia ai uiga lē lelei, o le a a'afia ai le lalolagi o tagata.

Tatalo: Le Alii auauna lelei e, o lē ua faailoa mai i ai matou le ola, a'oa'o mai ina ia matou faia le amiotonu, ia faailoa le alofa ma le agalelei, ia matou savavali faatasi ma oe, ma faia ai o mea e pei ona e a'oa'o mai. **Amene.**

Mafaufauga loloto: O le olaga sauniuni, o loo i ai le olaga mafatia. E te manatu, e faapea le olaga o le Kerisiano o i ai nei?

Aso Tofi Novema 30, 2017 'O le a le uiga o le malamalama, e pei ona faailoa mai? (What has light got to do with it?)

Tusi Faitau: Mataio 25: 1 – 13

Matua: Mataio 25: 5,8, *'Ua tuai mai le faatoafaiavā, ona taufaitulemomoe ai lea o i latou uma, ua momoe lava. Ona fai atu lea o e vālea i e popoto, Au mai ni a outou suāuu mā matou; auā o le a mamate a matou moli '.*

Ua to’atele i tatou ua faalogologo i lenei lauga, faapea mafaufauga faale agaga, e uiga i lenei tala.

Ua faamanatu mai lenei tala, i le tele o taimi sa o’u i ai i mafutaga tatalo, a’o ou laititi i aso o le Penetekoso. Na o’u fa’ailoa i la matou faifeau, o a’u e masani ona moe pe a tā le itula e lua (2) i le vaveao. Na tali mai le faifeau, “o a’u o le teine laititi e tatau ona maua sau moe, e le tatau fo’i ona vave ala”.

O le faitauga i lenei taeao, e faapea le vaaiga na iloa i nei taupou e toalima. O le Atua, ua faamasino mai i lo tatou olaga, e gata le malosi faale tagata.

Ua ou mafaufau, e le faatatau lenei faataoto i le vaivai faale tagata, faapea le moe, ae faatatau i le mate o le suau’u, faapea le lē maua o le malamalama. Ua faamanatu mai Iesu, i le iuga e oo i ai, pe a le maua le malamalama, o le a lē iloa ai le taimi e oo mai ai le Atalii o le tagata.

I le Salamo e 119, ua faailoa mai e Tavita, ‘o le Upu a le Atua, o le sulu lea i o’u vae, ma le malamalama i o’u ala’. I lenei Salamo, ua taoto ai le atoaga o le Feagaiga Tuai, faapea le tusi ia Eperu, o le Upu a le Alii ma lana tulafono. Ua faailoa foi e Iesu, le tulafono ua atoatoa lea i le alofa, i le Atua faapea lou tuaoi.

O le malamalama o le tulafono, o le tulafono sili o le alofa lea. O lea ua faamanatu mai e Iesu, ia tatou faailoa le malamalama, ma faasusulu atu le galuega a le Agaga. O le taula lea o lo tatou nofo sauni i taimi uma e faamalolosia ai i tatou ma le mana o le Alii, a o tatou galulue pea, ma avea ma tagata e auauna lelei ma le faamaoni.

Tatalo: Le Agaga Paia e, seia e faamumu pea lo’u loto i le alofa, o le alofa e naunau i le Atua, faapea o’u uso tuaoi ma le lalolagi. **Amene.**

Mafaufauga loloto: Ia e iloa le o’o mai o le malamalama i mea uma. O le a se va’aiga ua e iloa ai, le Atua o i ai i mea uma?

Aso Faraile, Tesema 1, 2017: “E faasala pe a faavalevalea.”

Tusi Faitau: Mataio 25: 14-30.

Matua (ff.25-26): *Ua sau foi le ua i ai le taleni e tasi, ua faapea mai, Le alii e, na ou iloa o 'oe o le tagata faigata, ua e selesele i le mea e te le'i luluina ai saito, ua e faapotopoto foi i le mea e te le'i faata'ape'apeina ai mea; ona ou fefe ai lea, ua ou alu ma ou na lau taleni i le ele'ele, faauta, o lau mea lea.*

E talitonu, o le tasi lenei o a'oa'oga iloga i totonu o le Tusi Paia! 'Ua tele mea ua foa'i mai, peitai, e itiiti mea ua fa'aaoga i ai, po o le le faaogaina foi.' Ua fa'aaoga sese le tele o le tamaoaiga mai le Atua i faatinoga le amiotonu, a e maise o aitalafu tau faasese ua aafia ai le toatele! O nisi taimi e avea le manatu mama ae afaina mulimuli ane ai, o ituaiga faatinoga ia e le fautuaina aua e le faigofie ona toe faasa'o.

O le tele o taualumaga faale-tulafono, ma le faavalevlea i tulafono masani, e le avea e fai ma 'alofaga e faalagolago i ai le faaiuga o se faamasinoga. Peita'i, o le faavalevlea ona o se tulaga le ma'alofia, e sa'o, peitai, e mulimuli lava e fai le mea sese (Iakopo 2:7). "Le alii e, na ou iloa o 'oe..." Pe moni 'ea? Ailoga e sa'o. O le iloa o le Alii e faapei o le auauna muamua ma lona lua, o loo atagia ai le malamalama i le manuia e auala mai i le lima foa'i.

E iloga le agaga o le alofa e le iloa faasoa le tamaoaiga mo le manuia o isi, a e maise lava i le ola faaleagaga. Ua toto ma tupu le ola faaleagaga i le faia o mea lelei, o le poto lea ma le faaogaina tatau o le tamaoaiga i mea lelei e ola ai. A e le gata i lea, o le saunia foi lea o i tatou i le faalateleina o le tala lelei o le malo o le Atua.

O le tamaoaiga ua foa'i mai e le Atua mo i tatou, o mea ia e ao ona tatou faaogaina tatau, ia faaoga ma le tonu e lelei ai. E i ai i le faasologa o lo tatou ola, a e maise o le lalolagi na faia e le Silisili Ese, o avanoa tatou te faaogaina ai mea-alofa ma taleni ua foai mai ina ia tupu ma olaola pea.

O taleni o mea faigaluega ia ua foai mai ai lo tatou ola ma le si'osi'omaga o loo tatou o nonofo ai---o fuafuaga lilo ia o le foafoaga a le Atua. Aua nei na ona foa'i mai ma teu, aua e atagia ai le iai o le

paie ma le faapalapala; a e o le faavalevlea e faasalaina ona o le valea.

Talosaga: Mafaufau ma manatunatu i lou olaga, po o se tasi ua e masani ai, e ono faaaoga i ai lenei fuaitau, “Ua misia le avanoa.” Ia ole atu i le Agaga Paia e faatele le avanoa e auala mai ai faamanuiaga mai le Atua. **Amene.**

Mafaufauga Loloto: Ia mafaufau i le faataoto ma le finagalo o le Atua i le tuufaafegai ma le tagata? E i ai se taleni ua e natia e tatau ona faaogaina?

Aso Toanai, Tesema 2, 2017: “O le aso tele mo e sa galue!”

Tusi Faitau: Mataio 25: 31-46

Matua (ff.37-39): Ona tali mai ai lea ia te ia o e amiotonu, e faapea mai, Le Alii e, o anafea na matou iloa ai ‘oe ua fia ‘ai, ma matou fagaina ‘oe? Po o fia inu, ma matou avane e te inu ai? O anafea foi na matou iloa ai ‘oe o le tagata ese, ma matou talia ‘oe? Po o le le lavalava, ma matou faa’ofuina ‘oe? O anafea foi na matou iloa ai ‘oe ua ma’i, po o i le falepuipui, ma matou o atu ai ia te ‘oe?

Ua ou iloa ona faafeagai ma mea faigata, ua ou iloa foi le fiafia ona o aso faailogaina a o o’u i ai i Rwanda, ou te molimau i taimi o sauaga o le 1994, ua mavae atu ia faigata. O se tulaga e faanoanoa ai aua sa ou ‘auai ma molimau i le leaga o sauaga, o puapuaga e oo lava i le oti; a e o se fiafiaga foi lea molimau i le toatele o le ‘au uso kerisiano ma e le ni kerisiano sa onosai ma faapalepale i tulaga faigata---ua leai ni fale e nonofo ai, a e taumafai pea e fesoasoani ia laveaiina e ua vaivai.

O ia aso o le pogisa, sa ou nofo lava a o faafeagai ma mea faigata, a e filo ai le fiafia i mea lelei ma le agaalofo---e faapei o JP, o se tamaloa sa ou le masani ai a e le’i tupu sauaga. Sa ia taumafai e lavea’i ia te a’u, a e maise nisi matou te masani, e ui ina sa lamatia ai lona ola. E toatele sa ola pea i taimi faigata, e ui sa leai so latou potomasani i ia tulaga uma. Peitai, e fetaia’i pea ma tagata i aso faisoo, o loo faafeagai ma tulaga eseese o le olaga, o loo i ai manaoga e fia faailoa atu.

O i latou sa mafaufau ma manatua Iesu, o loo mafaufau pea i aso nei e oo lava i le iuga. A o ou tusia lenei faamatalaga, ua ou mafaufau i le ata o lona pe'uina faapagota: o se loomatua mai Asuria o loo ti'eti'e i le nofoa faataavalevale, ua piitia i le palapala i le tuaoi o Croatia, Hungary ma Serbia. O loo tagi aueue le loomatua, a ua tapunia le toe ulufale o se tagata i totonu o Europa.

A o lea foi taimi, o loo faalogologo i le leitio (radio), ua ta'ua ai ni tama taaalo mai le au o le Manchester United e toatolu. Ua tuu i ai le avanoa e nonofo i le fale-talimalo ua fuafuaina mo tagata e leai ni aiga e nonofo ai. O lenei fale-talimalo e le'i mae'a lelei ona fau, a e nonofo faale-tumau ai se ia uma le tau malulu.

O le aso o le faamsinoga a le Alii, o le lagi ma seoli, o mamoe ma 'oti ... o le toe aso lea o le Alii e leai se tasi na te iloa, o le aso ua faailoa mai i le tele o ata faale-agaga, aua nei manatu faatauvaa i ai. O le aso tele e faasino ia i latou o loo nonofo faatalitali pea, e foliga o se aso e maua ai le tau i o e sa faatalitali ma le agaga mautinoa. Po'o e manatu o 'oe o le mamoe i lea aso? Po'o e fesoasoani i e mafatia i lenei tiami? E foliga o se fesili e faatalasua, peitai, e uigā!

Talosaga: Ia pepese po o le tatalo i le pese

Tatala la matou vaai,
Matou te fia vaavaai ia Iesu,
Aapa atu ma pa'i atu ia te IA,
Aua tatou te alolofa ia te IA.

Nofo ma mafaufau pea i nai minute ma faalogo i le musumusuga a le Agaga o le Alii i ou taimi paganoa. **Amene.**

Mafaufauga Loloto: O fea na e vaايا ai Iesu i lenei aso?

FEAGAIGA MA LE FOLAFOLAINA O LE FAAMOEMOE I LE OLA FOU.

[Apoapoaiga mai le Tusi Paia NRSV ua saunia e Dafne Plou]

O Dafne Plou o le tagata tusi tala, e auai i taumafaiga ina ia faaleleia fesootaiga i auala faa-onaponei i le lalolagi. O ana galuega e fai, e faimalaga i le va o malo Latina Amerika e ta'ita'i i aoaoga faataitai ma fonotaga, na te saunia tautalaga taiala i fonotaga tetele. O le tamaitai e auauna ma galue i le Ekalesia Metotisi i Atenetina(Argentina). E galue i se aulotu i le faoa'aai o Buenos Aires, e faapitoa ana galuega i le fausia o mataupu e faatatau i le: "Fausia ma atina'e faasologa o tapuaiga." E 'auai lenei tamaitai i taumafaiga e unai aia tatau mo le itupa a tina i totonu o lona atunuu. E fiafia e kuka konati mo le fanau a lana fanau e toaiva.

Aso Sa (Aso Sa o le Etiveni), Tesema 3, 2017: "Faamanuiaga mai le timu."

Tusi Faitau: Kenese 9:8-17.

Matua (ff.12-13): *Ua fetalai atu foi le Atua. O le faailoga lenei o le feagaiga ou te faia ma outou, atoa ma mea ola uma o ia te outou, e autupulaga lava; ua ou tuuina la'u nuanua i le ao, e fai ma faailoga o le feagaiga a le lalolagi ma a'u.*

E umi lava aso e timu ai, e faitau vaiaso pe a oo i le tau malulu i lo matou atunuu. A e ua tau leai se timu i lenei tau malulu. Ina ua faitau vaiaso ua le toe i ai se timu, ua vaايا le matutu o vao ma laau i paka tafafao ma togalaau, e lagona foi i le tino ma lauulu le matutu. O se tulaga faigata lea mo laau toto ma laau aina. Ia silafia, o atunuu e faalagolago le tamaoaiga i faatoaga ma lafu manu, o se tulaga faigata lenei pe a oo ina tupu mai.

Po ona o le suiga 'ea o le tau? Po ona o 'ea eseese mai fale gaosi-mea, o le soona tata o laau o le vaomatua ma faaleaga le laueleele, o le faatalale i puna vai po o le faatautala? Ua mananao le toatele ia o'o mai ia se timu! Na oo mai, a e na o sina mauuluu, e le iloga ona touluulu ifo. E le manaomia ai se faamalu pe afai e te savali ai. Pe e te ta'ua lea o se timu? Afai e te vaavaai solo, e te iloa atu le feilaila mai o le auala tele, ua amata foi ona faatutumu omoomo i le suavai.

E faifai malie lava, a e ua iloa atu i paka ma laufanua ua amata ona lanu meamata, o manu tataa ma manu felelele ua laga mai i fafo e fiafia i le touluulu ifo o le timu. E peiseai o se vaaiga fou, peitai, o le

matagofie lava ua masani ai, pe a vaaia i le tafatafailagi ma iloa atu le faalava mai o le nuanua, o ona lanu ua susulu iila mai. Ua le manana’o tagata e taofi le timu i lea taimi, peitai, o le nuanua, o le faamanatu mai lea o le poloaiga a le Atua e tumau e faavavau. E oo ina mou malie atu le nuanua i le mauuluulu ifo o le timu, a e manatua: O le poloaiga, o le ola lava lea e faafouina ma tumau i le alofa o le Atua soifua.

Talosaga: A o tatou sauniuni e faamanatu le Kerisimasi, ia tatou talitonu, o le afio mai o Iesu, o le afio mai ia faasusuina le galala o tatou agaga i le agasala ma le faatamala. **Amene.**

Aso Gafua, Tesema 4, 2017 “Alofa atu i e ua le alofagia.”

Tusi Faitau: Kenese 16: 1-14

Matua (ff.7-8): *Ua maua foi o ia e le agelu a le Alii i le vaipuna i le vao, o le vaipuna i le ala i Sura. Ona faapea atu lea o ia, Akara e, le auauna a Sarai, maifea oe? O fea ea a e alu i ai? Ona tali mai lea o ia, Ua ou sola mai ia Sarai o lo’u matai.*

Sa faasalalau o le a tatala le polokalama e tausia ai tamaiti laiti i le aoga tulagalua. O le polokalama mo tamaiti laiti? O le a’oga tulagalua a e tausia ai tamaiti laiti? Pe fiafia i ai, pe leai foi, o le a tatala lava. O le tasi o faafitauli iloga i lenei pitonuu, e toatele tama ma teine a’o’oga ua tutuliese mai le aoga ina ua ato le 15 po o le 16 tausaga le matua.

E tusa e faitau miliona tamaiti aoga, mai le 15 tausaga e oo i le 24 i le atunuu o Argentina, e aofia i le vaega ua le aoga, ua leai foi ni galuega e faigaluega ai. Ua manino le faamauiina i nei fuainumera ma iloa foi lona taua. O le fitusefulu pasene o lea aofaiga o teine talavou. O le 55 pasene o lenei aofai e nonofo i aiga, po o le galulue e fesoasoani i feau i le fale.

Pe aisea ua mafua ai? Ua mafua ona ua faateleina le ma’itaga o teine talavou, o nei tupulaga teine talavou e lei aoga lelei, e le maua foi ni avanoa e faigaluega ai, ae sili foi ona tagata ona e leai ni aiga lelei e nonofo ai. O nei talavou e faafeagai ma le olaga ua le amanaia ma tuulafoaiina e faapei o Akara lea na sola i le tofa mai le aiga. A e ua

faateia ina ua fesili le agelu; o fea la le isi mea e vaavaai atu i ai. “Maifea e o mai ai nei teine ma a latou pepe? O fea a o i ai?” ua fesili le agelu.

E le o se tulaga lelei pe a tatou teena. A e ao ona tatou avatu se faailoga o le alofa, ma talia i o tatou aiga, e faapei ona valaauina ai i tatou e Iesu. Ia tatou talia i latou i o tatou loto, e faapei foi o i latou, ma tatou feofoofotai ai i le agaga o le alofa ma le faamoemoe lelei.

Talosaga: Fesoasoani mai le Alii e, ia matou maua le agaga o le fia fesoasoani i e ua tuulafoaiina i manatu o le toatele. Ia matou faia e pei ona e finagalo ai e tusa ma lou alofa le faatuaoaia. **Amene.**

Mafaufauga Loloto: Po’o faaalua sou loto alofa e tusa ma faafitauli i tama ma teine aoga, a e maise i faiaoga i totonu o la outou aoga tulagalua?. Talatalanoa i lau aulotu ma manatunatu i se auala e fesoasoani ai i o latou faafitauli.

Aso Lua, Tesema 5, 2017: “Sara ma Maria”

Tusi Faitau: Kenese 18: 1-15

Matua: *(ff.13-14) Ona fetalai atu lea o le Alii ia Aperamo, Se a le mea ua ‘ata’ata ai Sara, o loo faapea, E moni ea, a ou toe fanau o a’u le loomatua? E i ai ea se mea e faigata i le Alii? O ona po ua tuupoina ou te toe foi mai ai ia te oe i lela tausaga, e maua mai ai e Sara le tama tane.*

Pe aisea tatou te mafaufau ai ia Sara i lenei vaega o le tausaga? O le tina ua le o mautinoa. E le o filemu lona mafaufau; sa ataata ona e le o se fiafia, a e ona o le faaletonu i le tulaga o loo i ai le mafaufau. Ua auina mai i le Atua se feau e i ai se luitau, e natia ai le lagona masalosalo. A e sa faaalua lava ia Sara ona uiga tausaaafia, sa sisi’o ina ia natia ai ona lagona. O le fesili: Pe sa tumau pea le folafolaga a le Atua, pe ua tuu ai ia faapea ia Sara?

“E leai se mea e faigata ia te A’u,” o le finagalo lea o le Atua, ina ia talitonu Sara e i ai le mana. E le na o le maitaga sa finagalo i ai le Atua. O se suiga loloto lenei i lagona ma le ola faaleagaga i le tina faalotolotolu, sa fesili ifo ia te ia lava, “po ua malamalama moni ea i

lenei faafiafiaga?”---le faafiafiaga o le a fanau sana lava tama, e lelei ai la laua mafutaga ma lona toalua, i lona aiga a e maise ia te ia lava.

Ua taumafai Sara e faatino lona lelei atoatoa. Sa tausisi i ona tiute masani, e tuu atu lona loto i le mafutaga ma lona toalua. Sa ia faailoa uiga tusaafia. Peitai, o le tuuina atu atoatoa ua le o se faatinoga e faia e gata ia te ia, ma na te le teena o ia lava. Pe afai o le maitaga, e le tatau ea ona ou pese e faapei o Maria, sa pese i le tele o tausaga na mulimuli ane ai: “O le viiga i le Atua i mea aupitoaluga; ma le manuia i le lalolagi i tagata ua alofagia e ia!”

O le Etiveni o le taimi e sauniuni ai ma faatalitali, o le saunia faale-agaga e faamanatu le Aso Fanau o Iesu. E siosiomia i tatou i tagata loto masalosalo, o nisi ‘ua manatu ua maimau le taimi i lo tatou faatuatuaga.’ Peitai, aua nei galo, e leai se mea e faigata i le silafaga a le Atua, e mafai ona suia o tatou loto faapea i le lalolagi uma, na te liua mea sili mo lana fanau ma galuega o le foafoaga.

Talosaga: IESU e, fesoasoani mai i lo matou folafolaina o le Etiveni, o lou filemu i le lalolagi ma lou alofa i tagata. **Amene.**

Mafaufauga Loloto: E faapefea ona e faasoa atu le finagalo o le Atua i ou tuaoi ma tagata o lou nuu i lenei vaitaimi o le Etiveni?

Aso Lulu, Tesema 6, 2017 “Taitaieseina mai le nofo pologa.”

Tusi Faitau: Esoto 6:2-9

Matua (f.5): *O a’u foi na ou faalogo i le feoi o le fanauga a Isaraelu, o e ua faapologaina e Aikupito, ua ou manatua foi la’u feagaiga.*

Pe le toe i ai ‘ea ni taua? Po’o i ai ea se taimi e nofilemu ai le lalolagi? I le tausaga e 2015, sa faailoa mai ai i TV le tasi itu pogisa o le lalolagi ma mea o loo tutupu ai: e faitau afe ma afe tagata sulufai ma ua tuliese ma faamalosi, o loo saili nofoaga e mapu i ai mai sauaga; fia o ese mai le olaga e leai ni taua, pulufanaina, ma le matelaina poo le oti.

O ata o tagata sosola i vaa e le tatau ona malaga ai se tasi, aua ua na o le oti ma le mala e o’o i ai; e vaavaai atu i ata o savaliga o e sosola mai le lalolagi puapuagatia, e taumafai e sopoia soo se ituaiga pa

pupuni, soo se ituaiga faigata e fetaiai ai; e faatalatalanoa i tagata ma le loto faanoanoa, a e maise o le agaga e fia fesoasoani i le toatele ua mafatia.

Pe mafai i le Kerisiano ona fetufaai i le agaga fia maua se filemu, a o faafeagai pea le lalolagi ma nei ituaiga mafatiaga i aso taitasi. O le tusi faitau mo lenei aso, ua faamanatu mai ai, o le Atua o ia o le Atua e silisili ma maualuga, ua silafia le feoi ma le ola puapuagatia o tagata, ua sauniuni e faatino lana poloaiga. Ina ua auina mai lona Alo Pele o Iesu e soifua faatasi ma tagata, na ia finagalo e suia le ola mafuta e ala i le mafaufau ma le loto: Ia faia le faamasinoga tonu, ia soifua i le filemu ma ola fealofani.

Pe faapefea ona faatino le poloaiga a le Atua, pe a fai ua le mafai ona maua le ola fealofa'i o le tasi i le isi ma faatino le sa'olotoga i tagata? Ua faailoa mai i TV le soifuaga puapuagatia ma le faailoga-tagata, peitai, e i ai faatasi ma le faamalosi loto, le fesoasoani e auala mai i le agalelei o isi a e maise o avanoa e talia ai ma faaavanoa isi nofoaga fou e mapu atu i ai.

O le vaitau o le Etiveni, o le folafolaina mai lea ua latalatala le afio mai o le Faaola. Se'i o tatou manatunatu i le toe faamalosia o tatou loto e atiae se lalolagi fou o manatu, ia fusia le lalolagi o tagata i le soifua filemu ma le finagalo alofa i tagata!

Talosaga: Ia faamalosia le ola faatuatua e fetaiai ma mea faigata o le olaga. Le Atua alofa e, ia faamalosia o matou loto e tatala faitotoa o le alofa mo e ua puapuagatia. **Amene.**

Maufaufuga Loloto: Po'o i ai ni avanoa e mafai ona e fesoasoani ai i e ua mafatia, a e maise i latou ua sosola ese mai le nofopologa?

Aso Tofi, Tesema 7, 2017 “Tatalo a le tina o Hana”

Tusi Faitau: 1 Samuelu 2:1-10

Matua (f.3): *Soia tou te faatele a outou upu faamaualuga naua, e alu a'e ai le faaonoono i o outou gutu; auā o le Alii, o le Atua sisila mai o ia , o ia foi le na te fuatia amio.*

O vaiaso taitasi i le nusipepa i le atunuu o Argentina, e i ai le vaega e tusia ai pe faapefea ona faaoga ou taimi avanoa i le tulaga e pito sili ona lelei. Ua fausia foi e le 'au tusi-tala se igoa e faatatau ia i latou ua faaigoaina e tagatanuu, e fou mai i le aai, o tagata faapitoa i le iloa fesoasoani i taimi avanoa. O nei uiga faatino ua le na ona ta'u ma nonofo, a e ua faatino i le lelei e gata mai ai, ma aveesea ai le loto popole ma faanoanoaga. E foliga tutusa i latou nei, e talavou, 'aulelei ma laumata ataata, e laei taugata e tele foi tupe i le taga, po'o le 'ato tupe, a e maise o 'credit cards' e avanoa i soo se taimi. Ua saunia lava i latou e faatosina i soo se tasi, ia talitonu o le fiafia ma le iloa ona faasoasoa, o tulaga ia e fuifuilua faatasi!

A e a faapefea i latou e le gafatia ma le mafai ona oo i lea manaoga ona o le le tagolima? Faamata e le o i ai se avanoa e taumafai ai ina ia aulia lea tulaga moomia, i soo se faatinoga e mafai ona fai, pe faatau pea ma 'aitalafu? O le fili e taatele mo i latou o loo faatosina mai, o faamatalaga e unaiina i ai o tatou loto ina ia faatau loa, e ui lava o na faatosina uma e le faamaoni. Pe moni ma mautinoa e manaomia ia faatinoga, a e aua nei toilaloina i se mailei?

Ina o tatalo le tina o Hana, sa ia taua pea o 'tagata tausaa'fia', i latou e tatau ona leai se manatu faapito, ma manatu faamaualuga ia te i latou lava, a e amata tuuina o latou olaga ma le faamoemoe o le Atua e laveaiina, e faamalololia, a e maise le ola fiafia. Pe ua tatou sauniuni ea e ola i le agaga e faatoilaloina ai o tatou fili, ina ua leai se manatu faapito ma uiga faatosina, e foliga ua tatou maua le 'poto fou' e sili ona lelei? Faailoa atu ua tatou maua le ola fou, o le ola fou mai ia IESU e taitai tonu ai la tatou faigamalaga i le olaga nei.

Talosaga: Ta'ita'i mai ia te i matou, le Alii e: Ia matou aulia le Etiveni e vaaia ai foliga moni o lou Silisili 'Ese. Fesoasoani mai ia taula'i tonu lo matou faamoemoe i ou aao alofa. **Amene.**

Mafaufauga Loloto: Pe mafai ona tatou maua se Kerisimasi tausaa'fia? O a mea e tatau ona tuuese? O a faatinoga e tatau ona faatino?

Aso Faraile, Tesema 8, 2017 “Ola i le alofa moni.”

Tusi Faitau: Salamo 89: 1-18

Matua (f.14): *O le amiotonu ma le faamasinoga o loo tumau ai lou nofoalii; o le alofa ma le faamaoni la te muamua atu i ou luma.*

O le taimi lenei o le palota lautele i lo matou atunuu ma o sui tauva uma, o a latou lauga ma tautalaga a e maise o latou mana’oga, ua faasalalau i luga o le ea. O nei lava ona po, ua tatou maua i le Internet o faasalalauga tuusaoloto e matua tele lava. Ua i ai le faalapopotoga o le au tusi-tala ua latou amataina se polokalama ua taua o le: *chequeado.com* (*‘CheckedOver.com’*), o se polokalama e matua sailiilia lelei ai lava soo se tautalaga ma faasilasilaga, e suesue pe moni ma faamaoni. E tuu i ai le faailoga o le: “sese, ‘afa-sa’o, po o le faamaoni”, e faailoga i le fetu pupula tele, e tele aso e faia ai suesuega ma sailiiliga ma tuu i le Internet (faasalalauga i le tafatafa-i-lagi)---e iloa ai molimau e le moni pe tau faasese e faia e sui tauva ina ia tosina ma talia a latou faamatalaga.

E manaomia ni taitai iloga i malo ma atunuu---o alii ma taitai e faamaonia o latou finagalo, ina ua sailia ma suesue lelei i ai ina ia faia le faamasinoga tonu ma le sa’o, e tupu ai foi le fiafia ma le sologa manuia o mea uma. A e pe ua lava ‘ea lea? Ua faaopopo i ai e le tusi Salamo isi faatinoga taua e lua: o le alofa ma le faatuatuaga. E le faigofie ona faasino lenei faatinoga i se pule, a e ua tatau mo se ua tuuina atu atoatoa lona loto, o se faatuatuaina e faia le amiotonu ae le o le amioletonu.

O le Alii lava, o lo tatou Atua, e faaalua pea lona finagalo ina ia taitai i le faamasinoga tonu, aua ma le faailoga-tagata, i le alofa ma ia faatuatuaina. Tatou te le tau saili pe suesueina lona faamaoni. Afai ua tatou sauniuni mo le faailogaina o le Kerisimasi, ma ‘auai i faafiafiaga o le tausaga, ia tatou faia ia mea uma ma le loto talitonu o loo faapaolo mai pea aao alofa o lo tatou Alii, o lona mana tatou te tumau ai i le faatuatua moni.

Talosaga: O le Alii le Atua e taitaiina i tatou i o tatou auala uma. E ao ona tatou folafola atu lona faamaoni, o poloaiga ma faasinoga

tonu, e tumau e faavavau. Ia tatou talitonu ma faatuatua i lana foafoaga e faavavau. **Amene.**

Mafaufauga Loloto: E faapei ona ta'u mai e le www.chequeado.com, pe aisea tatou te le taofi mau ai i le Atua ma ana poloaiga i ona tagata? Saili ane pe faapefea ona tumau lona alofa, lea o loo tatou maua i aso uma!

Aso Toonai, Tesema 9, 2017: “Saili po o fea o i ai lou lagona”

Tusi Faitau: Luka 1:13-23

Matua (ff.16-17) *E faaliliu e ia le fanauga a Isaraelu e toatele i le Alii lo tatou Atua. E muamua atu foi o ia i ona luma ma le agaga ma le malosi o Elia, e faaliliu loto o tamā i le fanau, e faaliliu foi e ua faalogogata i le poto o e amiotonu; e sauni le nuu e faatatauina mo le Alii.*

Pe afai e tutusa outou ma a'u, ua tatou talitonu i le faigata ua i ai nei tupulaga---o e faaoso i faiga tetee, ma i latou ua manatu faapito ia i latou lava e fai ma ta'iala o le olaga ua i ai nei ona po. Tatou te faatusaina uiga ma amioga ia ua tatou vaaia nei, pe a faitau i le Tusi Paia. O le le usiusita'i, amioga faafoliga, taufaasese ma le le iloa ona ava, o vaivaiga masani ia e faafeagai pea ma le alofa le faatua'oa o le Atua o loo molimauina pea.

Ua ootia i le vaai ma le faalogo a Sakaria, e le gata o le fefe ma mata'u ua vaaia se agelu, a e o le fe'au ua ta'u mai: o le a fanau mai sona atalii, e faigata ona talitonuina. E malamalama lelei o ia e tusa ma le faaaliga na iloa e Elia ina ua faafesagai ma ositaulaga a Paala, ma lona faasauaina. O le folafola atu ia Isaraelu ia toe foi i lo latou Atua, o se mea faigata lea e ona oo i ai lona atalii, e ui e le'i fanau mai, a e tatau ona maua le loto tele.

O lenei folafolaga sa taofi mau pea e Sakaria, aua e i ai ona tiute e ao ona faatino pe afai e manatu i lona atalii e fai ma perofeta faatuatuaina. E tatau ona maua e Ioane lea uiga tausaaafia, o se tulaga e tatau ona maua uma e matua mo a latou fanau, aua se manuia o le lalolagi i le lumanai.

O taimi tatou te sauniuni ai e talia le faailogaina o le Kerisimasi, tatou te mafaufau tele ai i fanau laiti, a e maise lava i lo latou manana’o i mea-alofa e fia faatau mai. Faamata e le tatau ona tatou vaavaai i ai i le itu faale-agaga, e tatau ona iloa le Atua, ia latou maua se olaga filemu i le aiga, i potu a’oga, a e maise le lalolagi ua ola ai? Atonu o le taimi lenei e aoao atu ai e tusa ma le ola faatuatua ma talitonu ia Iesu, o le Faaola. Aua nei o tatou manatu faatauvaai i lea mea.

Talosaga: Le Alii alofa e, ia matou maua upu faigofie ma le alofa, e faamatala ai le fanau mai o Iesu ma le feau o le tala lelei, matou te faasoa atu i fanau laiti i le aso Kerisimasi. **Amene.**

Mafaufauga Loloto: A o tatou tu lata i le Kerisimasi ma le teuteuina o laau i o tatou aiga, i falesa, ma soo se avanoa i totonu o le nuu---ia manatunatu i teuga e tatau mo le Kerisimasi ma le feau o le tala lelei. Ia ofo alofa atu i soo se tasi ma faasoa atu le aao foai mai o le Alii mo i tatou ma le lalolagi uma.

O FEAGAIGA MA POLOAIGA E I AI LE TAUNUUGA E PEI ONA A’OA’O MAI.

[Apoapoaiga e auala mai i le Tusi Paia (NRSV) saunia e Sham
P.Thomas.]

O Rev. Dr. Sham P. Thomas ua faauuina i le tofi o le ositaulaga, o loo galue i le *The Mar Thoma Syrian Church Bangalore*, Initia. Na filifilia mo le sikolasipi o le James S Stewart i le University of Edinburgh; o le polofesa faia’oga i le mataupu tau lauga ma fesootaiga i le United Theological College, Bangalore. O loo avea pea o ia e fai ma taiala i fonotaga ma mafutaga a faalapotopotoga e tusa ma lana taleni.

Aso Sa, Tesema 10, 2017: “O au filifiliga”

Tusi Faitau: Teuteronome 28:1-6, 15-19.

Matua (f.1): *Afai foi e te matua faalogo i le siufofoga o le Alii lou Atua, e anaana e fai ana poloaiga uma lava ou te fai atu ai ia te oe i le aso nei, ona faasilisiliina lea o oe e le Alii lou Atua i nuu uma lava o le lalolagi.*

Ua faaalua i le Tusi Paia fuafuaga mamana a le Atua e tusa ma lona finagalo, ma o ia fuafuaga e i ai faatasi ma le faamoemoe ma lona faataunuaina. E le faatusatusaina lava le Atua, aua o lona finagalo e tutasi lava ia---e o faatasi ma manatu o le tagata, pe fete'ena'i foi. O ia uiga, ua tofua ma lona faauigaina. O e ua mulimuli tonu i le finagalo o le Atua e maua le tau'i lelei, a o e liliuese e faapea foi ona faasalaina.

Ua aaoaina le tagata e tusa ma ia fuafuaga uma, e i ai pea i le mafaufau ma lagona e amata mai talu ona fanau mai. O nisi nei o faaitaiga e masani ai, "Ia iloa le afi ma lona mata'utia; Ia manatua tulafono i luga o auala tetele; O le ulaula tapa'a e le lelei mo le soifua maloloina", ma isi lava uiga masani faapea.

O ia fautuaga po o apoapo'iga e taua mo le puipua a e le o ni tulafono. O fautuaga po o apoapo'iga e taua ina ia puipua ai mai le aafia i se tulaga e ona tupu mai i le lumanai ma afaina ai. O le faaogaina tatau o ia fautuaga ma apoapo'iga, e faatupu ai le amio ma uiga tausaa'ia e faaalua ai le alofa!

O polo'iga ma faasinoga e taitaiina ai i le finagalo alofa o le Atua, e i ai faatasi ma le faamoemoe lelei e filifili ai le tagata, a e o le finagalo alofa o le Atua e faafiafiaina ai le loto. O le finagalo alofa lava lea o le Atua, e le ina ia faasalaina a e ia lelei ma manuia lana foafoaga.

Talosaga: O le Alii le Atua o lo tatou faamoemoega sili e auala mai ai faamanuiga uma. Ia tuuina atu lo tatou malosi atoatoa e auauna atu ai e tusa ma lona finagalo. **Amene.**

Aso Gafua, Tesema 11, 2017 "O le valaau e faamanatu."

Tusi Faitau: Esekielu 33:1-16

Matua (f.6): *A e afai e iloa e le tagata vaai le pelu o loo sau, a e le ilia e ia le pu, ma ua le faailoa atu i le nuu; a oo mai le pelu, ma oti ai se tasi o i latou, ua oti o ia i lana amioga leaga; a o lona toto ou te tauiatua lea i le tagata vaai.*

O mea nei sa ou fiafia i ai a o o'u laitiiti lava i lo matou aiga: o la matou matua-moa fagafao e genogeno atu i le aeto po o le lulu i totonu o le pa-manu, ma le toloa'i a le matua-moa e faapotopoto mai i

lalo o ona ‘apaau. E taua le faamanatu i le tele o taimi, ina ia sauniuni ai mo se faalavelave e fotua’i mai.

Atonu o se tulaga e le o manaomia tele po’o e le talafeagai. E iloa Esekielu i ona tiute faatino, o le valaau e faamanatu i le nuu o Isaraelu e fautua ai lo latou olaga faale-faatuatua a o faimalaga. O le tofiga o le perofeta ua aofia ai lenei tiute, “valaau-e-faamanatu”, i le nuu o Isaraelu i tupu ma tagata uma i mea e tatau ona soifua ma ola ai i aso uma.

Ua faailoa manino mai i le poloaiga i le perofeta o Esekielu, ia fai ma “tagata-vaai”. E taua lenei faasinoga aua e tatau ona faatino tiute o le tofiga. O le tiute o le tagata-vaai, ua faatusaina i le ta’ifau tausi e ou (barking), po o le matua-moa e ofoofota’i ma faamalumalu i lana toloa’i.

O le lalolagi i nei ona po, e manaomia tele le ola puipuia mai so’o se faalavelave e tupu mai. E manaomia ona faavae ma aoaoina ni fitafita e fai ma leoleo, po o le fausia o se faailo (alarm) e faatatau mo le fesuiaiga o le tau. E tele nisi fuafuaga tatau e ono tulai mai, ina ia faailoa atu ma puipuia le soifua saogalemu ma le ola maloloina, mai le aafia i faigata ma faalavelave eseese o le olaga.

Afai o le a mataala e ua filifilia i o latou tiute, o le a faapea foi ona maua le saogalemu ma le nofo filemu e aunoa ma le popole vale i le tele o taimi. A e le mafai ona silafia ma iloa, pe a leai se leo ma le faataunuaina tiute ua valaauina ai.

Talosaga: Le Alii e, a o faafeagai pea i matou ma faigata o le ola faaitu’au, foa’i mai le malosi matou te tetee atu ai. Foa mai le lototoa e puipuia ai mai ia faigata! **Amene.**

Mafaufauga Loloto: O ai e ao ona matou faamoemoe i ai i aso uma? Faafetai i le Atua ona o le ‘au vaaitau ma i latou uma o loo faafeagai ma tiute tau i puipuia mai faigata faale-natura?

Aso Lua, Tesema 12, 2017 “Ia mataala”

Tusi Faitau: Esekielu 34: 1-16

Matua: (f.10) *Ua faapea ona fetalai mai o le Alii le Atua, Faauta, ou*

te faia ia leoleo mamoe mo'u fili; ou te su'eina atu foi la'u lafu ia te i latou, ou te faateaina i latou ia le toe fafaga le lafu; ... aua ou te lavea'ina la'u lafu i o latou gutu, ina ia le fai i latou ma mea 'ai ma latou.

Ua i ai se taumafaiga faale-tulafono e fou mai, e fesoasoani lea i le vaega a leoleo e fai ma a'upega e fofu ai, ma puipuia ai le nofo filemu ma le saogalemu o tagata lautele. A e atonu ai ua le o toe faaauauina nei! A oo ina sosolo uiga le faamaoni, ma faataliga-tutuli le tele o faalapotopotoga, a e maise o le le faamaoni o ta'ita'i e ao ina tausia le amiotonu, ona mama lava lea ma faapei o se taaloga. O le mea e ofo ai, a oo ina tau alaga e faapei o se ou (barking) a se uli, e pei lava o se mea faifua!

E foliga faapea le perofetaga a Esekielu, o le tau alaga atu ia lagona e taitai ma i latou o loo i ai le pule---o ta'ita'i o le lotu. Ua ta'ua leoleo mamoe aua o lo latou tiute ma le olaga faata'ita'i e tatau ona puipuia ma tausia le ola manuia o mamoe, fafaga i le ua vaivai ma avatu le faamalosi. O nisi o i latou ua tuuina atu lo latou soifua atoa e faalelei ai ma manuia le lafu. E le tioa a filifilia e le Atua e fai ma leoleo mamoe.

Peita'i, e faapefea ona tatou faamatala le uiga vaivai ma le to'ilalo, ina ua aafia i faaososoga ma tofotofoga ma ta'u leagaina ai? A e afai ua amata ona faaogaina (aina) e le leoleo mamoe le mamoe---pe le o le faatusa 'ea lea o le faomea ma le manu feai? Ae faapefea ona faamatala le leoleo mamoe, ua i ai le avanoa e saoloto ai e pulea le lafu, ona pule ai lea ma faaogaga sese lea avanoa e faatino ai ona lava manaoga tu'inanau?

O le lisi tusia lea o uiga ma amioga e faapopole loto e ono aveesea ai le faamoemoe lelei. Peitai, e le o le finagalo lea o lo tatou Atua, aua o le Atua alofa. E faaletonu le tagata i taimi, a e o le Atua e tumau lava ia e faavavau. O uiga ia o le Atua o le Lavea'i!

Talosaga: Le Alii e, lo matou Atua, faamagalalo i matou ina ua matou faaogaga sese le pule na e foai mai i o matou tagata. Ia le avea i matou ma 'leoleo mamoe' ua ulutinoina e le tiapolo. **Amene.**

Mafauafauga Loloto: Pe faapefea ona matou iloa le finagalo o le Atua, pe afai o ta'ita'i o le lotu ua aafia i tofotofoga ma faaososoga o le ola tuinanau?

Aso Lulu, Tesema 13, 2017 “Ia iloa ona ola faateete”

Tusi Faitau: Luka 3: 1-14.

Matua (ff.9-10): *O loo tuu nei foi le matau i tafu'e o laau; o laau uma foi e le fua mai i fua lelei, e taia ma lafoaina i le afi. 'Ua fesili mai le motu o tagata ia te ia, "Se a foi se mea matou te faia?"*

Ua alaga ma a'oa'o atu Ioane le Papatiso ia te i latou ua manatu ifo ua sa'o ma tonu, e tatau ona latou salamo. O se tulaga e taua ua silafia e Iesu lenei alaga ma le mana'o, ia faalogo ma mulimuli ai le motu o tagata. Ua folafola atu lenei valaau e le gata ia Ioane a e faapea ia Iesu, o le valaau e i ai le faamasinoga e leai se tasi e 'alo'ese ai. O le faamasinoga e ta'ito'atasi ma molimau le tagata ia te ia lava, i luma o le Nofoalii o le Atua, e tusa ma mea na ia faia ai i le olaga lenei.

Ua alaga Ioane ia salamo, o le ala lea e tasi e sao ai ma le sala mamafa i le faamasinoga. O le Salamo ua na o se lagona faale mafaufau ona o ni amioga sese sa faia. A e o se lagona e toe faalelei, ina ua iloa le vaivai ma le to'ilalo i faaososoga ma tofotofoga leaga, i le taimi nei po o aso ua mavae. O le Salamo, o le lagona fuatiaifo e iloa ai o faatinoga ua sese ona fai i aso ua tuanai po o le taimi nei, o uiga ia e tetee e tusa ma le finagalo o le Alii le Atua.

O le Salamo ua na o se faatinoga e le atoatoa, pe afai e le mafai ona suia uiga sa masani ai. E manaomia le suiga i aso uma o le olaga i mea e fai, o le ata lea ma o foliga ia o lou tagata, a e maise o lou tamaoiga ma le soifua fealoa'i. O le pogai lea o le alaga a Ioane, ina ia faasoa le tamaoiga e tusa ma le mativa, ia faamalosia le loto gatasitasi ma ia saoloto mai le tu'inaanau i tupe.

Ia faapei i tatou o Ioane, i o tatou 'au aiga, i laei ma mea'ai, ia atagia ai iina le loto ua salamo, ma le loto naunau e toe faafouina ia tusa ma le finagalo o lo tatou Alii o Iesu Keriso.

Talosaga: Le Alii e Iesu, ia fai i matou ma ‘ave’feau o lau tala lelei. Ia fai o matou olaga o le faailoga o le loto ua salamo ma le ola ua faafouina. **Amene.**

Mafaufauga Loloto: O le vaiata o le Etiveni, o le taimi lea o le olaga salamo ma le olaga toe faafouina, e pei ona masani ai i isi aulotu. O le a sou malamalama i le upu ‘salamo’ ma lou faatuatuaga?

Aso Tofi, Tesema 14, 2017 “O le alaga tau fa’asese”

Tusi Faitau: Mareko 13:3-13

Matua (ff.6-7) : *Auā e toatele e o mai i lo’u nei igoa, ma faapea ane, O a’u o ia, latou te faaseseina foi tagata e toatele. Pe a tou faalogo i taua ma tala o taua, aua tou te atuatuvaile; aua e tupu lava ia mea; a e le’i o’o i le gataaga.*

O le alaga tau faasese e i ai lona taunuuga mata’utia. E i ai le talatu’u sa ou faalogo ai a o o’u itiiti, e faatatau i le taule’ale’a sa tausi ana mamoe i tuapa o le aai. I le isi po, na alaga ai o ia, ua faapea mai: “O le taika, o le taika!” Sa faavave ona tamomoe tagata o le nuu e lavea’i, peitai, e leai se taika, a e na o le ‘ata’ata mai o le alii. E lei faatasi ona ia faia ia uiga tau faasese.

O le isi aso, na faate’ia lenei alii ua sau le manu fe’ai o le taika, a e leai se tasi e fia faalogo i lana alaga i se fesoasoani. Na matua apoapoa’i mai lo’u tina-matua, e leaga le tau faasese e faapei o le tala i le taule’ale’a ma lana tau faasese i tagata. E lelei le alaga ia laveai mai ona o se faalavelave, a e leaga le tau faasese i se tala e le moni. O le isi lenei o tau faasese o loo faapopoleina ai pea le toatele i le tele o aso ma tausaga, ua faapea mai isi, o le taimi lea, po o le aso lena e toe afio faalua mai ai le Keriso. O loo faaalua pea uiga tau faasese, e ui ua maea ona aoao mai Iesu e i ai mea e tutupu mai. Peitai, e i ai pea perofeta pepelo ma a latou folafolaga tau faasese.

E moni e i ai le aso o le gataaga, peitai, ua na o le Atua lava e silafia, ua na o le Atua foi e silafia le aso ma le ala e faataunuu ai. E leai se tasi na te iloa, a e ao ina tatou talia ma mulimuli i le faasinoga, e faapei o Iesu na usiusitai ma faatino le finagalo o lona Tamā. A o tatou tatalo ma faatalitali pea i lona toe afio mai, ia talia lo tatou

valaauina e tala'i le tala o le faaolataga, e ui ina itagia ma sauaina le Ekalesia Kerisiano, o e ua talitonu ma faatuatua ia Iesu Keriso o le Faaola o le lalolagi agasala.

Talosaga: Le Alii e le Atua, ia filifilia i matou e faailoa atu le tala i le faaolataga e aunoa ma le manatu faapito, po o le tala'i foi ina ia maua so matou lava viiga. **Amene.**

Mafaufauga Loloto: Pe faapefea ona matou iloa tonu, aua lava ma le tau faasese, lou lava afio mai Keriso, e pei ona aoao mai?

**Aso Faraile, Tesema 15, 2017 “Ia loto e tasi ma le malamalama”
Tusi Faitau:** Efeso 4: 1-16

Matua (ff.11-13): *O ana mea alofa foi, ia fai nisi ma aposetolo, o isi foi e fai ma perofeta, o isi foi e folafola le tala lelei, o isi foi e fai ma leoleo atoa ma a'oa'o; ina ia faaatoatoaina ai le 'au paia, latou te fai ai le galuega a auauna, ia atiina a'e ai le tino o Keriso; seia oo atu o i tatou uma lava i le loto gatasi i la le faatuataua, ma le iloa lelei o le Alo o le Atua, ia fai foi ma tagata matua, ia o'o i le fua o le ua matua, e tatau ma le tumu o Keriso.*

O le tasi o faigata ua aliali mai i lo tatou lalolagi i nei ona po, o le manatu faasausili ma le faatuputupu leaga. Ua taumafai nei talitonuga ia faaolaola, ma ia mulimuli ai le toatele i se talitonuga e tasi. O e ua i ai le manatu faasausili ma le faatuputupu leaga, e i ai lo latou talitonuga malosi e aafia ai isi e ua 'ese o latou talitonuga ona o le lanu, itu lalolagi, faatuatua, po o talitonuga o tu foi ma aganuu.

Ua manatu i latou nei, ia amanaia ma talia e le toatele mea ua latou talitonu ma manana'o ai. O le mea foi lea, e tatau ona i ai ni a tatou faiga ia maua le loto e 'tasi ma tupu tele' (unity in diversity). O le loto e tasi e le o le talia fifilemu po o le amanaia pogisa o manatu o isi, a e ia talia ona ua iloa ma malamalama lelei. Ia talia i le agaga o le ava ma faaaloalo i le va fealoai e ui e tofu le tagata ma ona lagona.

O le va fealoai lea e faatatau i le feagai o le tasi ma le isi, tusa pe eseese lanu, 'ese foi talitonuga po'o tu ma aganuu, a e ia talia ma amana'ia ina ia tupu ai le fealofani moni. E taua tele lenei va fealoai i

totonu o aulotu. E ui foi e i ai isi lotu e tausisi i le taua o a latou faatuatuaga, tofiga, auala e faatino ai tapuaiga, a e maise tulafono faapitoa--o isi ia mafuaaga ua vavae'esea ai isi lotu mai le nonofo faatasi.

O le mea foi lea e tatau ai ona mafaufau loloto i le a'oa'o mai o Paulo, e faatatau i mea-alofa eseese, o tofiga ma agavaa faapitoa, ua le o se vavaega e fai ai se tauvaga po o le fai vaega. A e ua faatatau e Paulo i le ola galulue faatasi ma ia faatupu tele ai le ekalesia. O le faamalosi o le ola fuifui faatasi i totonu o le galuega tautele, ua faatusaina i le filo e taata'ai ma fausia ai le la'ei faale-Atua: "O le Lalolagi ua Faamanuiaina."

Talosaga: Le Atua e tasi lava 'Oe, ia e fesoasoani mai ia maua le agaga o le ola fesoota'i o le tasi i le isi, e ui ina tofu le tagata ma ona lagona. O lo matou ola fesootai e faatoateleina ai le lalolagi talitonuga i lau Afio. **Amene.**

Mafaufauga Loloto: O le a se faiga ua e iloa e faatino ai le ola fesoota'i o e ua tasi ia Iesu ma lona finagalo?

Aso Toona'i, Tesema 16, 2017 "Saili i le mea sili ona lelei."

Tusi Faitau: Efeso 5:1-14

Matua (ff.10-11): *Ia su'esu'e outou pe se a se mea e fiafia i ai le Alii. Aua foi tou te amio faatasi ma galuega le aoga a le pouliuli, a e lelei ona outou 'au mai ia mea i le malamalama.*

E le avea le faigofie e faatauva'a ai. Ua le o faailoa i le Tusi Paia o le lalolagi ua na o se faatusa o se nofoaga tatou te ola ai. Ua fautua mai le Tusi Paia ia tatou mataala, sauniuni ma le poto e faafeagai ma faigata e oo mai e ono fesiligia ai le finagalo o le Atua ma lana foafoaga. Na aoao atu Iesu i ona so'o ia tatalo ina ia taumamao mai faaosoosoga, ma ia laveaiina mai tofotofoga leaga e afaina ai. O tofotofoga leaga e i ai le avanoa e ta'ita'i sese ai mai le finagalo o le Atua. Ua fautua mai Paulo i faatinoga e tolu e tumau ai le finagalo o le Atua.

Muamua, ia matua tetee atu i manatunatuga leaga; o manatunatuga e tupu ai le lagona faasausili o le tagata lava ia, e ono tupu ai uiga faufaua luga ma suia ai le finagalo tonu o le Atua. Lua, ia maua le lototoa e faailoa ai mea sese, ia mafai ai ona ‘alo ‘ese mai le leaga. Tolu, ina ua mafai ona tetee atu i mea sese, ia faaopoopo i ai ma le faamalosi e tumau ma pipii pea i le mafutaga faatasi ma le Atua.

O le ulua’i faatinoga ia e manaomia mo le faamagaloina o agasala, faapea le saolotoga ua foaiina mai e ala i le Keriso. O le olaga tausafia e maua pe a tumau ma tausisi i le alofa, e faapei ona aoao mai lo tatou Alii. Pe afai tatou te faapea ona fai, ona faitauina lea o i tatou ma lo tatou ‘auai i le lalolagi e agai pea i luma.

Talosaga: Le Atua alofa e, ua mae’a ona faailoa mai lau mea-alofa sili, o lou lava Alo Pele o Iesu Keriso: lea ua matou maua ai le faasinoga i le olaga sili ona lelei. **Amene.**

Mafaufauga Loloto: O le fea vaega o lou olaga e pito pogisa e mafai ona e faailoa mai? E faapefea ona e tetee atu i ai?

O FEAGAIGA MA POLOAIGA E MAFAI ONA TAUALOAINA

[Apoapoaiga e auala mai i le Tusi Paia (NRSV) saunia e Michiko
Ete-Lima]

O Michiko Ete-Lima, o loo galue nei e fesoasoani i tulaga faale-tulafono i le ofisa tutotonu o le Ekalesia Faapotopotoga Kerisiano i Samoa. E fesoasoani ‘afa-aso i le tofiga faia’oga i le Kolisi Faafaiifeau i Malua, Samoa, i le mataupu silisili taule-Atua faapea ma le poto aoaoina. Ua faaipoipo ia Peletisala Lima o loo faia’oga i le Kolisi i Malua, ma e toalu o la alo teine. O ia o se fautua faamauiina ma lesitara i le faalapotopotoga o Accredited Mediators of Samoa. E fiafia e ta’alo i le tenisi ma le faamalosi tino. E fiafia foi e faaoga ona taimi avanoa e faitau ma manatunatu i Afioga a le Atua.

**Aso Sa, Tesema 17, 2017 “Ua finau Aperaaamo i le Atua”
Tusi Faitau: Kenese 18: 16-33.**

Matua (ff.23-24a): *Ona faalatalata atu lea o Aperaaamo, ua faapea atu, E te faaumatia ea e ua amiotonu faatasi ma e amio leaga? Pe afai o i le aai tagata e toalimagafulu o e amiotonu...?*

Ua faamanatu mai ia te a'u i le tofiga o le faufautua, le autu o lenei vaiaso: o le taualoaina o fesootaiga ma le Atua. I lou tiute faafaufautua, e tatau ona tuuina le avanoa i e ua manaomia le fesoasoani se'i taga'i toto'a i auala e fofu ai ma faalelei le tulaga ua faaletonu. Ua ou faalogo faale-mafaufau, i lou tiute faafaufautua, i le faafeagai o Aperaaamo ma lona Atua.

Na amata Aperaaamo i le fuainumera e 50, a e faaiu i le fuainumera e 10. Ia silafia, e finagalo le Atua ia faasaoina le aai agasala tusa lava pe toaititi e amiotonu. A e peiseai ou te lagona, e i ai se tulaga le paleni i le tuufaafeagai o lenei feutagaiga! O lea o le a faasaoina le aai, a e fia iloa pe i ai se toaititi e amio lelei. Ou te ofo lava po'o fea o i ai le finagalo o le Atua, pe ana fai ae i ai se toatasi e amiotonu? O le a le mafai i lenei talanoaga ona tali i lea fesili, peitai, ou te talitonu e faasaoina lava e le Atua le aai pe afai e maua se toatasi e amiotonu.

E lagona filemu ifo i le loto, o le finagalo o le Atua na auina mai ai lona atalii e toatasi lava, o Keriso Iesu lea, ina ia faasaoina le lalolagi. O le maliu ma le toe soifua mai o lona Alo e toatasi, o le na ua faamagaloina ai le lalolagi agasala. Ia avea o tatou taimi to'afilemu e faaolaola ai le loto talitonuga i le finagalo o le Atua, a o tatou faafeagai ma lenei mataupu i lenei vaiaso.

Talosaga: Le Atua alofa e, faafetai i lou lava Alo e toatasi, o Iesu Keriso na maliu ia magalo ai le tagata agasala ma sao atu i le ola atali.
Amene.

Aso Gafua, Tesema 18, 2017 “O le tuugamau mo Sara.”

Tusi Faitau: Kenese 23:1-20

Matua (ff.14-15): *Ona tali mai lea o Eferona ia Aperaaamo, ua faapea mai ia te ia, Le alii e, ia e faafofoga mai ia te a'u; e tusa le fanua ma sekeli ario e fa selau, o le a lea ia te i ta'ua? teu pea ia o lou faletua ua maliu.*

O le tumutumu o le mauga o Vaea i Samoa, o loo i ai le tuugamau o le tusi-tala lauiloa o Robert Louis Stevenson. E ui o ia o se tagata 'ese, a e sa faaee ia te ia mamalu ma paia faale-atunuu i ona toe aso i Samoa; na oo lava ina faasuaafaina i le igoa Samoa, o Tusitala. Ua mavae lona maliu, ona tuuina atu ai lea o le fanua e fai mona e lagomau ai.

A e le tau faatusaina le tala e faatatau ia Aperamo, ina ua tuuina atu ia te ia le fanua e tanu ai lona faletua. E lei talosagaina e Aperamo le fanua, a e sa faigofie ona talia aua o se tagata lauiloa ma le taua o ia.

So'o se feagaiga lava, e taua le taga'i i se molimau lelei i e o loo aafia i le osiga feagaiga. E avea lea ma faapogai e tupu ai le loto fiafia e talia ma 'auai i se osiga feagaiga ma'oe. O le mea lea, o le tala ia Aperamo, ua i ai le molimau e faatatau ia te ia. E atagia foi lea tulaga le soifuaga o Robert Louis Stevenson.

Sa faigofie ona talia le talosaga i se fanua e lagomau ai i le tumutumu mauga, ona sa soifua o ia i Samoa i se olaga tausaaafia. O se famanatu taua foi lea mo i tatou uma---po ua saunia lelei sou molimau. Po'o saunia 'ea i tatou e osi feagaiga ma nisi ua talia i tatou? po'o ona o tatou molimau le lelei ua teena ai? Ua faailoa mai i le soifuaga taualoa o Aperamo, le taua e tatau ona saunia ai i tatou i mea uma tatou te faia mo lo tatou Alii, a e maise i lo tatou va feagai ai ma isi.

Talosaga: Le Alii e, ia e fesoasoani i lo matou vaivai ina ia matou malolosi ai. Ia avea lou faatasi mai ma mea e te fia silasila mai ai, faapea i le vaavaai mai o tagata. Ia viia le suafa, Jesu Keriso. **Amene.**

Mafaufauga Loloto: O ai se tagata ua e iloa nei, pe sa e iloa i aso ua tea, e taua ma taualoaina lona soifua? O a galuega o loo ia tauaveina?

Aso Tofi, Tesema 19, 2017 “O le feagaiga e manuia ai.” Covenant to prosper

Tusi Faitau: Teuteronomie 29: 1-15

Matua (f.9): *O lenei, ia outou tausi i upu o lenei feagaiga, ma ia outou faia, ina ia manuia ai outou i mea uma tou te faia.*

O le avea o a'u e fai ma faufautua i la le tulafono, ou te faatulagaina ai faatinoga eseese o feagaiga ma faaiuga ua talia a le Ekalesia Faapotopotoga Kerisiano i Samoa. O le tele o ia feagaiga, e aofia ai le 'taiala o tiute': o le faasinoga o tiute ma matafaioi e tauave e i latou e aafia i le feagaiga mo le faataunuaina. O lē ua le mulimuli tonu i lea 'taiala tiute', o le faailoga lea o le solia o le feagaiga. O le faamoemoe taua i soo se feagaiga, ia faamaoni le faatinoina o tiute ona maua lea o le taunuuga manuia ma lelei.

O le feagaiga mai le Atua ua tuuina atu ia Isaraelu, ua faamaonia ai lo latou manuia pe a fai e mulimuli tonu ai. Ua faaalua mai, pe a fai a e tausisi i le 'taiala tiute' ua uma ona faasino mai i le feagaiga, o le a faatamaoigaina i latou. O lenei feagaiga e faigofie ona talitonuina, aua ua faamanatu atu pea e Mose le agalelei ma le alofa o le Atua a o faimalaga mai Aikupito. E le taumate o le a faigofie ona talitonu le nuu o Isaraelu i lenei feagaiga, a o latou molimauina pea le alofa o le Atua ia i latou.

O se feagaiga e faatupu fiafia. E oo lava i tagata'ese e maua faamanuiaga, pe a usiusita'i ma mulimuli i upu o le feagaiga. O le faailoga lenei o le Atua alofa e le faatua'oia. E le taumamao le Atua, peitai o lona alofa tunoa e fusia mea uma! Ua faaalua i lenei feagaiga le faamoemoe taua o le Alii, ia maua e tagata uma le manuia ina ua tumau le faamaoni ma le usiusitai.

Talosaga: Le Alii alofa e, ia e fesoasoani mai ia matou ola usiusitai e auala mai ai au faamanuiaga, ma matou ola ai pea i lou tamaoiga.
Amene.

Mafaufauga Loloto: Na faamanuiaina Isaraelu i la le tino--- faamanuiaga i le laueleele, o timuga ma le seleselega o faatoaga. Faitau ane ou manuia i lenei aso, ma 'ave lau faafetai.

Aso Lulu, Tesema 20, 2017: "Ua tauia e Poasa ia Ruta." Boaz redeems Ruth.

Tusi Faitau: Ruta 4: 1-12

Matua (f.6): *Ona fai mai lea o le tagata o le aiga, ou te le mafaatau*

ai mo 'u, nei o 'u faaleaoga i lo 'u tofi; ia e faatau mo 'oe le fanua, aua ou te le mafai ona faataulia.

Ua faaalua le agaga o le finagalo malilie ma ia faatinoina loa e tusa ma le mea ua faia e Poasa ia tau i Ruta. Na ia tausisi ia fai ma molimau i le moni ma le faamaoni. E lei tu'una e Poasa se avanoa e tupu ai se sese. O le faatinoga lea o le alofa moni ia Ruta. O le faatinoga ua faia e Poasa, ia atoatoa le tuuina atu o le pule i le ua tatau ai.

Ua teena e le sulii e sosoo ai le ofo---a e ou te manatunatu i se lagona ootia e ono tupu ia Poasa, pe ana fai a e mana'o le tagata e faatau le fanua. O le lagona ma le talitonuga ua ia Poasa, o se lagona e matua taua lava. O le faaiuga o le tusi faitau, ua faaalua ai le lagona fiafia o le faapotopotoga o e sa 'auai i faamanuiaga ua tuuina atu ia Poasa e tusa ma lenei faatinoga.

E molimauina pea ia uiga masani i aganuu faa-Samoa, a e i ai foi le manatu e faapea i isi atunuu; e tuuina atu e se faapotopotoga o faamanuiaga. E faatinoina uiga ia pe a fai e faaiipo se tasi, poo se ua faamavae ina o le a malaga, a e maise i latou ua faaeaina i se tofiga fou taua. O ituaiga ia o faamanuiaga e tupu ai le lagona faagaetia ma le fiafia. Mo e ua faamanuiaina, e aveia ia uiga ma faatinoga o le loto naunau e tumau i mea lelei.

O le mea lea, ua leai se eseese ma le faamanuiaga mo Poasa mai le faapotopotoga, mulimuli ane, o se faatinoga o valoaga. O le taunuuga o leni valoaga, o le tupuga na pogai mai ia Poasa ma Ruta na fanau mai ai Iesu---o Iesu Keriso, na faapea foi Poasa, o ia o le Lavea'i.

Talosaga: Le Alii e Iesu Keriso, matou te faafetai aua na e laveaiina i matou i le agasala. **Amene.**

Mafaufauga Loloto: O le a le faatinoga masani ma le faatinoga faale-aganuu o le upu "faaolataga", e mafai ona fesoasoani i le faamatalaina, o Iesu le Faaola?

Aso Tofi, Tesema 21, 2017 "Ua atia'e le nofoalii o Tavita."

Tusi Faitau: 2 Samuelu 7:4-17

Matua (ff.13-14a): *O ia lava na te faia se fale mo lo'u igoa; ou te faatumauina foi le nofoalii o lona malo e faavavau. E fai a'u mona Tama, e fai o ia mo'u Atalii;...*

O le tumau o le olaola o le Ekalesia, o le faatumutumuga lea o mana'oga i tagata lolotu o le Ekalesia Faapotopotoga Kerisiano i Samoa. O le tele o fuafuaga faatino i 'au lotu, e taulamua lava le Faifeau Samoa i le agaga e fausia se Malumalu. Ae faigofie ona lagolagoina e tagata lolotu le mana'o e fausia se maota tapuai i le Atua. E le mamao ese lea manaoga mai le tulaga sa i ai Tavita.

Peitai, e eseese ma Tavita, aua e leai se faatonuga tuusa'o ua tuuina mai mo le fauina o se malumalu. A e ou te talitonu, pe afai ana faapea, e faatonu tuusa'o mai, e le taumate e tausisia lava e le toatele e tusa ma afioga a le Alii ma usiusitai i ai. O le a tauaao ma talia le faasinoga, a e i ai le lagona o se faasinoga faavaloaga ina ia fausia se maota tapua'i i le Atua e tupulaga fai mai o le ekalesia.

O le faataunuaina o mana'o i se aso, o moomooga e faatinoina lava i se aso ma se taimi, o lau fanau latou te faataunuaina le na faamoemoe taua. O lo tatou talanoa lea i taimi a le Atua, na te faaogaina ai o tatou olaga. A e i ai taimi tatou te faapea ane ai, ua le taunuu manaoga ma moomooga i o tatou loto; e ao ona tatou tuu atu lea faamoemoe i le Atua o ia na te faasino le ala tatou te savavali ai.

Ona o a'u o se matua, tatou te manana'o ia faaauau e a tatou fanau manaoga taua. Afai o le a faapea ona fai, e tusa ma le finagalo o le Atua, ona tatou maua lea o le faamalieina o tatou loto!

Talosaga: Le Alii e, ia e fesoasoani mai ia matou maua le iloa ma le malamalama, e tuuina atoatoa atu ai o matou olaga e faia ai lou finagalo. **Amene.**

Mafaufauga Loloto: O le a se manaoga e tatau ona e tagai totoa i ai i lenei aso? O le a se mea e ao ina e faia e faataunuaina ai?

Aso Faraile, Tesema 22, 2017 “**Ua faateleina le tamaoiga.**”

Tusi Faitau: Isaia 55:1-5

Matua (f.3): *Ua'i mai ia o outou taliga, ma ia outou o mai ia te a'u;*

faalogologo mai ia, e ola ai o outou agaga; ou te osia foi le feagaiga e faavavau ma outou, o mea alofa ia na folafolaina ia Tavita e faamaoni lava.

Ua ta'ua i le Ekalesia Faapotoptoga Kerisiano i Samoa ia faifeau, o 'faafeagaiga.' E lua upu ua tuu faatasi, o le "faa" ma le "feagaiga". O le upu "faa", ua faatatau i le 'faatino po o le avea ma', a e o le "feagaiga" ua faatatau i le 'feagaiga ua osia.' O le tuu faatasiga o ia upu, o le 'faatinoga lea o le feagaiga ua osia.'

Ua atagia i lenei faamatalaga le maualuga o le taualoaina o le Faifeau, e tusa ma le faatinoina o lona valaauina e tausi le 'au lotu. O le valaauina o le faifeau e tausi le au lotu, ua aofia ai le 'osiga feagaiga', o lona uiga, o le faatinoina lea o 'tiute ma matafaioi ua aofia ai i le feagaiga.'

E faapei ona i ai i soo se feagaiga, o itu uma ua aofia ai e tatau ona mulimuli tonu i faasinoga ua tusia, afai e le mulimuli i faasinoga, ona solia lea ma faaleaoga le feagaiga. Afai ua i ai se faifeau ua na solia, po o lona 'au aiga ua aafia ai, ona tatau lea ona faamavae ma tuua le 'aulotu. Ua ta'ua lea tulaga, ua 'tatala le feagaiga', po o le solia o le feagaiga.

O le tusi faitau mo lenei aso, ua tatou faitau ai i le feagaiga e le solia pe faaleaogaina lava. O le feagaiga e faavavau ua ofoina mo tagata uma. E faamanuiaina i latou uma e 'auai i lenei feagaiga, e matua faa'oloaina i le tamaoiga tele.

O lenei feagaiga e le tutusa ma feagaiga faale-lalolagi, e i ai aiaiga e ono faatino ma maua mai ai se vaega o faamanuiaga. Peitai, o le feagaiga osia ua ta'ua nei e tumau e faavavau, a o le iuga, e maua le olioli ma le fiafia e 'au faatasi ai.

Talosaga: Le Alii e, ua matou faafetai, aua o lau Afio o le pogai o le feagaiga e faavavau, e pei ona valaauina ai i matou. O lea ua matou maua ai le manuia e tele lava. **Amene.**

Mafaufauga Loloto: O le a lenei feagaiga, o se tulafono 'ea po o se isi mea, ua faasino tonu 'ea i se ala e saogalemu ai?

Aso Toona’i, Tesema 23, 2017 “O le fe’au na feagai ma Ieremia.”

Tusi Faitau: Ieremia 32: 6-25

Matua (f.25a): *A o oe, le Alii e le Atua, ua e fetalai mai ia te a’u, Ia e faatau atu le fanua mo oe i tupe, ma aami atu molimau; ...*

O le filifilia o a’u e fai ma fautua i le tulafono, na faatele ona talosagaina a’u e saini mo le faamaoniga o feagaiga o fanua. Ua ou sainia e fai ma molimau ma le loto talitonu, o itu uma ua ‘auai i ia feagaiga ua malilie i aiaiga ma tuutuuga ua faia. O vaega uma ua ‘auai i le osiga feagaiga, e i ai le malamalama e i ai lava taimi e ono tutupu ai ni faaletonu e le ma’alofia.

Mo se faataitaiga, e fialia le tagata-faatau e tofogi atu le tupe ua manatu o ia, ua feagai tonu lea ma le tulaga ua i ai le laueleele ua na faatauina. Peitai, o se tulaga ua le talafeagai ma le mea ua tupu ia Ieremia, ua aafia o ia i le osiga feagaiga ua le taussia ma ua le faamaoni.

Sa le pine ona faailoa e Ieremia lea tulaga ina ia tusa ma le finagalo o le Atua. Sa le manatu i le faaletonu ua i ai, po’o se lelei foi e tupu mai ai, a e sa na talia ma le agaga ia faamalieina e ‘auai i lenei feagaiga. Ua faaalua i lenei tulaga le loloto ma le malosia o le faatuatua ma le usiusita’i, e ui lava ina tulaga faaletonu, a e na le faatuai ona mafaufau i ai. Sa ia faataunuu le finagalo o le Alii ma le iloa e avea le usiusita’i e manuia ai mea uma.

E i ai lava taimi, tatou te faafesagai ai ma tulaga e foliga e faaletonu ma le le talafeagai. A e i ai foi ni isi e manatunatu i se isi tulaga e le afaina le faaletonu ua i ai, a e onosai pea ma finafinau i le agaga o loo soifua pea le Atua. Mulumuli ane, e toia i tatou i le filemu o le Atua ma lona finagalo e faia lava lea ina ia tatou manuia ai!

Talosaga: Le Alii e, ia faatumauina lo matou faatuatua ma le loto talitonu o loo i lau Afio le potu ma le malamalama, aua ua na o ‘Oe lava matou te manuia ai. **Amene.**

Mafaufauga Loloto: Tuumuli ane i sou taimi filemu e te mafaufau loloto ai i lou Atua, e tusa ma taimi faigata sa feagai ma’oe.

O FEAGAIGA MA POLOAIGA O FAAALIGA E MANUIA AI I LE LUMANA'I

[Apoapoiga e auala mai i le Tusi Paia (NRSV) saunia e Andy
Nagy-Benson]

O Rev. Andy Nagy-Benson o le faifeau i le Ekalesia Faapotopotoga Kerisiano, UCC, i le aai o Middlebury, Vermont (USA). A e le'i ulufale o ia i le a'oga faafaifeau, Yale Divintiy School (M.Div.), sa ia faigaluega i le uafu e fagota ai le i'a samani i Alaska. Sa faiaoga i le mataupu o le English ma le a'oa'oina o le poto salalau i Costa Rica; sa faia'oga foi i le English i aoga tulaga-lua i le aai o New York. Ina ua faauuina Andy i le tofiga o le faifeau i le 1998, sa tausi ekalesia o ia i 'aulotu e tolu i New England. O lona faletua o Gwendolyn, e to'atolu la laua fanau teine.

Aso Sa, Tesema 24, 2017 “O le avanoa lona lua.”

Tusi Faitau: Ieremia 31: 31-34

Matua: (f.33): *A o lenei le feagaiga ou te osia ma le aiga o Isaraelu, pe a mavae ia aso, o loo fetalai mai ai le Alii, ou te tuuina la'u tulafono i totonu ia te i latou, ma ou tusi ai i o latou loto; e fai foi a'u mo latou Atua, o i latou foi e fai mo'u nuu.*

A o o'u nofo ai i le aai o Los Angeles i le amataga o le 1990's, o le vaitaimi tonu lea sa numera muamua ai le aai lenei i faalapotopotoga faatupu vevesi i le USA. O le tulaga sa i ai ia vevesiga i totonu o le aai, sa taumafai ai le alii patele o Father Greg Boyle SJ e faalelei le soifua maloloina ma le saogalemu i lo latou pitonuu.

Sa amata lenei taumafaiga ia galulue faatasi ma le 'au faipisinisi ina ia faafaigaluega i latou o loo aafia i faalapotopotoga faatupu vevesi. O le faamoemoe taua o lenei taumafaiga, “Faigaluega mo le Lumana'i”, sa olaola ma faalauteleina e lata i le 30 tausaga. Ua i ai i aso nei, o le Homeboy Industries, ua faavae lenei faalapotopotoga e fesoasoani i le faitau afe ma afe o tupulaga ma e ua aafia i tulaga faaletonu, ina ia toe amata ma faavae se olaga fou e lelei mo le lumanai.

Ua masani le toatele i le olaga i auala tele i le aai o Los Angeles, a e le malamalama ai foi nisi e to'atele, a e tatou te malamalama uma i le malosi o le ola toe faafouina. E le taumate o le pogai lea e faagaetia ai upu a le perofeta o Ieremia. O upu o poloaiga a le Atua e faafouina ai ma ta'ita'iina ai Isaraelu i le faamoemoe mo i latou ua galo ma le iloa lo latou tupuaga.

O le a o'o mai aso lelei ma le manuia, o la le perofeta lea. Aua nei galo, o loo i ai pea le avanoa e filifili ai i le aso nei. Po o le finagalo 'ea o le Atua, ia faamalolosi i tatou ma faatino nei loa? Po ua tatou filifili 'ea i le na faamoemoe lumanai? Po'o tatou tala'i atu 'ea le na faamoemoe i isi?

Talosaga: Le Atua alofa e, afa'i e faaletonu lo matou faamoemoe, ma ua faatauasoina la matou vaai, ia e fesoasoani mai e taitai tonu i matou i ou ala. **Amene.**

Aso Gafua, Tesema 25, 2017 (Aso Kerisimasi): “Ia manatua le fanau laiti.”

Tusi Faitau: Mika 5:1-4

Matua (f.2): *A o 'oe, Peteleema-Efarata, e itiiti 'oe i afe o Iuta, a e tupu mai ia te 'oe mo a'u o le fai ma faipule ia Isaraelu, o lona tupu mai talu mai anamua lea, talu mai ona po o le vavau lava.*

O le Kerisimasi ma taga'ie o mea-alofa. Ua atoa nei le 20 tausaga, e tofu i maua ma lo'u to'alua, ma taga'ie o mea-alofa mo le Kerisimasi. E le o se mea tau faa'ata? A 'ea! Ailoga e mafai ona tete'e le mana'o e faia faatauga i lenei va i taimi o le tausaga? E le fesiligia lea mea.

Peita'i, e leai lava se isi mafuaaga, o le 'taga'ie o mea alofa' o le faatauaina lea o nai mea iti. Ua le ona e le fia fai mea-alofa. O le saunia o taga'ie mamoe fou, o se faailoga o le onosa'i i le umi o aso o le tau malulu i New England. E faia faapitoa lava taga'ie (saunia ia lava ma lelei i tausaga e tele) e talia ma le loto fiafia a o faagasolo pea aso ma le tau: “O taga'ie!”

Tusa ua lua afe nei tausaga e va a'i le perofeta o Mika ma o tatou tupulaga. O le tele o tausaga, i ona po o auga perofeta anamua ma o

tatou tupulaga, e tele lava mea e eseese ai. A e ui i lea, e i ai lo'u lagona e faatatau ia Mika, e faapea: e i ai le taua o mea iti e faatusa ia Petele'ema, o le faaaliga o se mea sili ona taua e faatatau i le Atua.

I ona po a o vaeluaina le malo ona o puleaga a taitai e amio le tonu, sa tapuai ma lolotu i faatuatuaga faapaupau ma le tele o sauaga, o tausaga tonu ia sa valo'ia ai e Mika, o le a afio mai le ta'ita'i e fou lana pule. O lea pule e tupuga mai i Peteleema, o se nuu e itiiti a e sa aumau ai se leoleo mamoe talavou sa faauu e fai ma tupu. I ona po o Tavita, e faapea foi ia Mika, o Peteleema o se nofoaga e tu mamao mai le nofoaga e i ai le pule, 'o le nofoaga o se aiga e faatauvaa'.

O Mika, o le perofeta sa faitauina lona tulaga i auga perofeta faatuatuaina o Isaraelu, sa taula'i lana vaai i galuega faatino a le Atua i ona tagata ua le amana'ia i totonu o le nuu. O le tama o le uii, sa leoleo i lana lafu mamoe i se oganuu. Sa i ai le pepe na fanau i totonu o le fale o manu i se ulugalii e lei faaiipoipoina. Na foai i ai mea-alofa laiti, e oo lava i taga'ie laiti ma le faatauvaa sa tuuina atu atoa ma le agaga o le alofa.

Talosaga: Le Alii e, i lenei aso taua, i o matou taimi filemu, ia matou lagona le agaga o le faafetai ona o lau mea-alofa: O le alofa tunoa ua faaolaina ai le lalolagi atoa. **Amene.**

Mafaufauga Loloto: O fea se vaega o lo outou nuu e te vaايا ai se faailoga o le alofa ua liu tino tagata o le Atua? Pe mafai ona e oo i ai ma taga'i toto'a i ai?

Aso Lua, Tesema 26, 2017 “**Ia lelei e pei ona faia ma faataunuina.**”

Tusi Faitau: Luka 1: 46-55.

Matua (f.52): *Ua tulei ifo e ia o alii nai o latou nofoalii, a ua faapeaina e ia o e faamaulalo.*

O se tasi o a'u uo e pito i matua, o le pu'e ata iloga. E le'i mamao atu i tua na ia tuuina mai ai se ata: o le tumutumu mauga e ufitia i le puao o le taeao, e lanu piniki vaivai. Sa ou ave le kopi pito tele e faatele i le kamupani e fai ai faavaa, a e sa fesoasoani mai le faatau-oloa i le

auala e faatino ai le galuega. Ina ua mae'a le galuega---faapipii le tioata ma le faavaa---ona tuu mai lea o lona lima o loo ta ai le tatau (tattoo) ma faatalofa mai ia te a'u. Ua tepa mai ia te a'u ma faapea mai, "Ua uma." Peitai, o le faapipiina o le faavaa e le'i uma; ua faatoa amata. O ana upu faai'u e iloa ai ua amata. A ua ou mautinoa, e faia lava le galuega e pei ona manao i ai.

Ou te talitonu e i ai se mea e tutusa ai le faatau-oloo ma Maria. Ina ua ou taumafai e ave'ese o'u mafaufauga mai mea ua masani ai, o le Pese a Maria, ona toe faamanatu mai lea ia te a'u o le mea lenei e galo so'o ia te a'u. O le vaega tele o le pese, o lana pese e faavae i le taimi tuana'i. Ua pese i le Atua ona ua, "*faia e ia mea silisili mo a'u*", ma "*ua tulei ifo e ia o alii nai o latou nofoalii, a ua faapeaina e ia o e faamaulalo.*"

Ua iloa lelei e Maria, o mea nei e le'i faataunuaina. Peitai, ua faaalua lona loto talitonu, o le Atua alofa ma le faamaoni e faia mea tonu uma. Ua talitonu i lana tama e fanau mai, na te faataunuaina le finagalo o le Atua e pei ona tatau ai: faaeaina i e ua tuulafoaiina, tuu saoloto i e nonofo i le pologa, fafaga i e matelaina i le fia feinu, fai le faamasinoga tonu i fafine ua oti a latou tane, a e maise i e ua matua oti ma leai ni aiga.

Pe le o upu 'ea ma tala e faailoa ai le faatuatua ua tele lava? E ui ina tatou faafeagai pea ma le lalolagi e fesouaina i faigata ma puapuaga, a e ia tatou loto talitonu o loo soifua pea le Alii, ua manumalo i le lalolagi. Aua ua maea ona saunia le faaolataga.

Talosaga: Le Alii e, ia avea au poloaiga ua mavae e faamalosia ai le loto talitonu. O lou faamaoni e taitaiina ai o matou faamoemoe. Faafofoga mai i lau pese faafetai i lenei aso. **Amene.**

Mafaufauga Loloto: Pe i ai se pese i la outou faletusi e faatatau i le faatuatua o Maria i lana pese? E atagia ai lona talitonu faamaoni?

Aso Lulu, Tesema 27, 2017 "O le li'o e le motusia o le alofa o le Atua."

Tusi Faitau: Luka 1: 67-79

Matua (f.72): *E faia le alofa ua folafolaina mai i o tatou tama, e manatua foi lana feagaiga paia.*

Na ou fanau i le Aso Sa Faamanatuga o Tina i le USA, le aso 10th Me, e i ai se tulaga faapitoa e tupu pe ana aso fanau i le amataga o Me. Sa fuafua e o'u matua i le masina e sosoo ai. E moni, o le fanau a e lei o'o i le aso fuafuaina o le tina e le o se tulaga faigata i aso nei, peitai, i le 1970, o le fanau i le fa vaiaso a e le'i o'o i le aso fuafuaina o se tulaga e ono popoleina.

E tele taimi e talanoa mai ai o'u matua i mea sa tutupu i uluai vaiaso o lo'u fanau mai i le falema'i, peitai, o uso ma tuafafine o o'u matua e le o toe mafaufau lava i ia tulaga. Na fai mai le tasi uso o lo'u tama ua maliu, o Bob, sa nofo lava lo'u tama i le fa vaiaso na ou i ai i le falema'i. O le tala lenei ua na taitaiina o'u mafaufauga ina ua fanau lo'u afafine ulumatua e tusa e masina a e le'i o'o i le aso sa fuafuaina o le tina. E pu'upu'u lona taimi i le falema'i nai lo a'u. Peitai, o ia tulaga faaletonu sa i ai, o le vaiaso muamua lava o le vaiaso lea o le tausiga faamatua, lea na ou mua'i iloa ai le faatinoga o la'u tausiga ia Ella, e faapei o le tala muamua i le tausiga a o'u matua ia te a'u.

Pe afai e tuu faafeagai nei tala, ona iloa ai lea o Sakaria ma Elisapeta, sa la molimauina le fanau mai o le atalii, o le ata e atagia ai se tala umi lava. E faapei o Sara, o Elisapeta foi sa na tau'ave ma fanauina se atalii ina ua tagata matua. E faapei o Aperamo, o Sakaria foi ua fiafia ina ua fanau se atalii ua leva ona naunau i ai.

O le feagaiga a le Atua ma Aperamo ma Sara, o se sootaga e faapei o se punavai o le ola ua na 'au mai le ola fou ia Elisapeta ma Sakaria. Pe a o'o ina tatou lagona le ola fou e ala i lo tatou talitonu ma faatuatua i le Atua, ona faatusaina lea o i tatou ia Sakaria, e faapei ona molimau i upu o le viiga ma le faamanu ona o le Alii lo tatou Atua.

Talosaga: Le Atua o le amataga e oo i le faavavau, matou te faafetai ona o tala o lou alofa tunoa e le fou, a e ua oo mai lava i ona po nei, ma o le a oo lava i le faavavau. **Amene.**

Mafaufauga Loloto: Pe i ai se talatuu i lou aiga e ta'u mai ai, o mea o lo'o e ola ai nei, o se vaega o le tala e faifai pea? Afai e i ai, o le a lea talatu'u? Aisea e taua ai ia te 'oe?

Aso Tofi, Tesema 28, 2017 “Ulua'i vaaiga uiga 'ese”

Tusi Faitau: Luka 2:25-38

Matua (ff.27-28): *O le Agaga ua alu ai o ia i le malumalu; ua 'au mai le tama o Iesu e ona matua, ia la faia ia te ia faapei ona tatau i le tulafono, ona sapaia lea e ia i ona lima, ua vivii atu i le Atua, ua faapea atu...*

Ua iloa e Simeona ma Ana le tama o Iesu, ua atoa le lua masina, o se vaaiga e uiga ese. O se faataitaiga, ua la iloa ia Iesu ni uiga e sili atu na i lo mea sa la mafaufau i ai. E faigata ona faamatala mea sa tutupu, peitai, e iloa o lea tutupu. Ua mavae tausaga e tele, sa i ai se tasi o a'u uo na vaai i se ata o se teine talavou o loo faapipii i le laupapa, ua tusia ai upu nei: “O le a ou alu e faaipoipo i le tamaitai.” O ni faamatalaga e faate'i loto! Peitai, e i ai le taimi, e faatasia ai i laua, e avea ma tino-e-tasi i a la ta'utinoga.

E fialia i ai Malcolm Gladwell. I lana tusi lauiloa o le “Blink”, tausaga 2005, na faamatala ai o se tasi o polofesa i uiga o manu felelei, sa ia vaavaai atu i le manu o lele, tusa o le 100 mita le mamao, o le manu lele ua igoa o le “ruff”. O lenei manu e le masani ona vaaia o lele, a e peitai o lea ua vaaia o lele e peiseai o le faailoga e masani ai le 'au maimoa o le vanimonimo: “o lea ua fuifui faatasi.”

O le mea lea, o le a se uiga o le “fuifui faatasi” I le manatu o Simeona ma Ana? Afai e fuafua i upu a Simeona (poo se pese foi), o le faailoga ua vaaia ia Iesu o le faamaoniga lea o le poloaiga mai le Atua e tumau pea mo Isaraelu. O le “fuifui faatasi”, ia molimauina e Simeona ma Ana, o le 'au faatasi lea o le Alii ma le Atalii. O le taimi sa ia faatalitali i ai, ua taunuu. Ua ia vaaia le Mesia.

O se tasi o masaniga faa-Kerisiano, e pese ina le pese a Simeona ina ua mae'a le faatinoga o le Talisuaga a le Alii. E faapei o Simeona foi, tatou te lagona (vaai, pa'i atu, sosogi, tofotofo) le poloaiga i le 'auai faatasi ma le Keriso i le areto ma le uaina. E faapei lava o Simeona,

tatou te maua le lagona o le faafouina ma le faalototeleina, o i tatou lava o le fanau a le Alii e ala i le ola ma le oti.

Talosaga: Le Alii alofa e, silasila alofa i lau fanau e tusa ma lou alofa tunoa ma le filemu. **Amene.**

Mafaufauga Loloto: Taumafai e faitau i le “Love (III)”, ua tusia i tauloto a George Hervert. Vaavaai faapitoa i le “quick-eyed Love”. Tagai po o a upu ua faatatau ia Iesu? O a foi ni fautuaga e faatatau i le soifuaga faa-Kerisiano?

Aso Faraile, Tesema 29, 2017 “Taimi o mafaufauga pito taua.”
Tusi Faitau: Isaia 65: 17-25.

Matua (f.17a): *Aua faauta mai, ou te faia le lagi fou ma le lalolagi fou; ...*

O se tasi o tamaitai iloga o la matou ‘au lotu, ina ua mae’a le sauniga i taimi o le tau e totogo a’e ai laau, na ia tuu mai ia te a’u le faasologa o le sauniga. Ou te taua o se tagata iloga i le faatuatua o loo soifua pea, o se faaa’oa’oga mo le toatele o e savavali i le soifuaga faale-faatuatua.

Ina ua ou foi ane i lo’u ofisa, sa ou tatala i lenei faaaliga ma le faaeteete. Ua ou vaaia, o se tusilima o le gatete, o upu e faatatau i se tasi o tagata lauiloa i le taina o faatagata, o Henri Moore. O upu e faatatau i “mea lilo o le olaga”, faatasi ma le matua faasaga e fai mea uma tusa pe faigata ia te oe.

Sa ou ‘ataata ma ou mafaufau loloto i ai. E le o se tulaga e fesiligia, o le faatoa mae’a lea ona faalogo i upu o le lauga i le Isaia 65. Ua mae’a ona faalogo i le poloaiga a le Atua ua folafolaina e perofeta. “Ou te faia le lagi fou ma le lalolagi fou...”, ua fetalai le Alii. “E aai faatasi le luko ma le tama’i mamoe ...”, ua fetalai mai ai le Alii. Na ou folafola i le finagalo o le Atua, e mafaia mea uma e le mafaia i se malosi faale-tagata. Ua manatu nisi o le lalolagi o loo folafolaina e le ‘au perofeta, e le faatusatusaina i le lalolagi lea o loo tatou olaina nei. A ua manatu foi nisi, o le soifuaga matagofie ma le ola filemu ua ta’ua e

le faataunuu. A e ui i lea, mai lea auga tupulaga ma lea auga tupulaga, o le eleele lafu lemu e fausia i le faatuatua, o iina e ola ai le fatu.

Afai o afioga a le Alii e moni e faapei o upu o valo'aga a le perofeta o Isaia, o lona uiga, ua valaauina i tatou ina ia tatou manatunatu loloto i faaaliga na mua'i faaaliga mai, ina ia matua faailoa mai ia i tatou o mea e le o'o i ai lo tatou iloa faale-mafaufau, a e ia talitonu ma faatuatua i le Atua, o ia lava na te ta'ita'i i tatou i le lumanai olioli ma le fiafia.

Talosaga: Le Atua e, afai ua vaivai lo matou iloa ma le malamalama, ia e lavea'i mai i matou. O mea ua lilo i lo matou iloa, ia avea au faaaliga ma ta'iala i lo matou malamalama. **Amene.**

Mafaufauga Loloto: O le a sau miti ua pito iloga i lou olaga atoa? Taga'i i solo a Mary Oliver, "Evidence", atonu e fesoasoani i ou mafaufauga ma ou manatunatuga.

Aso To'onai, Tesema 30, 2017 "E fia maila le mamao o le lagi."

Tusi Faitau: Faaaliga 21:1-7

Matua: (f.3): *Na ou faalogo foi i le leo tele mai le lagi, ua faapea mai, "Faauta, ua i ai le afioga o le Atua faatasi ma tagata, e mau foi o ia ma i latou; e fai foi i latou mona nuu, e ia te i latou le Atua lava.*

Ua faitau afe tausaga o moe miti tagata e i ai le lagi. O le "tala faasolopito o le lagi" e umi ma e le faigofie ona faamatala. O faaaliga o lo tatou 'auai faatasi ma le Alii, e tele ona uiga e faapei o i tatou foi. E lautele o tatou manatu pe a faatusaina le lagi, peitai, o le talitonuga faale-lotu Iutaia ma le Kerisiano ua tusia i tusi, e pei o faaaliga a Dante, ua faamalamalama mai ai le mea o loo agai i ai e ua pele ia i tatou pe a tuua lenei olaga. O le mea lea, e faasino le lagi i "luga".

Atonu, o le faaaliga na vaai e Ioane, o le lagi e gata mai ai le mea ua tatou iloa. Ua na valaauina i tatou e faailoa mai nisi mea ua tatou le iloa. Ua ta'ua e Ioane, e i ai le aso e o'o mai ai le lagi i le lalolagi, e faailoa lea i le aai paia, o le Ierusalema Fou. Ua faamanatu mai lenei mea ia i tatou, o le lagi e le'i atoatoa lona faatinoina. A e ui i lea, ua valaauina i tatou e Ioane ia tatou talitonu e o'o mai lava le aso e sili ona taua ma lelei.

E le gata i lea, i lenei taimi, ou te ofo: Pe i ai se avanoa ou te galue ai ina ia faataunuaina loa? E i ai se mea ou te fesoasoani ai? Ou te le ma iloa pe mana'omia e le Alii sa tatou fesoasoani, peitai, ou te talitonu o le finagalo o le Alii: Ia mafuta pea ma i tatou.

O le aso ananafi, sa ou matamata ai i se tagata e leai sona aiga (na ou iloa ma masani ai) ua na tago i le mutia o loo lavea i le ta'e o le ala sima i le Main Street. Na sau i lo matou pitonuu e maua atu ai sana mea'ai i le 'au lotu, i le 15 minute a e le'i tatalaina le faitotoa, ua manatu o ia e tatau ona faamama lea vaega o le auala. O lana faamatalaga, a e maise o lo tatou finafinau pea mo le lagi ma le parataiso i luga, e peisea'i ua ou vaavaai i se faatusa o le lagi e sili ona latalata mai, na i lo le talitonuga ua tatou masani ai.

Talosaga: Le Alii alofa e, ia avea lea faaaliga o le lagi o i le lalolagi, o le aiga lava lea ua ou nofo ai. Ua vaavaai i ai ou mata, aua "ua oo mai lou malo." **Amene.**

Mafaufauga Loloto: Mafaufau i lau faiga malaga o le na tausaga, mafaufau ua e taunuu i le "lagi", o lou olaga lea, e ui ina puupuu?

Aso Sa Tesema 31, 2017 "O tau'au o auauna galulue i le tala lelei."

Tusi Faitau: Faaaliga 21:9-26

Matua: (f.14): *Ua i le pa foi o le aai o faavae e sefulu ma le lua, ua i ai foi igoa o le 'au aposesitolo a le Tama'i Mamoe e to'asefulu ma le to'alua.*

Talu ai nei lava, sa 'ou 'auai i le komiti na filifilia agavaa o se auauna e fia faauu i le tofiga o le faifeau. Sa na faamatala 'oto'oto ona agavaa ma tali i fesili tusia e tusa ma lana talosaga. Ina ua fesiligia sana faamatalaga i ona lagona ua o'o nei i ai, ona faapea mai lea: "Ou te tula'i i tau'au galulue o le to'atele," ma ua faauau pea lana faamatalaga e tusa ma e sa fesoasoani i le avea o ia e fai ma so'o o Keriso.

Ua na auaua'i ta'itasi, na talanoa mai i e sa latou fesoasoani i le faamalosi o ia e tusa ma mea-alofa o loo ia te ia, a e maise o

faamanuiaga e maua i le galuega faafaifeau. O se tulaga matagofie lea. O lenei fetufaaiga sa fai ma faamalosi loto ia te a'u ma lo'u foi olaga, a e maise i le to'atele o e sa ou fesoasoani i ai.

O lenei faiga malaga faale-faatuatua, tatou te savavali faatasi ma isi e fesoasoani mai, tatou te savavali faatasi ai lava ma le 'au faatuatua sa mua i malae. O le a le mou atu i le vaaiga faale-maufaufau i o latou foliga, e le galo lava o latou igoa i manatu.

I lenei agaga e tasi, e faapei ona ou mafaufau i igoa o le 'au aposetolo o lo'o tusia i le ma'a faavae o le Ierusalem Fou, ou te mafaufau ai pea e i ai foi nisi igoa e tele e faaopoopo i ai a e le'i taunuu i le aai paia. O latou igoa, o igoa e iloa ai le uiga moni o le alofa o le tasi i le isi, e faapei ona alofa mai Keriso ia te i tatou uma.

Talosaga: Le Alii e, matou te faafetai i lou alofa i tupulaga uma. Fofai mai lou malamalama, matou te faasusulu atu i e ua i le pogisa, ina ia matou 'auai faatasi i lou malamalama. **Amene.**

Manuia le Kerisimasi ma le Tausaga Fou i le alofa o le Alii.

Soifua ia.